

Milik Departemen P dan K  
Tidak diperdagangkan  
Untuk umum

# Hikayat Cut Diwa Akah I

Ramli Harun

rektorat  
layaan

temen Pendidikan dan Kebudayaan



## **HIKAYAT CUT DIWA AKAH**

**I**

# Hikayat CUT DIWA AKAH I

Alih aksara  
RAMLI HARUN



TANGGAL	NO. INV.
18 NOV 1984	1312

Departemen Pendidikan dan Kebudayaan  
PROYEK PENERBITAN BUKU SASTRA  
INDONESIA DAN DAERAH  
Jakarta 1983

**Proyek Penerbitan Buku Sastra  
Indonesia dan Daerah**

Hak pengarang dilindungi undang-undang

## KATA PENGANTAR

Bahagialah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalian karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalian sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra daerah Aceh, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1983

Proyek Penerbitan Buku Sastra  
Indonesia dan Daerah

## **ASOE HIKAYAT**

### **JILED KEU SA**

I.	RAJA DIWA LAKSANA DARI MARTAGANG-SA .....	15
II.	DIWA SEUNDARI PEURUPA DROE LAGEE PEURUMOH RAJA .....	24
III.	RAJA HANA GEUTUPEUE ANEUK KA LAHE ..	30
IV.	CUT DIWA AKAH JAK MEURANTO .....	48
V.	MEUTEUMEE NGON SYEEDARA MA .....	70
VI.	MEUNUNTUT ELEUMEE BAK SYIAH TAPA .....	89
VII.	BEUREUMA DIWA DARI NEGARA PURI .....	104
VIII.	ANEUK RAJA SIKRUENG PLOH TUJOH .....	115
IX.	CUT DIWA AKAH DI TAMAN INDRA SELOKA ..	132
X.	MEUTURI NGON PUTROE RAKNA KEUMALA ..	157
XI.	PUTROE RAKNA JICOK LE CUT DIWA AKAH ..	174
XII.	PRANG MEUSUNOH PUTROE .....	189
XIII.	RAKNA KEUMALA GEUPEUNIKAH NGON CUT DIWA AKAH .....	214
XIV.	KRAMAWANDA KEUMEUNG REUBOT PU-TROE .....	230
XV.	NEGARA PURI JIPRANG LE KRAMAWANDA ..	252

## PENGANTAR

Seperti umumnya hikayat Aceh, hikayat Cut Diwa Akah inipun tidak diketahui orang nama pengarang yang sebenarnya dan tahun penulisannya. Naskah ini kami peroleh dari Pusat Dokumentasi dan Informasi Aceh di Banda Aceh bulan Juni tahun 1982 dalam bentuk tulisan tangan dengan huruf Arab yang terang. Ukuran naskah 25 x 15 cm dengan tebal 430 halaman. Di halaman muka tertera nama pemiliknya yaitu Teungku Hasan supir, tinggal di Simpang Kandang Meunasah Me. Di halaman terakhir tercantum tanggal selesainya penulisan yaitu tanggal 7 Juli tahun 1958. Melihat data tersebut mugkin hikayat ini disalin sendiri oleh pemiliknya ataupun ia mendapatnya dari orang lain.

Hikayat Cut Diwa Akah adalah salah satu hikayat lama yang sudah ada setidak-tidaknya sejak akhir abad ke sembilan belas. Dr. Snouck Horgrunje telah membicarakan hikayat ini dalam bukunya yang terkenal De Atjehers. Hikayat yang telah kami alih aksarakan ini merupakan dongeng dengan berbagai peranan makhluk-makhluk halus. Cut Diwa Akah digambarkan sebagai seorang tokoh yang dapat menundukkan segala raja bangsa jin dan manusia. Sesudah mengembara ke berbagai negeri dan dapat mengalahkan musuh-musuh yang hendak membinasakannya ia pulang ke negeri orang tuanya Martagangsa. Ia dapat mempersatukan kembali ayahnya Diwa Laksana dan ibunya Mandu Diwi yang sudah sekian lama berpisah akibat perbuatan jahat seorang jin wanita bernama Diwa Seundari.

Untuk bahan penelitian bagi pencinta sastra daerah, hikayat ini patut dipelihara sebagai khazanah yang berharga. Untuk memudahkan pembaca mengikuti jalan cerita hikayat yang panjang ini, penyunting telah membaginya menjadi dua jilid dengan membuat beberapa judul isinya.

RINGKASAN  
HIKAYAT CUT DIWA AKAH  
JILID I

Negeri Martagangsa diperintah oleh seorang raja yang adil bernama Diwa Laksana. Baginda belum memperoleh keturunan meskipun sudah hampir tiga puluh tahun memperisterikan putri Mandu Diwi. Menurut ahli nujum baginda akan mendapat seorang putra yang kelak dapat menundukkan segala raja manusia dan jin. Seorang jin perempuan bernama Diwa Seundari telah bersumpah akan menggoda raja Diwa Laksana.

Pada suatu hari ketika putri Mandu Diwi sedang mandi bersama dayang-dayangnya di sebuah kolam, datanglah Diwa Seundari menyamar sebagai putri Mandu. Pakaian putri Mandu diambilnya dan bersama dengan dayang-dayang pulang ke istana. Raja Diwa Laksana tidak mengetahui bahwa isterinya itu bukan isteri yang sebenarnya. Keduanya hidup sebagai suami isteri tanpa ada yang mengetahuinya. Putri Mandu yang sudah mengetahui bahwa Diwa Seundari sudah menggantikannya sebagai permaisuri, tinggal di rumah mangkubumi kerajaan dan dimintanya supaya rahasia itu tidak disampaikan kepada baginda. Sebenarnya putri Mandu ketika itu sudah hamil dua bulan tetapi tidak diketahui oleh baginda. Beberapa bulan kemudian putri Mandu melahirkan seorang putra dan oleh mangkubumi dinamakan Cut Diwa Akah. Putra mahkota ini dibesarkan dan diajarkan berbagai ilmu di rumah mangkubumi. Lama kelamaan atas keterangan mangkubumi, Cut Diwa Akah mengetahui siapa ayahnya yang sebenarnya. Ia berniat hendak menghukum Diwa Seundari yang telah menipu ayahnya tetapi dihalangi oleh ibunya.

Cut Diwa Akah pergi mengembara, dan di suatu tempat bertemu dengan seorang perempuan tua bernama Purba Danta. Sebilah pedang peninggalan suaminya dihadiahkan kepada Cut Diwa Akah. Dalam perjalanan berikutnya Cut Diwa Akah terpaksa berkelahi dengan seorang bangsa jin bernama Lang-Lang Daranu.

Dalam perkelahian itu Lang-Lang Daranu harus mengakui keunggulan Cut Diwa Akah lalu ia menghadiahkan sebuah jimat dan berjanji setiap waktu bersedia membantunya. Di negeri Mercu Negara Cut Diwa Akah terpaksa pula berkelahi dengan seorang pahlawan bernama Sair. Ia dapat menewaskan Sair dengan pedang pemberian Purba Danta, dan raja Peurana Lila yang memerintah negeri itu menjadi teman baiknya. Ia mendapat pula sebentuk cincin sakti dari raja jin tersebut.

Tiada berapa lama kemudian Cut Diwa Akah sampai di sebuah taman kepunyaan Meukuta Raja yang berkuasa di gunung Martaganja. Ketika menyaksikan taman tersebut dengan kolamnya yang indah ia teringat akan nasib yang menimpanya akibat perbuatan Diwa Seundari. Ternyata Meukuta Raja adalah saudara ibunya sendiri. Sesudah mendengar cerita tentang putri Mandu baginda amat murka dan berjanji akan menghukum Diwa Seundari. Meukuta Raja menganjurkan Cut Diwa Akah supaya sebelum menghadapi Diwa Seundari yang sakti itu terlebih dahulu harus bertapa pada seorang guru bernama Beurahman Sakti. Diberikan pula kepadanya sebuah azimat bernama Guliga Hikmat. Di antara murid-murid Beurahman Sakti yang banyak itu terdapat dua orang anak raja masing-masing bernama Diwa Danta dan Damsyik Kaindra. Di tempat itulah Cut Diwa Akah mendapat berbagai ilmu sakti.

Tersebutlah sebuah negeri bernama Negara Puri yang diperintah oleh seorang raja bernama Beureuma Diwa. Baginda mempunyai empat orang anak. Tiga diantaranya laki-laki masing-masing bernama Namli Diwa, Kusna Raja dan Mangindra Pari. Yang keempat seorang putri bernama Rakna Keumala. Putri ini tinggal di sebuah mahligai dan dijaga oleh dayang-dayang dan tujuh orang pahlawan.

Beurahman Sakti berpesan kepada Cut Diwa Akah supaya tidak pulang dulu ke negerinya sebelum mendapat putri Rakna Keumala. Murid-murid Beurahman Sakti banyak pula yang ingin mengadu nasib memperebutkan putri Rakna Keumala. Terjadi pula keributan diantara mereka dalam usaha mendapatkan putri cantik itu. Dengan bantuan Lang-Lang Daranu yang menjelma

sebagai seekor garuda Cut Diwa Akah sampai di negeri Negara Puri dan turun di sebuah taman kepunyaan seorang janda tua bernama Bibik Sikandawati. Di tempat itu ia belajar merangkai bunga. Pada suatu hari pembantu Bibik Sikandawati bernama Dang Seundari pergi menjajakan bunga ke istana Rakna Keumala. Putri Rakna tertarik dengan bunga yang dibawa Dang Seundari karena rangkaianya tidak seperti biasa. Ia meminta supaya Bibik datang ke istana untuk mengajarnya merangkai bunga. Bibik sendiri tidak dapat merangkai bunga seperti dilakukan oleh Cut Diwa Akah, tetapi dengan bantuan seekor lalat, bibik dapat merangkainya seperti yang dikehendaki putri Rakna.

Dua orang dayang-dayang memberitahukan putri tentang keadaan Cut Diwa Akah. Keesokan harinya mereka datang lagi ke rumah bibik dan melihat Cut Diwa Akah sedang membuat sepasang burung merak dari emas. Sesudah selesai Lang-Lang Daranu masuk ke dalam tubuh burung merak buatan itu sehingga kedua ekor burung itu dapat berbicara. Burung merak itu dikirim ke istana sebagai hadiah kepada putri Rakna.

Putri Rakna selalu berhubungan dengan Cut Diwa Akah melalui kedua dayang-dayangnya. Pada suatu malam secara diam-diam Cut Diwa Akah pergi ke istana dan dengan pertolongan Lang-Lang Daranu putri Rakna dibawa ke rumah bibik Sikandawati. Hal ini diketahui oleh tujuh orang pengawal putri dan dengan sejumlah pasukan mereka menuju taman Indra Seloka milik bibik Sikandawati. Di sana mereka menyaksikan putri bersama Cut Diwa Akah. Dengan bantuan empat orang anak Meukuta Raja ketujuh pengawal putri yang hendak membinasakan Cut Diwa Akah dapat ditewaskan. Raja sangat murka mendengar putri-nya diculik lalu mengumumkan barangsiapa yang dapat mengalahkan Cut Diwa Akah akan dinikahkan dengan putri Rakna Keumala. Mendengar janji baginda yang menarik itu, sembilan puluh tujuh orang anak raja yang pernah bertapa bersama Cut Diwa Akah datang dan mengepung taman Indra Seloka hendak menyerang Cut Diwa Akah. Mereka dapat ditawan oleh Cut Diwa Akah tetapi sesudah meminta ampun mereka dibebaskan. Karena sudah beberapa kali gagal, maka Beureuma Diwa berdamai dengan Cut

Diwa Akah dan putri Rakna dinikahkan dengannya.

Adalah seorang raja sakti keturunan bangsa dewa bernama Kramawanda yaitu putra mendiang Indra Bangsawan. Ibunya bernama Suri Mangirna. Ia memerintah di negeri Rakna Samindra dan mempunyai seorang adik perempuan yang amat cantik bernama Sinaran Cahya. Pada suatu hari ketika Kramawanda sedang terbang melihat-lihat negeri, ia sampai di negeri Negara Puri. Di situ ia melihat putri Rakna Keumala sedang memadu kasih dengan Cut Diwa Akah. Ia tertarik dengan kecantikan Rakna Keumala dan berniat hendak memilikiinya. Tetapi ibunya tidak setuju dengan keinginan putranya karena Rakna Keumala sudah bersuami. Dengan mendapat dukungan dari tujuh orang saudaranya terutama Bulia Rakksasa, Kramawanda mengirim dua orang utusan membawa surat kepada raja Beureuma Diwa. Di sana kedua utusan itu menjelek-jelekkan Cut Diwa Akah yang bangsa manusia itu. Mendengar ucapan kedua utusan itu raja Beureuma Diwa amat murka dan surat dari Kramawanda dirobeknya. Kedua utusan itu pulang dan melaporkan apa yang dialaminya kepada Kramawanda. Meskipun ibunya Suri Mangirna telah melarang, namun dengan pasukannya yang besar ia menuju negara Puri. Cut Diwa Akah dan Rakna Keumala tidak mengetahui hal itu. Tetapi raja Beureuma Diwa telah bersiap-siap menanti segala kemungkinan dari Kramawanda, dan telah mengangkat keponakannya Bansu Diwa sebagai panglima perang. Dua orang utusan dari Kramawanda datang lagi kepada Beureuma Diwa meminta supaya menyerahkan putrinya. Karena Beureuma Diwa tetap menolak maka pasukan Kramawanda menyerang Negara Puri. Dalam pertempuran itu panglima Bansu Diwa tewas kena panah panglima Syahrum. Akan tetapi akhirnya Syahrum tiwas di tangan Kusna Pari yang menggantikan panglima Bansu Diwa.

# HIKAYAT CUT DIWA AKAH

## I

Bismillahirrahmanirrahim

### I. RAJA DIWA LAKSANA DARI MARTAGANGSA

Bismillah awai lon surat  
Le beureukat jroh sempeuna  
Tuhan neu bri that akibat  
Nyankeuh syarat nyang peurtama

Nyankeuh geukheun peureulee syarat  
Punca beureukat ban sineuna  
Lagi peurmulaan bak hakikat  
Jeuet wajeb that nyan umpama

Alham dulillah keusudahan  
Nibak peurbuatan nyoe seumporna  
Nyakni pujoе seukalian  
Milek Tuhan dum barangna

Nyankeuh nama peurmulaan  
Pujoе Tuhan nyang seumporna  
Ase beureukat Tuhan neubri  
Nyang na turi ngon saidina

Lheueh nibak nyan seulawuet keu Nabi  
Sahbat ngon ali ban sineuna  
Seureuta do'a umi ngon abi  
Seureuta syekhi dum barangna

Lon mohon tulong bak halarat  
Beu troh hajat faki hina  
Kareuna calitra sangat indah  
Diwa Akah Cahya Mangindra

Bak ek tamat ulon surat  
Kareuna sahbat galak raya  
Hikayat nyoe nan "Diwa Akah"  
Nyang that meugah ngon peurkasa

Lon mohon tulong nibak Allah  
Bak ek sudah ya Rabbana  
Kareuna calitra sangat indah  
Diwa Akah Cahya Mangindra

Bak jameun nyan sangat meugah  
Rupa indah sangat peurkasa  
Asai indra di raja nyan  
Dudoe ensan manusia

Seugala jen pari mambang  
Dum seukalian indra jindra  
Amma Bakdu dudoe nibak nyan  
Nyoe karangan saboh raja

Diwa Laksana,geurasin nan  
Akan raja nyan manusia  
Rupa indah that samlakoe  
Keurajeuen di nanggroe Martagangsa

Cukop deungon wadi meuntroe  
Dalam nanggroe poteu raja  
Nanggroe aman that meusyeuhu  
Barat timu keunan teuka

Peukan rame kon sigeutu  
Meu'u'-u dagang ngon Cina  
Hukom ade sidek sasat  
Han tom rakyat teuaniaya

Raja taklok timu barat  
Wase jiintat jeuep-jeuep masa  
Raja gagah that beurani  
Dan lagi samlakoe rupa

Mulot maneh hana sakri  
Raja doli that bahgia  
Diwa Laksana hana bandeng  
Troh nanggroe jen cit geuthee na

Soe nyang kalon hate ngeuren  
Raja laen meunan hana  
Cukop kuta ngon' meuligoe  
Sidroe putroe judo raja

Nyanpi indah hana bagoe  
Sambinoe hana sapat na  
Elok pareh hana lawan  
Asai putroe nyan di antara

Kareuna asai Darakat Indran  
Patot padan deungon raja  
Kulet puteh ban keululu  
Muka buju seudeurhana

Sambinoe jroh bungong meulu  
That sikufu deungon raja  
Meunyan eungkot nyankeuh asam  
Meunyan agam nyankeuh dara

Ateueh patot that mupadan  
Sulotan ngon putroe muda  
Lom ngon gasehpi han bagoe  
Tuan putroe deungon raja

Hana jarak meung siuroe  
Samlakoe gaseh that meusra  
Umu baro limong blah thon  
Meualon cahya ie muka

Beukit taeu sang bek tatren  
Cut ampon mameh han tara  
Poteu raja gaseh han ban  
Lam seunangan rok-rok masa

Han tom siblet muka masam  
Meulaenkan nyang mameh saja  
Mandu Diwi nan geurasi  
Judo doli putroe muda

Akai jroh that putroe siti  
Meureundah diri nibak raja  
Raja gaseh hana bagoe  
Kareuna putroe jroh that rupa

Dum dendayang lam meuligoe  
Sinaroe jigaseh rata  
Uleh jroh that pie budoe  
Baranggasoe that mulia

Raja gaseh hana bagoe  
Sebab putroe jroh that bahsa  
Salah bacut keudukaan  
Sulotan aneukneu hana

Agampi tan inongpi han  
Nyankeuh jalan ate duka  
Rab lhee ploh thon umu sampoe  
Aneuk sidroe gohlom nyata

Nyankeuh syugoi raja nanggroe  
Maken sampoe umu tuha  
Akhe mate ulon sidroe  
Soe nyang gantoe mat neuraca

Meunan ingat raja nanggroe  
Layak sampoe bak ie muka  
Sebab neudeungo firman Tuhan  
Dalam Quran nyang mulia

Almalu wal banun zinatan  
Hayatid dunya  
Areuta ngon aneuk keu peurasan  
Udep teelan dalam donya

Keuhana nyan keurugian  
Keuaselan han seumporna  
Neumupakat deungon esteuri  
Geutanyoe pakri aneuk hana

Tameu kaoi hai putroe ti  
Kadang neubri aneu kteu na  
Yoh nyan putroe kaoi jihah  
Ngon seudeukah jikaronya

Deungon tulong nibak Allah  
Aneuk lidah keu lon beu na  
Meunan sabé tiep-tiep uroe  
Raja ngon putroe lakee do'a

Goh mustajab deungon sampie  
Raja nanggroe ate duka  
Bak siuroe beurangkat sulotan  
Bale keumang duek bak tahta

Meuntroe wadi uleebalang  
Ngadap sulotan poteu raja  
Mangkubumipi na sajan  
Seukalian kali bentara

Bahwa raja duek seumayam  
Sapeuepi tan jatoh sabda  
Mangkubumi kalon macam  
Sang-sang masam poteu raja

Peukek seumbah yoh masa nyan  
Ampon laman ya sripada  
Patek kalon bak lakuan  
Nibak bangon sang beurcinta

Nibak bangon laen nyoe sang  
Siulahan duka cita  
Peue bu sebab ya junjongan  
Na salahana kamoe nyang na

Beukit nyang na he junjongan  
Harap laman ampon beu na  
Ban neudeungo haba meunan  
Teusinyom yoh nyan poteu raja

Seureuta neukheun meunoe bagoe  
Wahe meuntroe ngon bentara  
Hana salah nibak kamoe  
Asoe nanggroe ban sineuna

Ulon ingat keu untong droe  
Aneuk kamoe saboh hana  
Beukit mate ulon sidroe  
Soe nyang gantoe mat neuraca

Mat keurajeuen ngon khazanah  
Takot muminah laen bangsa  
Nyankeuh ate lon that gundah  
Bukon salah bandum gata

Meunan sabda raja doli  
Mangkubumi le beurkata  
Deelat ampon meuribee kati  
Di yup gaki harap mulia

Hareuem meuseumbah bangsa laen  
Meukon junjongan punya bangsa  
Nibak tuanku salen-malen  
Nyang saboh tren ngon meukuta

Meunan tuanku cinta hajat  
Tuhan halarat peutroh pinta  
Lheueh nyan sabda raja deelat  
Yue krah leugat nujum dumna

Singoh beungoh pukoi lapan  
Beu troh datang keunoe dumna  
Lheueh neukheun nyan le sulton  
Beurangkat pulang u istana

Mangkubumi yue le ureueng  
Jak tueng nujum ban sineuna  
Singoh beungoh uroe siang  
Nujum datang dum barangna

Bak baginda nyang sulotan

Bale keumang ka seunia

Jingadap le uleebalang

Seukalian cit hade ka

Nujumpi troh keunan sampie

Geubet jaroe geudeelat raja

Deelat ampon payong nanggroe

Kamoe sampie siri sabda

Nibak raja turon titah

Neupeugah bak nujum dumna

Wahe nujum taseuleuh

Tamupayah bandum gata

Cuba kalon dalam kitab

Deungon hisab eleumee gata

Ulonteu nyoe that meularat

Ek meundapat lagi putra

Ek na aneuk ulon sidroe

Nyang jeuet gantoe mat neuraca

Na deungon tan tahareutoe

Cuba jinoe tapareksa

Seumbah nujum deelat ampon

Patek seuon ban nyang sabda

Yoh nyan nujum mutala'ah

Buka pantah kitab raya

Fon jilob surat latifah

Bak silsilah raja raja

Teuma jikalon nibak bintang

Jiriwang bak punca indra

Ubak sa'at lom jipandang

Keulaheran sinan nyata

Putoh eleumee nujum dapat

Guyang leugat ngon keupala

Teuma geutop le ngon kitab  
Seumbah deelat po meukuta  
Deelat ampon payong nanggroe  
Aneuk sidroe Tuhan karonya

Aneuk agam that seureuloe  
Samlakoe hana sapat na  
Gagah sakti ngon beurani  
Dum jituri jeuep-jeuep donya

Abeh neuhukom jen ngon pari  
Dum barangri mambang indra  
Bandum raja dalam geunggam  
Sabohpi tan le kreueh jungka

Akan teutapi syahi alam  
Neutupeue tan lahe aneukda  
Rabpi tan jeuohpi tan  
Cit ka imeunan Tuhan kada

Meulaenkan akhe teuma dudoe  
Baro neuwoe bak meukuta  
Hingga seunang bandum nanggroe  
Dalam jaroe paduka aneukda

Raja deungo haba nujum  
Ka teusinyom poteu raja  
Ate suka hana macam  
Aneuk agam neudeungo na

Yoh nyan nujum neubri salen  
Ban lakuan ala kada  
Seureuta ngon ureueng laen  
Maseng-maseng ban nyang jeumba

Neubri seudeukah ngon khanduri  
Seugala faki lakee do'a  
Lakee seujahtra nibak Rabbi  
Raja doli beu seumporna

Neubri salen uleebalang  
Meuntroe sajan ngon bentara  
Bandum rakyat keusukaan  
Sebab sulton han le duka

Raja tinggai di meuligoe  
Deungon putroe meuseusuka  
Ngon dendayang dum sinaroe  
Ngadap putroe deungon raja

Poteu raja suka ate  
Hana tom cre deungon raja  
Uroe malam sapat sabe  
Gaseh ate silagoina

Teukeudi Allah teuma dudoe  
Hame putroe Mandu Diwa  
Bit ka dumnan ulah bagoe  
Hana sidroe tupeue bahsa

Di rajapi han neutuban  
Putroe intan pruet ka raya  
Meulaenkan leubeh gaseh sayang  
Han neutuban dumnan bala

Lagi bandum ngon dendayang  
Putroe nyan ban jithee hana  
Kareuna pruet gohлом jalan  
Hana waham dum ban nyang na

Teutap 'oh nan dilee putroe  
Laen jinoe lon calitra  
Seubeurmula teuma dudoe  
Saboh putroe jen raksasa

\*\*\*

## II. DIWA SEUNDARI PEURUPA DROE LAGEE PEURUMOH RAJA

Diwa Seundari nama geuhe  
Buket Niloi teumpat tapa  
Dalam nujum ka jipandang  
Akan sulotan Diwa Laksana

Elok pareh hana lawan  
Seubaek ensan atueuh donya  
Rupa indah hana bagoe  
Keurajeuen nanggroe Martagangsa

Hana bandengpi meung sidroe  
Jeuep-jeuep nanggroe han sapat sa  
Sang jikalon dalam lumpoe  
Samlakoe Diwa Laksana

Jen raksasa yo le asoe  
Beu jeuet keu lakoe Diwa Laksana  
Meuhan kuteumeung kutueng ensan  
Kuudep han dalam donya

Jibeudoh le yoh masa nyan  
Jipeuseunang u Martagangsa  
Jitamong le saboh taman  
Duek sinan bak tubarasa

Bahwa sunggoh po taman nyan  
Putroe intan Mandu diwa  
Diwa Seundari teutap sinan  
Dalam taman yup tubarasa

Jinoe putroe lon karangan  
Nyang geuboh nan Mandu Diwa  
Bak siuroe putroe intan  
Jak u taman meuseusuka

Jireng dum le dendayang  
Ban lagee nyan miseue nyang ka  
Ngon peungasoh bandum sajan  
seukalian bita peurira

'Oh sare troh dalam taman  
Maneh han ban jatirasa  
Pot ngon bungong macam-macam  
Lingka kulam dum geupula

Pajoh deungan buah-buahan  
Maneh han ban jatirasa  
Lheueh nibak nyan marit putroe  
Jak tamanoe nak tagisa

Sang ka seupot ulah bagoe  
Mangat tawoe ka rab seunja  
Lheueh nibak nyan tren jak manoe  
Sinaroe dendayang dumna

Meulangue-langue keudeh keunoe  
Dalam kulam sangat subra  
Diwa Seundari jimeusilee  
Di yub kayee tubarasa

Jipeulheueh eungkot saboh kawan  
Lam kulam nyan jipeurupa  
Ka jipagap le dendayang  
Putroe sajan let seureuta

Lale ngon nyan dalam kulam  
Uroe peutang ka rab seunja  
Bak masa nyan Diwa Seundari  
Jibeureunti yup seureuba

Ija putroe Mandu Diwi  
Ka jicue le dum jituka  
Putroe keunan troh peureugi  
Ija han le ka jituka

Cit ijajih nyang na sinan  
Putroe yoh nyan masam muka  
Neukeumeung kheunpi han jeuet le  
Keunong sihe jen raksasa

Dum dendayang han jipakoe  
Nyan sa putroe ka lam bala  
Di jih laloe dum' peugot droe  
Jalang bisoe tan seutia

Putroe teudong han habaran  
Dum pakaian ka jituka  
Abeh jicok ija lasam  
Ija padang nostalia

Diwa Seundari ngui pakaian  
Han ubah ban putroe muda  
Seureuta jikheun meunoe macam  
Hai kak dayang jak tagisa

Uroe seupot gadoh peutang  
Jak tariwang u istana  
Teuma ijik dum beurjalan  
Putroe pandang sret ie mata

Putroe tinggai di yup kayee  
Sret meuree-ree ngon ie mata  
Di dendayang hana jithee  
Keunong t.pee jen raksasa

Keupeue guna dum dendayang  
Sidroepi tan nyang seutia  
Nyankeuh po cut tameurakan  
Nyang na sajan budoe bahsa

Nyang na akai ngon pikeran  
Ngon sipatan kira-kira  
Udep mate jitem sajan  
Na deungon tanpi jirela

Bek meurakan ngon binatang  
Jitupeue han rugoe laba  
Kareuna adat bak binatang  
Tuntutjih nyan peuet peukara

Peurtama minom keudua makan  
Eh tidoran lhee peukara  
Teuma nyang peuet jimeuagam  
Nyankeuh teelan nyang jimita

Seubuleh-buleh geutanyoe ensan  
Bukon dumnan tausaha  
Nyankeuh miseue rakan putroe  
Hana sidroe nyang beurguna

Tueng ibarat he po cut droe  
Baranggasoe nyang beurnama  
Lheueh nibak nyan haba nyang toe  
Leugat jiwoe jen raksasa

Dendayang ireng dum sinaroe  
Jisangka putroe Mandu Diwa  
Hana jitheepi meung sidroe  
Jalang bisoe tan bicara

Diwa Seundari ka troh sampoe  
U meuligoe jiek lanja  
Leugat jiduek bak keurusi  
Nyang meuhambo ngon peurmata

Na sikeujap duek beureunti  
Jitamong le dalam kama  
Seureuta jikheun bak dendayang  
Ulon mumang saket keupala

Jitamong lam peuraduan  
Inong setan le bicara  
Na sikeujap dudoe nibak nyan  
Tamong sulotan Diwa Laksana

Neueu putroe di sinan tan  
Bak dendayang neupareksa  
Hai ma inong hoka putroe  
Hana sinoe lon eu rupa

Dendayang kheun jibet jaroe  
Tuan putroe saket keupala  
Ka neutamong lam peuraduan  
Cit baro ban po meukuta

Raja deungo kheun dendayang  
Neutamong rijang lam tiree rawa  
Ban sare troh lam keuleumbu  
Neubeuradu sapat dua

Peue nyang hajat peugot laju  
Sigeutu hana pareksa  
Hana sidek deungan sasat  
Meugriet that keudeh neuraba

Hana sabapi meung siat  
Meukarat that lop lam kuta  
Sebab hana beursalahan  
Ngon cut intan Mandu Diwa

Hana sidek bak sulton  
Neukuran han jan meusua  
Diwa Seundari mangat ate  
Sang mise dapat syeureuga

Troh ban hajat jimeuate  
Troh ban ase ban jipinta  
Jimeuhajat yoh di nanggroe  
Beu jeuet keu lakoe Diwa Laksana

Tuhan neu bri hajat sampoe  
Jen pindoe suka teurtawa  
Bahaha sunggoh raja nanggroe  
Nyokeuh putroe bak neusangka

Han neutupeue meunan bagoe  
Jitipee nyoe le raksasa  
Nyang ase buet cit ka dumnan  
Kheundak Tuhan zat nyang Esa

Jadi teutap raksasa nyan  
Ngon sulotan ate suka  
Seubeurmula teutap 'oh nan  
Karangan laen lon meugisa

\*\*\*

### III. RAJA HANA GEUTUPEUE ANEUK KA LAHE

Mandu Diwi putroe intan  
Tinggai sinan yup tubarasa  
Putroe saba bala datang  
Pujoet Tuhan hana reuda  
  
Hingga uroepi ka malam  
Eh di sinan yup tubarasa  
Neupeujok droe ubak Tuhan  
Ngon seupot klam hana tara  
  
Sayang putroe beurtangisan  
Bineh kulam eh teurhanta  
Ka jitek boh le dendayang  
Sabohpi tan nyang seutia  
  
Bak masa nyan tuan putroe  
Ingat këudroe sayang raya  
Hokeuh lon jak kaman jinoe  
Ho troh kamoe ya Rabbana  
  
Hingga teuma beungoh uroe  
Tuan putroe beudoh sigra  
Neujak leugat teuma dudoe  
Dalam nanggroe leugat neuhala  
  
Bak neujak nyan singkat langkah  
Sang han leupah putroe muda  
Euncit han tom rasa payah  
Putroe indah sret ie mata  
  
Hajat putroe neupeureugi  
Mangkubumi keunan neuhala  
Meunan hajat putroe siti  
Neupeureugi keunan sigra  
  
Treh putroe bak babah pinto  
Teudong tahe hana haba  
Na sikeujap bri Tuhanku  
Teubiet laju inong tuha

Inong tuha keunan sampoe  
Jieu sidroe inong muda  
Bukon 'ajab hana bagoe  
Hireuen keudroe datok tuha

Yoh nyan putroe neukheun meunoe  
Deungo kamoe he ma raja  
Tatulong lon ma uroe nyoe  
Gata jinoe lon seuraya

Tajak he ma bak mangkubumi  
Narit tame nyang seujahtra  
Takheun jeh pat sidroe jamee  
Geumeung meuteumee deungon gata

Meunan takheun ma pangulee  
Tatulong kee hai ma raja  
Inong tuha le peureugi  
Bak mangkubumi troh le lanja

Ban troh keunan horeumat geubri  
Geupeugah le deungon haba  
Ya mangkubumi sidroe ureueng  
Hajat meuteumeung deungon gata

Ubak ulon geuyue jak kheun  
Harap meuteumeung deungon gata  
Mangkubumi deungo meunan  
Neujak yoh nyan le pareksa

Ban troh keunan mangkubumi  
Han neuturi putroe muda  
Teurlalu 'ajaeb hana sakri  
Mangkubumi hana haba

Teuma marit tuan putroe  
He mama droe pakon lupa  
Hana neuturi ulon sidroe  
Ulon putroe Mandu Diwa

Mangkubumi that teukeujot  
Putroe neusambot neupeumulia  
Pakon meunoe wahe po cut  
Peue salah buet po meukuta

Yoh nyan putroe neupeugah ban  
Lon jitawan le raksasa  
Abeh jicok dum pakaian  
Lon keumeung tham hana suara

Jih ka leupah u meuligoe  
Sinaroe dendayang jiba  
Ulon tinggai sinan sidroe  
Lon jak keunoe bak mamanda

Beukit meunan he pangulee  
Lon jak bri thee ubak raja  
Bahaha sunggoh ka jitipee  
Buet asee inong raksasa

Seuot putroe neukheun meunoe  
Deungo kamoe he mamanda  
Bek neubri thee bak uroe nyoe  
Malee kamoe hana tara

Jih ka neutueng keu esteuri  
Malee keuji lon bak raja  
Kala kada ateueh kami  
Ulon pakri he mamanda

Meuna untong deungon tuah  
Tuhan balah nyang seujahtra  
Nyang jinoe bek le neupeugah  
Simpan keubah lam rahsia

Jikalee an gaseh sayang  
Lon numpang sajan mamanda  
Rahsia bek neulaheran  
Neusimpan di dalam dada

Mangkubumi deungo meunan  
Puwoe yoh nyan putroe muda  
Bak esteuri neupeugah ban  
Nyoe cut intan Mandu Diwa

Abeh neupeugah seukalian  
Neuyue simpan bek teubuka  
Bak peurumoh mangkubumi  
Putroe siti that mulia

Deungon teumpat laju geubri  
Ban seupeurti adat raja  
Seureuta geubri ngon dendayang  
Sileungkapan ban sikada

Geubri teumpat peuraduan  
Na miseue ban istana raja  
Cukop dumpeue seukalian  
Han sapeue tan miseue nyang ka

Sangat gaseh mangkubumi  
Ngon esteuri sama-sama  
Geunap uroe geupadoli  
Dumpeue geubri cukop ada

Syahdan pula ulon seubot  
Keu putroe cut Mandu Diwa  
Yoh nyan putroe ka raya pruet  
Ayah seubot ate geunta

Akan esteuri mangkubumi  
Jisudi bak putroe muda  
Pakon cut pruet meunjadi  
Tapeugah kri soe keurija

Yoh nyan putroe khem teusinyom  
Seureuta neu kheun meunoe haba  
Masa keunong bak jen hewan  
Dua bulan ka tan masa

Mangkubumi deungo meunan  
Pruet le yoh nyan neuyue raba  
Lahe nyata pruet lhee buleuen  
Ban nyang neukheun han meuriba

Mangkubumi keusukaan  
Nyo sulotan punya putra  
Seureuta neukheun he junjongan  
Na neutuban uleh raja

Seuot putroe neupeugah ban  
Sulotan neutupeue hana  
Di dalam nyan mangkubumi  
Putroe siti neupeulara

Peue nyang hana neuyue cari  
Dumpeue neubri sianeka  
Miseue adat lam meuligoe  
Meunan sinoe neukeurija

Neukrah ureueng dalam nanggroe  
Lam neumat droe maharaja  
Jak seumanoe tuan putroe  
Miseue bak droe kureueng hana

That mulia hana bagoe  
Tuan putroe mandu Diwa  
Hingga cukop buleuen sampoe  
Tuan putroe pruet that raya

Jimeujaga dum sinaroe  
Keumiet putroe Mandu Diwa  
Trok kutika nyang beureukat  
Nibak sa'at nyang seumporna

Tuan putroe saket leugat  
Bri halarat budak nyata  
Teungoh beukah matauroe  
Tuan putroe aneuk ka na

Lahe aneuk ureueng lakoe  
That seureuloe elok rupa  
Lang geumilang beurcahyaan  
Miseue ban buleuen purnama

Jisambot le uleh bidan  
Seureuta sajan ngon sempeurna  
Beu Tuhan bri akhe dudoe  
Neumat nanggroe gantoe ayahda

Lheueh nyan jiboh le ngon tumpe  
Jipume-me aneuk raja  
Troph peurumoh mangkubumi  
Geusambot ie peumulia

Keudeh siat keunoe siat  
Peutroh adat reusam maja  
Beu Tuhan bri leubeh pangkat  
Aneuk deelat mu bahgia

Na sikeujap troh keumbali  
Mangkubumipi keunan ka  
Neueu manyak that juhari  
Neusambot le ate suka

Mangkubumi ate galak  
Neueu budak jroh that rupa  
Elok pareh that meusigak  
Hana parak ban ayahda

Meusigeutu hana ubah  
Sang ayah Laksana Diwa  
Mangkubumi galak leupah  
Khem meuhah-hah ate suka

Ka neutanyong ubak putroe  
Tuanku soe taboh nama  
Peue nyang seunang neuhareutoe  
Uroe nyoe lon rasi nama

Yoh nyan putroe teuma seuot  
Peue nyang patot bak mamanda  
Salah beuna ulon ikot  
Meuseuki karot syuko hamba

Mangkubumi deungo meunan  
Neukheun yoh nyan pantah sigra  
Cut Diwa Akah lon rasi nan  
Lakab timbangan Cahya Mangindra

Beu Tuhan bri dalam iman  
Ngon seunangan pangkat 'ala  
Tuan putroe ate seunang  
Sipatot ban deungon rupa

Ateueh patot that neuboh nan  
Sigeutu han meumbri cidra  
Lheueh nibak nyan mangkubumi  
Neuteubiet le nyan u lua

Neubri seudeukah dum keu faki  
Lakee bak Rabbi nyang seujahtera  
Seugala 'alem deungon syiah  
Neubri seudeukah tuha muda

Neulakee do'a keu Diwa Akah  
Cuco lon sah beu mubahgia  
Seugala 'alem dum leueng jaroe  
Keu samlakoe beu seujahtera

Tulong Tuhan do'a sampoe  
Ase samlakoe leugat raya  
Maken rayek ho siuroe  
Mangat asoe sehat raya

Ho siuroe rayek leugat  
Aneuk deelat indah rupa  
Soe nyang kalon galakji that  
Bit that cakap hana tara

Mangkubumi that bit galak  
Han jeuet jarak siklep mata  
Baro bah ban jeuet neutinjak  
Maken rancak sang cempala

Mangat ate tuan putroe  
Neueu samlakoe bijeh mata  
Lale ngon nyan tuan putroe  
Tuwo keu lakoe Diwa Laksana

Mangkubumi that neugaseh  
Neubri peungasoh nyang seumporna  
Neuyue peugot saboh taman  
Teumpat maenan aneuk raja

Leungkap deungon buah-buahan  
Han sapeue tan neuyue pula  
Seugala bungong na di sinan  
Geuboh jeumbangan batee kaca

Bak teumpat putroe neujak meuen  
Sajan-sajan ngon aneukda  
Di teungoh taman kulam saboh  
Geuturab jroh batee kaca

Kaca puteh kaca mirah  
Bukon indah hu meucahya  
Di bineh kulam saboh bale  
Meuh meudeune ngon suasa  
  
Beukit taeu that beureuhi  
Jroh han sakri mupeurmata  
Bubong nibak teumaga mirah  
Meujeureulah hu meucahya

Hana bandeng rupa indah  
Teuhah babah soe ngieng rupa  
Nyankeuh teumpat tuan putroe  
Ngon samlakoe banta muda

Keunan neujak geunap uroe  
Seupot neuwoe ngon rab seunja  
Diwa Akah nyanpi ka ragoe  
Neuyue jinoe jak beulaja

Fon-fon neuyue beuet Quran  
Tulong Tuhan jeuet le lanja  
Han padum trep sudah khatam  
Aneuk sultan sangat pinta

Abeh Quran neubri kitab  
Abeh jeuep bab ka neubaca  
Ase neufram ngon sikeujap  
Makna kitab dum seumporna

Jak meurunoe eleumee puprangan  
Asepi nyan sikutika  
Taki-maki lam puprangan  
Talo meunang jeuet neukira

Pumeuen peudeueng deungon tumbak  
Buet meutak-tak di ateueh guda  
Nyanpi utoh sudah bijak  
Sangat rancak aneuk raja

Soe nyang kalon teuhah babah  
Cut Diwa Akah sangat pinta  
Bit nyo cuco mangkubumi  
That ugahri bijaksana

Dum peundita teukab bibi  
Ngon mangkubumi jibeurkata  
Teungku ampon deungo kamoe  
Cuconeu nyoe leubeh pinta

Hana lawan le di sinoe  
Bak sa'at nyoe meunang rupa  
Mangkubumi deungo meunang  
Keusukaan hana tara

Neubri seudeukah le di sinan  
Lakee bak Tuhan nyang seujahtra  
Dum ulama deungon syiah  
Keu Diwa Akah lakee do'a

Tuhan teurimong do'a syiah  
Fahla seudeukah kabui do'a  
Cut Diwa Akah nyang samlakoe  
Neujak neuwoe deungon bunda

Jak u taman geunap uroe  
Ngon rakan droe ireng sama  
Troph u taman sumpit bungong  
Keunong bandum pat-pat nyang na

Cut Diwa Akah nyang bangsawan  
Jak u taman jeuep kutika  
Beungoh neujak seupot neuwoe  
Ngon bunda droe Mandu Diwa

Seunang ate tuan putroe  
Keu lakoe han le neukira  
'Oh na aneuk nyang samlakoe  
Cukop sampoe dum peukara

Di putroe ngon aneuk agam  
Di sultanan ngon raksasa  
Nyankeuh neuuem uroe malam  
Neutupeue tan jen raksasa

Pihak utak hana jalan  
Bah sultanan raja raja  
Padumna trep geueh sajan  
Pakri ban han peunyum rasa

Bahwa sunggoh beutoi sajan  
Bak lakukan deungon rupa  
Dari hai bak peurasaan  
Beursalahun dum hana sa

Pakri sinan tan timbangan  
Nyo raja nyan akai hana  
Akan teutapi nyang aselan  
Ngon grak Tuhan dum barangna

Hana daya jen ngon ensan  
Meulaenkan ban grak Rabbana  
Bitpi lon kheun meudeh meunoe  
Ase kamoe jeuet upat ceula

Lon harap keu Tuhan sidroe  
Ampon kamoe deesya nyang ceula  
Lom meugisa ubak bunoe  
Samlakoe dua ngon bunda

Teukeudi Allah bak siuroe  
Samlakoe peugah bak bunda  
Idin bunda lon jak meuen  
Ubak tamān teumpat nyang ka

Lon jak siat lon woe rijang  
Han jan peutang troh lon gisa  
Seuot putroe beukit meunan  
Tajak kaman bijeh mata

Bek trep tawoe wahe intan  
Keususahan ate bunda  
Cut Diwa Akah seumbah umi  
Tren peureugi yoh nyan sigra

Ngon peungasoh kanan kiri  
Nyang juhari sabe muda  
Troh u taman neupeureugi  
Grak teukeudi Tuhan Esa

Leumah neueu ureueng sidroe  
Ngon aneuk droe sajan jiba  
Aneuk manyak tingkue keudroe  
Neutanyong soe uleh banta

Cut Diwa Akah tanyong rijang  
Bak dendayang nyang seureuta  
Wahe kakak ngon mak inong  
Lon teumanyong ubak gata

Tapeugah soe jeh geudukong  
Dan nyang geudong takheun nama  
Teuma seuot dum dendayang  
Jikheun rijang ngon sibeuna

Nyang jidukong meuhat aneuk  
Nyang meumbawak bapak nama  
Nyan tuanku nyang mustahak  
Meuhat bapak me aneukda

Cut Diwa Akah deungo meunan  
Pike le nyan leumah sigra  
Nibak lagee ulon kalon  
Di kee pakon tan ayahda

Meunan ingat po samlakoe  
Leugat neuwoe troh bak bunda  
Leugat neusujud ubak teuot  
Seureuta sret ngon ie mata

Ateueh ulee jaroe neubet  
Deungon patot kheun bak bunda  
Wahe bunda ma lon putroe  
Neupeugah soe ayah hamba

Rindu deundam lon han bagoe  
Di ulon soe nan ayahda  
Putroe deungo haba meunan  
Putroe yoh nyan duka cita

Teuka sosah hana macam  
Sret le mufram ngon ie mata  
Seureuta neukheun he samlakoe  
Han ayah droe nyan di gata

Bit nan aneuk gata sidroe  
Tan barangsoe judo bunda  
Astaghfirullah leugat neukheun  
Ngon teusinyom maneh muka

Salang bak u ngon bak pineung  
Na cit bandum ureueng pula  
Nyoe geutanyoe nyang makhluk  
Meuna aneuk na ayahda

Hai ma bak lon narit patot  
Neukheun beu trok bapak hamba  
Putroe deungo narit meunan  
Beurtangisan sret ie mata

Cut Diwa Akah neumoe sajan  
Neutanyong ban hana tara  
Putroe neumoe hana kureueng  
Peiduek bak leumueng bijeh mata

Sira neuwa sira neucom  
Bungong tanjung bek le rugha  
Taiem keudeh bungong geutoe  
Gata sidroe tan ayahda

Lon meuaneukpi cit sidroe  
Tan barangsoe na seureuta  
Cut Diwa Akah deungo meunan  
Neumoe yoh nyan lagee raya

Meugule-gule bak ribaan  
Miseue pangsan taeu rupa  
Putroe kalon meunan macam  
Bak dendayang neukheun sigra

Jak leh katueng mangkubumi  
Ngon estueri nyan bandua  
Dendayang plueng le peureugi  
Mangkubumipi troh teuka

Sajan-sajan ngon esteuri  
Ka neuduek le sapat dua  
Putroe peugah keu Cut Diwa Akah  
Jumoe limpah sare rugha

Jitanyong bak lon nyang toh ayah  
Pakri lon peugah droe cit hana  
Cuconeuh tanyong nibak ulon  
Beungoh kon fon troh 'an jula

Nyankeuh jinoe ban nyang hukom  
Nibak ulon eleumee hana  
Teuma marit mangkubumi  
Bek kiam le bijeh mata

Ulon keu bapak he boh ate  
Cuco bek le kian rugha  
Cut Diwa Akah deungo meunan  
Ulon iem han ya nenekda

Ayah ulon neupeugah nan  
Baro seunang ate hamba  
Meuhan neupeugah nek teungku droe  
Ulon boh droe dalam rimba

Bahle jikap uleh rimueng  
Meuhan neukheun nama ayahda  
Hanco luloh ate putroe  
Neungo samlakoe meunan beurkata

Neuwa neucom hana padoe  
Tuan putroe beukah rasa  
Mangkubumi kheun le pantah  
Tuanku peugah ngon sibeuna

Han jeuet lon kalon sayang leupah  
Peue faidah han tabuka  
Yoh nyan putroe hana daya le  
Han neutukri som rahsia

Teuma neupeugah dum peurbuatan  
Fon bak uram asai mula  
Abeh tamat seukalian  
Hingga tamam abeh nyata

Cut Diwa Akah deungo meunan  
Neuiem yoh nyan han le rugha  
Ubak bunda teuma neukheun  
Idin lon simpan inong raksasa

Han jeuet meunan aneuk meutuah  
Marah ayah nyan keu gata  
Kareuna jih neugaseh leupah  
Meuhat salah bijeh mata

Kareuna jih leubeh neugaseh  
Han neupateh gata aneukda  
Ngon sebab nyan jeuet keu paleh  
Pike abeh hai aneukda

Ureueng nyang le han geutuban  
Gata intan aneuk raja  
Meunan nyang jroh lon pikekan  
Saba hai intan Cahaya mata

Cut Diwa Akah deungo meunan  
That beunaran nyan kheun bunda  
Cut Diwa Akah leumah pikeran  
Bahle kaman got kubungka

Bahle kujak kuboh nanggroe  
Kadang soe-soe tem seureuta  
Deungon tulong Tuhan sidroe  
Kadang sampoe hajat hamba

Meung hana pueh keumaluan  
Deumi Tuhan han kugisa  
Cut Diwa Akah pike meunan  
Neukheun yoh nyan ubak bunda

Idin bunda lon seukarang  
Lon beurjalan dalam rimba  
Lon jak mita gaseh sayang  
Ubak mambang pari diwa

Putroe deungo nyan habaran  
Reubah pangsan pantah sigra  
Cut Diwa Akah sambot rijang  
Neumueng yoh nyan ulee bunda

Peurumoh mangku beudoh rijang  
Jisiram ngon ie peunawa  
Putroe beudoh han pangsan le  
Neuwa bak lihe bijeh mata

Wahe aneuk tangke ate  
Pakri tacre tinggai bunda  
Allah hai aneuk jantong badan  
Tabeurjalan dalam rimba

Tatinggai ma lam meulang-lang  
Lakoepi tan aneukpi hana  
Adat na lakoe ka gop rampah  
He ya Allah ho troh hamba

Jinoe aneukpi ka leupah  
Aneuk lidah di lon hana  
Mangkubumi ngon esteuri  
Com di gaki banta muda

Ho hai cuco tapeureugi  
Nek nyoe pakri sudah tuha  
Bandua droe klik meu'i-i  
Ngon esteuri limpah dada

Fon manyak kon lon pseudoli  
Jinoe pakri tinggai kuha  
Le that macam haba ratoh  
Han ek lon boh panyang raya

Lon tueng saboh nibak siplo  
Mubek putoh sanjak haba  
Cut Diwa Akah neukheun meunoe  
Deungo kamoe he nek hamba

Han ek tanggong peurbuatan nyoe  
Malee kamoe that bit raya  
Hai nek neujok lon bak Allah  
Nyang peurintah langet donya

Nyan bunda lon neuseuleuah  
Cit keuneubah lon bak duha  
Putroe neuwa cit bak lihe  
Neucom sabe hana reuda

Wahe aneuk bungong pade  
Sampe ate tinggai bunda  
Gata aneuk tajak lam gle  
'Oh mate han lon eu mata

Yoh nyan marit Cut Diwa Akah  
Lon beuleupah wahe bunda  
Meuna untong deungon tuah  
Cit pantah keunoe lon gisa

Mangkubumi marit bagah  
Neupeugah bak putroe muda  
Tuan putroe bek le gundah  
Neupeuleupah paduka aneukda

Masa dilee haba nujum  
Patek maklum ban sineuna  
Aneuk tuanku saboh agam  
Hana lawan atueh donya

Abeh taklok pari mam bang  
Seukalian seugala raja  
Hana sidroe nyang ek teuntang  
Dum sulotan taklok dumna

Jinoe neusrah ubak Tuhan  
Seukalian hukum Rabbana  
Neudeungo kheun mangkubumi  
Mandu Diwi ate suka

Ka neusrah ban hukom Rabbi  
Neumat janji Tuhan Esa  
Seureuta neucom dum bak badan  
Kupaban he bijeh mata

Beu neutulong uleh Tuhan  
Keuaselan peue nyang pinta  
Lheueh nibak nyan Cut Diwa Akah  
Neuseumbah bak gaki bunda

Mangkubumipi neuseumbah  
Lakee meuah keumeung bungka  
Cut Diwa Akah neubeurjalan  
Sidroe rakan hana neuba

Habeh jimoe dum gunangan  
Bandum neutham bek jak gata  
Dum dendayang gasehan balah  
Cut Diwa Akah jroh that guna

Putroe neumoe han peue peugah  
Aneuk leupah ka jibungka  
Yoh nyan putroe saba pantah  
Neubri seudeukah dum ulama

Seureuta ngon mangkubumi  
Seudeukah neubri seureuta saba  
Neupeujok ban hukom Rabbi  
Seungap ate han le kubra

\*\*\*

#### **IV. CUT DIWA AKAH JAK MEURANTO**

Seubeurmula deungo jinoe  
Po samlakoe lon calitra  
Tamong uteuen leugat sidroe  
Abeh nanggroe troh lam rimba

Padum uroe jak lam uteuen  
Sapeuepi han na mumara  
Pat nyang seupot neueh sinan  
Singoh teuma lom neu bungka

Padumna trep lam beurjalan  
Troh bak padang Indra Sujana  
Tamong leugat lam padang nyan  
Meuteumeung sinan sidroe nisa

Cut Diwa Akah le neupeurab  
Neudong di nap ureueng tuha  
Neutanyong le ngon su nyang that  
Peugah leugat he nek raja

Atawa jen atawa setan  
Atawa ensan manusia  
Peue buet taduek di teungoh hutan  
Sidroe teelan han seureuta

Inong tuha teukeujot that  
Geudeungo narit manusia  
Ureueng tuha ngieng le leugat  
Trang geulihat muda beulia

Geueu rupa jroh samlakoe  
Hireuen keudroe ureueng tuha  
Na sikeujap hireuen laloe  
Ingat keudroe yoh nyan sigra

Seureuta jikheun he samlakoe  
Gata bunoe tanyong hamba  
Neuseuot le po samlakoe  
Ulon sidroe tanyong gata

Teuma seuot le datok 'nyan  
Bangsa ulon nibak jindra  
Purbadanta geurasi nan  
Nyankeuh tuan nama hamba

Padum masa lon di·sinoe  
Han tom sidroe kalon rupa  
Teukeudi Allah bak siuroe  
Lon deungo bunyoe di antara

Akhe jameun geuhareutoe  
Teuka sidroe manusia  
Cut Diwa Akah geurasi nan  
Aneuk sulotan Martagangsa

Nyang tanom kah akhe zaman  
Cit aneuk nyan laen hana  
Nyankeuh sebab lon duek sinoe  
Muda samlakoe lon preh teuka

Jinoe peue aneuk lon hareutoe  
Tapeugah soe nama gata  
Pakon aneuk taboh nanggroe  
Tajak keunoe peue tamita

Cut Diwa Akah peugah leugat  
Ulon sisat bak let rusa  
Sampoe keunoe troh beurangkat  
Grak halarat meuteumeung gata

Nama ulon Cut Diwa Akah  
Nama ayah Diwa Laksana  
Martagangsa nanggroe nyang sa  
Ka lon peugah nek bak gata

Ureueng tuha seuot pantah  
Patot leupah keunoe teuka  
Meukon aneuk ureueng meusoe  
Han sampoe keunoe talanda

Ulonpi aneuk uroe nyoe mate  
Raseuki han le dalam donya  
Nyoe na peudeueng saboh lon bri  
Peudeueng suami asai mula

Patot gata po pakaian  
Aneuk sultan Martagangsa  
Nyokeuh peudeueng that analan  
Cumehpi han seulama-lama

Meunyo keunong ngon peudeueng nyan  
Udepji han ateueh donya  
Brama Jidra suami lon  
Nyang po peudeueng asai mula

Cut Diwa Akah sambot rijang  
Kon bubarang ate suka  
Meuteumeung peudeueng keusaktian  
Suka han ban muda beulia

Peudeueng jibri jihpi reubah  
Cut Diwa Akah peuintat lanja  
Nafah abeh jihpi leupah  
Cut Diwa Akah le bicara

Neuseumanoe neuboh gafan  
Neuseumbahyang tanom lanja  
Lheueh neutanom neubeurjalan  
Abeh padang gunong raya

Ka neuek cot neutren panton  
Le peue neukalon asoe rimba  
Abeh neueu macam-macam  
Keukayaan Allah Ta'ala

Padum neupoh binatang bueh  
Rusa ngon glueh bek takira  
Neukeu ngon cot neutren geurugoh  
Abeh neubloh alue paya

Uroe neujak malam neudom  
'Oh singoh lom ka neubungka  
That seungsara bungong teuprom  
'Oh takalon sret ie mata

Cut Diwa Akah meungucap syuko  
Neupujoe Po Tuhan Esa  
Neujak leugat le neulalu  
Han sigeutu ate lia

Bak masa nyan tarek uroe  
Po samlakoe sang ka dahga  
Na sikeujap teuma dudoe  
Neukalon nyoe kayee raya

Bakji rampak hana bagoe  
Ka neupeutoe keunan lanja  
Cut Diwa Akah ka troh keunan  
Bak nawang nyan kayee raya

Neueu di yup sang hamparan  
Naleuengpi tan sapeue hana  
Ate mayoh keusukaan  
Pioh sinan sikutika

Mata layoh bak masa nyan  
Eh tidoran teungeut indra  
Seubeurmula jinoe laen  
Na sidroe jen hantu raya

Rupa hebat raya panjang  
Duek bak cabeueng kayee raya  
Lang-lang Daranu jih geuboh nan  
Gagah saktian ngon peurkasa

Nibak idong mubee ensan  
Troph jitamong lam keupala  
U yup kayee le jipandang  
Leumah ensan jieu rupa

Neueh di yup banie kayee  
Hana lagee ate suka  
Ate seunang po jen asee  
Raseukikee ka troh teuka

Sira marit jitren laju  
Lang-lang Daranu galak raya  
Bak uroe nyoe troh ban napsu  
Kupajoh laju manusia

Sira jitren khem meu hah-hah  
Jisuet lidah na sideupa  
Ok bak ulee jroh sileupah  
Hana ubah jiseuon raga

Ngon jideumpek kon bubarang  
Kayee meuguncang meugisa-gisa  
Cut Diwa Akah teukeujot rijang  
Nibak pangsan laju jaga

Nibak neueh neubeudoh dong  
Leumah neu kalon jen that raya  
Deungon hebat raya panyang  
Han tajeuet ngieng nibak muka

Lang-lang Daranu tajo leugat  
Jitangkap muda beulia  
Cut Diwa Akah pru neulumpat  
Seureuta neumat jen meureuka

Nibak ulee neumat kong that  
Abeh hayat kah ceulaka  
Lang-lang Daranu peurasaan  
Kreueh neupeugang hana tara

Kira han lheueh jimeulawan  
Jikheun nyoe ban pantah sigra  
He ureueng muda peul lheueh kamoe  
Tapeugah soe nama gata

Pakri jeuet troh tajak keunoe  
Pane nanggroe peue nan bangsa  
Nama ulon jinoe kupeugah  
Cut Diwa Akah Cahya Mangindra

Diwa Laksana nama ayah  
Nanggroe nyang sah Martagangsa  
Seureuta neukheun he maleu'un  
Jinoe peue kakheun he meureuka

Meunyo hana kaba iman  
Ngon siat nyan kupufana  
Lam sa'at nyoe cit mate kah  
Haram jadah kheun beu sigra

Meuhan ka pujo sidroe Allah  
Han kukeubah kah ceulaka  
Lang-lang Daranu seuot yoh nyan  
Lon ba iman he meukuta

Bahwa sunggoh sidroe Tuhan  
Han bilangan sa ngon dua  
Seureuta Nabi peusurohan  
Lon ba iman dum anbia

Seureuta harap neupeulheueh lon  
Neupeiampone dumna deesya  
Ho nyang neujak neuba ulon  
Tuanku ampon yakin hamba

Lheueh jikheun nyan Lang-lang Daranu  
Peulheueh laju yoh nyan sigra  
Teuma jisujud Lang-lang Daranu  
Ampon tuanku patek hamba

Cut Diwa Akah suka ate  
Seubab kafe masok agama  
Lang-lang Daranu jimarit le  
Harap doli minta peursila

Harap langkah tuanku ampon  
Bak rumoh lon po meukuta  
Neuseuot le patot lon jak  
Kareuna bapak lon seubot gata

Kareuna ulon ka jeuet keu aneuk  
Patot lon jak ubak bapa  
Cut Diwa Akah le beurjalan  
Sajan-sajan ngon jen rimba

Deueh neukalon dalam padang  
Saboh rangkang cut lagoina  
Geujak leugat le beurjalan  
Trok bak rangkang keunan lanja

Lang-lang Daruna beurkataan  
Tinggai junjongan siklep mata  
Patek bri thee ubak ibu  
Deelat tuanku patek bawa

Cut Diwa Akah seuot laju  
Pulang dulu wahe bapa  
Lang-lang Daranu jiwoe leugat  
Trok bak teumpat laju sigra

Ban sare troh nyan bak teumpat  
Beuet hekeumat deungon mintra  
Na sikeujap teuma dudoe  
Rangkang brok nyoe indah rupa

Miseue istana ngon meuligoe  
Dum sinaroe ka hade na  
Panjang rumoh peuet ploh ruweueng  
Ngon peurasan sianeka

Tiree langet keueumasan  
Cawan pingan mupeurmata  
Sifeuet kuluk 'ainul banan  
Bagoe intan hu meucahya

Seukalian dum seuleungkap  
Miseue teumpat raja raja  
Ngon dendayang tari-tari  
Dum ka ase jeuep peukara

Teuma jikheun bak esteuri  
Yue peuase sianeka  
Teuma jak tueng Cut Diwa Akah  
Peutamong leupah u istana

Ban neukalon teuhah babah  
Bukon indah silagoina  
Lang-lang Daranu beurkataan  
Sila junjongan u istana

Cut Diwa Akah duek le rijang  
Bak eumasan patarakna  
Jiduek ngon droe sinan sajan  
Ngadap junjongan bri mulia

Cut Diwa Akah 'ajab han ban  
Neueu peurasan hantu raksasa  
Yoh nyan Diwa Akah pujoet Tuhan  
Neue saktian jen buraksa

Salang makhluk na sidumnan  
Jikalee buet Tuhan leungkap seumua  
Jipeujamee minom makan  
Pioh sinan siuroe dua

Neuduek sinan beursukaan  
Minom makan ban sikada  
Padum uroe neuduek dasyah  
Cut diwa Akah buka haba

Idin keu lon keumeung langkah  
Wahe ayah jen buraksa  
Jiseuot le Lang-lang Daranu  
Ampon tuanku lon beu taba

Han lon tem cre meusigeutu  
Ngon tuanku beursama-sama  
Cut Diwa Akah neukheun meunoe  
Uroe nyoe bek tajak gata

Meuna peue-peue uroe dudoe  
Beu troh sampoe 'oh lon cinta  
Lang-lang Daranu kheun le leugat  
Ampo deelat ban nyang sabda

Seureuta jibri cumboi hekeumat  
Anal an that le peue guna  
Nyoe tuanku keu alamat  
Pajan kasad pangge hamba

Bak cumboi nyoe neuhei laju  
Lang-lang Daranu nama hamba  
'Oh ban sare lon deungo su  
Bak tuanku troh lon teuka

Laen hana peurseumbahan  
Cumboi nilam nyankeuh nyang na  
Kasietji le he junjongan  
Cumboi lon nyan le that guna

Beukit napsu nyan meuligoe  
Ngon siat nyoe ase saja  
Neuseubot ngon nama kamoe  
Jeuet meuligoe deungon kuta

Beukit padang peujeuet keu laot  
Neuseubot ngon nama hamba  
Neutiek cumboi lam padang nyan  
Ase sinan laot raya

Beukit laot jeuet keu padang  
Keuaselan peue nyang pinta  
Nyankeuh guna he junjongan  
Lam cumboi nyan dum keulua

Cut Diwa Akah kesukaan  
Cok cumboi nyan neujak lanja  
Mumat jaroe ngon Daranu  
Neujak laju le neuhalal

Banta hadap nap u timu  
Han sigeutu ate lia  
Abeh padang tamong uteuen  
Badeuek rimueng dum jiguda

Neujak leugat bungong seupeueng  
Rot lam uteuen rimba raya  
Neuek gunong neutren paloh  
Lam geurugah alue paya

Neujak leugat hana pioh  
Tunong baroh han neukira  
Padumna trep neubeurjalan  
Deuh neupandang gunong raya

Nibak jeuoh keulihatan  
Gunong manyang hu meucahya  
Ka teupike bak ate droe  
Peue gunong nyoe hu meunyala

Beukit meunan bah kupeutoe  
Kujak eu peue trang cuaca  
Teuma neujak leugat keunan  
Gaki gunong nyan troh neuhalal

Neueu teumpat indah han ban  
Kayee sinan le that rupa  
Anggo deulimapi le sinan  
Laen tanaman jabet keureuma

Deungon bungong macam-macam  
Harompi ban hana tara  
Batee kuneng panca logam  
Puspa ragam panca warna

Pasi nibak meuh nyang puteh  
Meujeureulah hu meucahya  
'Ajaeb sangat Cut Diwa Akah  
Bukon indah hana ngon sa

Seureuta ngon neupujoe Tuhan  
Keubeusaran Allah Ta'ala  
Teuma neuek le gunong nyan  
Uroe malam neujak lanja

Padum uroe peurjalanan  
Sampoe yoh nyan pucak raya  
Ateueh pucak troh samlakoe  
Neukalon naggroe luah raya

Kuta nanggroe nibak nilam  
Pinto teuhupam nibak suasa  
Meutatah ngon meuh palinggam  
Panca logam siseun lingka

Ban peuet sagoe teudong payong  
Alam sirong lheueng-lheueng dua  
Dua alam saboh payong  
Jroh meusigong hana tara

Ateueh pucak saboh manikam  
Cahyaji trang that meunyala  
U jeuoh deueh keulihatan  
That trang bandrang leumah cahya

Beukit malam takheun uroe  
Meunan bagoe meucuaca  
'Ajaeb tahe po samlakoe  
Hana tom proe dilee nyang ka

Cut Diwa Akah lam beurjalan  
U teungoh mideuen ka neuhalia  
Neueu bale saboh teudong  
Nibak mideuen pinto kuta

Tameh teumaga bubong meulo-lo  
Puteh hijo taeu rupa  
Ban troh keunan neuduek leugat  
Nibak teumpat nyang teurula

Baro neuduek na sikeujap  
Troph le leugat ureueng jaga  
Jen na sidroe keumiet bale  
Jieu lahe manusia

Hireuen teuceungong aneuk jalang  
Han tom jipandang meunan rupa  
Bicara gadoh akai hilang  
Hireuen mandang hana haba

Puleh hireuen nibak laloe  
Teuma dudoe jipareksa  
Pane teuka muda samlakoe  
Peue nan nanggroe soe bu nama

Seubab lon kalon that samlakoe  
Hireuen kamoe sikutika  
Cut Diwa Akah seuot meunoe  
Bangsa lon nyoe manusia

Nama ulon Cut Diwa Akah  
Nama ayah Diwa Laksana  
Martagangsa nanggroe nyang sah  
Kheundak Allah keunoe teuka

Ban jideungo haba meunan  
Jikheun yoh nyan meunoe haba  
Jikalee kon aneuk sulton  
Han troh jalan keunoe teuka

Padum reutoh thon lon di sinoe  
Han troh keunoe manusia  
Kheundak Tuhan Po geutanyoe  
Troph keunoe muda beulia

Cut Diwa Akah tanyong meunoe  
Peue nanggroe nyoe soe nan raja  
Siri bangsa tahareutoe  
Ubak kamoe tacalitra

Jiseuot le jikheun meunoe  
Raja kamoe Peurana Lila  
Meurcu Neugara nama nanggroe  
Jen hareuloe nama bangsa

Akan peue hai raja kamoe  
Tujoh uroe siseuen teuka  
Seureuta ngon wadi meuntroe  
Laen sinaroe raja-raja

Meungadu sakti sinoe di mideuen  
Peuleumah dum gagah peurkasa  
Meunan adat baranggajan  
Dum seukalian raja raja

Cut Diwa Akah deungo meunan  
Neutanyong pajan keunoe teuka  
Lon keumeung kalon keusaktian  
Saleh pajan trok bak masa

Jeuet lon kalon atawa han  
Nyanpi takheun ubak hamba  
Jiseuot yoh nyan teuma pantah  
Han peue salah akan hamba

Akan teutapi dilee taminah  
Bek leumah ubak baginda  
Meung neukalon ureueng di bale  
Neuyue poh le han pareksa

Kareuna Baginda Raja nyang sakti  
Gagah beurani han sapat sa  
Akhe neupoh gata sidroe  
Sayang kamoe that keu gata

Ban neudeungo meunan bagoe  
Teusinyom samlakoe maneh muka  
Seureuta neukheun narit sipatah  
Pane neupoh nyang tan deesya

Lagi kamoe hana salah  
Teukeudi Allah keunoe teuka  
Hana lon minah bak bale nyoe  
Meuseuki kamoe neutueng nyawa

Ureueng tuha deungo bunoe  
Deungo kamoe he ureueng muda  
Tinggai gata taduek sinoe  
Bah kamoe teubiet u lua

'Oh tan lon teugah gata sidroe  
Ateueh kamoe keunong meureuka  
Lheueh nibak nyan jiteubiet le  
U likot bale jimeuseunia

Cut Diwa Akah tinggai sinan  
Bak bale nyan neupreh raja  
Na sikeujap neuduek sinan  
Keudeungaran that meutaga

Meusuara dum bunyian  
Alamat sultan raja raja  
Deungon rakyat ireng sajan  
Seukalian raja raja

Maseng-maseng ateueh kandran  
Teubiet di dalam Meurcu Neugara  
Na nyang ateueh guda taji  
Siteungoh ri ateueh geuta

Ladom giduek ateueh waliman  
Siteungoh nyan ateueh singa  
Ladom ateueh naga teureubang  
Ladom pasang ateueh rata

Mubagoe-bagoe dum pakaian  
Payong alam panca warna  
Syahdan akan aneuk raja jen  
Dum seukalian pakek mahkota

Kulah kama keueumasan  
Meutatahkan mutu rakna  
'Oh sare troh nyan u mideuen  
Meu'u-'u dum jidong tantra

'Adi juhan dum pahlawan  
Sajan sultana Peurana Lila  
Takalon sigak that anaian  
Ban puprangan beurangkat raja

Mubagoe-bagoe rupa pupanji  
Han tatucripi calitra  
Deumpuk pahlawan hujan 'adi  
Hana sakri kiam kubra

Peurana Lila jiek kandran  
Hana macam hebat raya  
Di atueh kandran naga teureubang  
Meulayang-layang di antara

Sigak lagee that pahlawan  
Di teungoh mideuen han geunap dua  
Peuet ploh di atueh payong teukeumang  
U teungoh mideuen leugat geuhala

Keunan u bale dumgeu sare  
Geukalon le manusia  
Di atueh bale teudong sidroe  
Rupa samlakoe hana ngon sa

Ban sare rab ka jipandang  
Beungeh han ban Peurana Lila  
Seureuta jikheun bak pahlawan  
Pane ensan cabak raya

Jak kayue tren beu rijang-rijang  
Meung bantahan kapufana  
Jiseuot le sidroe pahlawan  
Lam' kawan nyan jih peurkasa

Jih geupeunan Diwa Sa'id  
Amarah bit hu ngon mata  
Meunyan ureueng peue tahisib  
Kuhapit han jan jihei ma

Han jipateh 'oh lon peugah  
Kucacah-cacah kutampa-tampa  
Meunan jikheun aneuk jalang  
Jicok peudeueng jijak lanja

Troh bak bale ka meuteumeung  
Jieu hireuen indah rupa  
Na sikeujap hireuen laloe  
Jikheun meunoe yoh nyan sigra

He manusia nyang that beubai  
Hana akai ngon bicara  
Pakri taduek bak bale nyan  
Teumpat larangan raja raja

Nyang got jak tren jinoe rijang  
Bek kureupang takue gata  
Cut Diwa Akah deungo meunan  
Teusinyom yoh nyan muda beulia

Seureuta neukheun pubuet laju  
Ban nyang napsu takeurija  
Diwa Sa'id mataji hu  
Jisuet mupru peudeueng raya

Jitak laju Cut Diwa Akah  
Pruh neukilah leupah mara  
Diwa Sa'id maken marah  
Jitak pantah hana tara

Taeu jitak meuadoe-adoe  
Muda samlakoe hana cidra  
Seureuta neukheun meunoe bagoe  
Hai jen pindoe theun di gata

Ban neukheun nyan neutak mupang  
Deungon peudeueng Purbadanta  
Cut Diwa Akah neutak pantah  
Seulinteung reubah ie teurhanta

Peurana Lila kalon pantah  
Sa'id ka sah mate fana  
Deungon mangat hana payah  
Bit nyg gagah manusia

Yoh nyan raja leumah pike  
Nibak ate kira-kira  
Beukit kupohjih nyan mate  
'Aeb keuji jeuep-jeuep donya

Kareunajih ureueng dagang  
Umu seudang lagi muda  
Jihpi sidroe hana teelan  
Gop kheun teuman jeungkat hamba

Kadang aneuk raja meugah  
Meuhan ek sah keunoe teuka  
Raja ingat ngon ejtihat  
Kutueng keu sahbat aneuk muda

Mangat tatanyong gampong nanggroe  
Lon tueng jinoe keu syeedara  
Yoh nyan beudoh peurdana meuntroe  
Ngon samlakoe meuteumeung lanja

Peurdana meuntroe tanyong pantah  
Tuan tapeugah soe bu nama  
Siri nanggroe soe nan ayah  
Lom tapeugah peu nan bangsa

Cut Diwa Akah seuot leugat  
Ulon sisat jak meurusa  
Cut Diwa Akah lon geulakab  
Nanggroe meuhat Martagangsa

Diwa Laksana nama ayah  
Bangsa nyang sah manusia  
Deungon kheundak nibak Allah  
Sampoe langkah keunoe teuka

Meuntroe seuot yoh nyan leugat  
Jikheun teupat meunoe haba  
Kareuna raja nyang beurdeelat  
Neutueng keu sahbat jinoe gata

Di donya kon troh akhirat  
Raja meuhajat sah syeedara  
Seuot le Cut Diwa Akah  
Lon junjong sah sabda raja

Ateueh jeumala ulon keubah  
Alhamdulillah syukor hamba  
Neutem peusayang ulon gareb  
Dagang teugeutit neupeumulia

Neumarit deungon leumah leumbot  
That mupatot deungon rupa  
Peurdana meuntroe ate sangkot  
Sibeuna patot raja nyang raya

Yoh nyan peurdana jibet jaroe  
Jilakee woe le jigisa  
Seureuta neukheun le samlakoe  
Taklem kamoe akan Baginda

Peurdana meuntroe leugat jiwoe  
Troph le jiwoe ubak raja  
Meuntroe peugah dum seukalian  
Keulakuan manusia

Seubaek-baek peuneujeuet Tuhan  
Dalam alam hana dua  
Deungon narit leumah leumbot  
Cit that patot aneuk raja

Seureuta taklem akan deelat  
Ngon horeumat that mulia  
Ban jideungo le raja jen  
Saleuem neukirem akan hamba

Bit nyo ureueng salen-malen  
Nyo asai tren nibak raja  
Suka cita dalam ate  
Beurangkat le Peurana Lila

Seureuta ngon wadi meuntroe  
Dum sinaroe ireng raja  
Diwa Akah ngieng raja berangkat  
Beudoh leugat peumulia

Tren di bale bri horeumat  
Tanda 'izzat raja raja  
Ban sare troh mumat jaroe  
Muda samlakoe Peurana Lila

Ek u bale dum sinaroe  
Wadi meuntroe raja raja  
Teuduek sapat dum meuranjo  
Saboh sapo singgasana

Nibak keurusи keueumasan  
Duek raja jen Peurana Lila  
Dua deungon muda samlakoe  
Laen sinaroe atueuh kada

Peurana Lila kalon samlakoe  
Hireuen lalo hana tara  
Jieu kuluk sigak bangon  
Patotkeu tuan aneuk raja

Nibak ate balah kasehan  
Seupeurti ban sang syeedara  
Jibri ranup dalam puan  
Sambot rijang peumulia

Lheueh nibak nyan sabda sulotan  
Akan raja jen Peurana Lila  
He syeedara Cut Diwa Akah  
Geutanyoe beu sah sisyeedara

Miseue saboh ma ngon ayah  
Tuloh ikhlah gaseh meusra  
Teuma seuot Cut Diwa Akah  
Alhamdulillah nibak hamba

Neutem peusayang dagang gareb  
Nyoho teugeutit bak teumpat raja  
Bawa sunggoh deungon bit-bit  
Bak ate cit sah syeedara

Peurana Lila keusukaan  
Meuteumeung teelan nyang jroh rupa  
Teuma meusabda raja sulotan  
Bak seukalian balatantra

Beudoh jak meuen wahe rakan  
Syeedara lon kalon teumasa  
Ban jideungo sabda sulotan  
Beudoh yoh nyan raja raja

Laju teubiet u teungoh padang  
Dong meureuntang jroh mubanja  
'Adi juhan ngon pahlawan  
Dum seukalian meuen rata

Di ateueh kandran maseng-maseng  
Beurpanahan hana reuda  
Dumji sare peuleumah sakti  
Peuleumah beurani ngon peurkasa

Ladom likak ngon meunari  
Hana sakri sangat gura  
Raja bandua that sukaan  
Diwa Akah ngon Peurana Lila

Na sikeujap dum beureunti  
Woe keumbali dalam kuta  
Seureuta ngon Cut Diwa Akah  
Tamong leupah u istana

Jireng le uleebalang  
Dum seukalian ngon bentara  
Geuke lanja u meuligoe  
Ngon samlakoepi seureuta

Kareuna raja goh na putroe  
Dendayang sinaroe biek peurira  
Jingadap raja ngon Diwa Akah  
Teuduek atueuh singgasana

Sangat rame ngon bunyian  
Han sapeue tan dum suara  
'Oh ka malam jak beuradu  
Lam keuleumbu sapat dua

Meugaseh that ngon Tuanku  
Bintang timu jroh that bahsa  
Watee neujak sapeng-sapeng  
Lam meujandreng sapat dua

Cut Diwa Akah ngon raja jen  
Neuek neutren sapat dua  
Padum lama po samlakoe  
Dalam nanggroe Meurcu Neugara

Meugaseh that hana bagoe  
Aduen adoe meunan rupa  
Hingga teuma bak siuroe  
Samlakoe neulakee bungka

Idin keu lon syeedara droe  
Lon keumeung woe bak ayahda  
Peurana Lila deungo meunan  
Han muban-ban sret ie mata

Seubab leupah beurkasehan  
Sang bek leukang cre di mata  
Peurana Lila beurkataan  
Lonpi sajan he syeedara

Han seukali lon tem leukang  
Harap sajan rugoe laba  
Teuma jaweueb Cut Diwa Akah  
Deungo lon peugah wahe raja

Lon jak dilee wahe sahbat  
'Oh meuteumpat lon hei gata  
Kareuna lon jak hana meuhat  
Timu barat han meuhingga

Beukit na peue keusukaran  
Lon cintakan nama gata  
Cut Diwa Akah meunan kalam  
Seungap diam Peurana Lila

Jisuet euncien nibak jaroe  
Keu samlakoe jijok lanja  
Seureuta jikheun narit meunoe  
Euncien nyoe tanda syeedara

Kasiet euncien deungo lon peugah  
Barangpeue tahah Tuhan peuna  
Ujeuen apui sangat mudah  
Laot bahrollah di sinan na

Neuteurimong le samlakoe  
Sok bak jaroe beuneuri raja  
Lheueh nibak nyan mumat jaroe  
Tren samlakoe leugat bungka

## V MEUTEUMEE NGON SYEEDARA MA

Banta peunap rot u barat  
Neutakat bak gunong raya  
Uteuen seumak rot seumpit that  
Neujak leugat han neukira

Dum neukalon keubeusaran Tuhan  
Keukayaan Allah Ta'ala  
Sangat indah akan padang nyan  
Tanoh intan naleueng komkoma

Meujampu deungon meuh uri  
Hireuen lale muda beulia  
Neukalon padang that seureuloe  
Muda samlakoe neujak lanja

Ban sare troh u teungoh padang  
Leumah neukalon saboh rupa  
Neueu jeuoh that meulu-lu  
Puteh sang gapu nibak mata

Cut Diwa Akah leugat jalan  
Neupandang ban siseun lingka  
Neueu teuma di teungoh nyan  
Saboh taman indah rupa

Laju neujak leugat keunan  
Bak teumpat nyan le neuhalo  
Ban troh keunan po samlakoe  
Hireuen laloe sikutika

Neukalon le jroh han bagoe  
Dum sinaroe tiep peukara  
Pageue taman teumaga mirah  
Meujeureulah hu meucahya

Pintoji teuma bukon indah  
Meuh meutatah meupeurmata

Cut Diwa Akah troh bak pinto  
Teudong tahe sikutika

Jinoe laen ulon ato  
Hai teungku e deungo nyata  
Sidroe zangki di pinto taman  
Jiduek sinan mata-mata

Teukeudi Tuhan bak uroe nyan  
Sidroe ensan jieu teuka  
Jikalon rupa that analan  
Miseue intan cahya muka

Sigak bangon that pahlawan  
Bak jipandang zangki tuha  
Teudong di nap muda samlakoe  
Hana sapeue teubiet haba

Na sikeujap puleh laloe  
Zangki pindoe meusuara  
Jitanyong le hai samlakoe  
Pane nanggroe soebu nama

Pakon tajak hai samlakoe  
Han tom puroe dilee nyang ka  
Teuma seuot Cut Diwa Akah  
Laju neupeugah neucalitra

Diwa Laksana nama ayah  
Cut Diwa Akah nama hamba  
Martagangsa nama nanggroe  
Lon jak keunoe bak let rusa

Tinggai wadi deungan meuntroe  
Leupah kamoe nyoho teuka  
Zangki jikheun teuma meunoe  
Hireuen kamoe hana tara

Limong reutoh thon lon di sinoe

Han tom sidroe manusia  
Kareuna jeuoh peurjalanan  
Jameun-jameun hantom nyang ka

Meukon ureueng kheundak Tuhan  
Lon pandang muda beulia  
Teuma neutanyong le samlakoe  
Peue taman nyoe tacalitra

Kareuna ulon keumeung singgah  
Pioh payah sikutika  
Zangki seuot yoh nyan pantah  
Deungo lon peugah po areuta

Meukutaraja nyang po taman  
Keurajeuen di gunong Martaganja  
Adat baginda tiep-tiep Jum'at  
Neubeurangkat keunoe lanja

Neuba sajan ngon esteuri  
Peurmaisuri seugala tantra  
Meunan sabé han beureunti  
Raja doli keunoe teuka

Cut Diwa Akah neukheun yoh nyan  
Beukit meunan jak udehta  
Ulon tamong dalam taman  
Lon meuteumeung ngon baginda

Cut Diwa Akah neubeurjalan  
Sajan-sajan ureueng tuha  
Hireuen neukalon di dalam taman  
Buah-buahan sianeka

Di teungoh taman saboh bale  
That meudeune indah rupa  
Bineh bale jroh han sakri  
Gadeng mandi ngon ceundana

Meutamah meuh sikureueung mutu  
Kaca hijo akan atapnya  
Geunireng bale na krueng saboh  
Analan jroh taeu rupa

Geuturab ngon batee palinggam  
Ie di dalam sijuek lagoina  
Di bineh krueng geupula kayee  
Jroh that teuntee dum mubanja

Anggor jabet deulima meukah  
Bohji mirah masak rata  
Laen nibak nyan gandum sya'i  
Dum meuriti bak keureuma

Jeuneh tanaman macam-macam  
Han sapeu tan sianeka  
Cut Diwa Akah hireuen teuceungong  
Neukalon bangon miseue syeureuga

Han jeuet sifeuet ubak ate  
Hilang pike ngon bicara  
Bak masa nyan bungong pade  
Teuingat le nyan keu bunda

Tatkala bunda keunong hekeumat  
Jikhianat le jen rimba  
Saleh pajan ek lon dapat  
Balah khianat akan daya

Sajan teuingat keu taman droe  
Masa di nanggroe yoh goh bungka  
That masygol po samlakoe  
Sajan neumoe ro ie mata

Lheueh nibak nyan neubeurjalan  
U bineh kulam neumeuseunia  
Na sikeujap duek di sinan  
Leumah neukalon saboh rupa

Neukalon saboh meuligoe indah  
Meuh meutatah mupeurmata  
Gadeng mandi ngon kayee arang  
Bukon bubarang indah rupa

Meutatah rakna mutu manikam  
Geumeurlapan hu meucahya  
Geupeudap bubong jakod nyang kuneng  
Teuma keu dindeng meuh geuteumpa

Hireuen sangat po samlakoe  
U meuligoe neuke lanja  
Neue alat dum sinaroe  
Cukop asoe dum peukara

Tiree keuleumbu keueumasan  
Rumboe intan dum meutia  
Cut Diwa Akah bak malam nyan  
Neueh sinan lam tiree rawa

Sare beungoh uroe siang  
Beudoh rijang jak srah muka  
Na sikeujab dudoe nibak nyan  
Zangki keunan sampoe teuka

Seureuta jikheun deelat ampon  
Keunoe neutren sajan hamba  
Kareuna baginda hampe datang  
Bek le sinan po meukuta

Sambe teusinyom po samlakoe  
Neukheun meunoe yoh nyan sigra  
Cit bahle troh baginda keunoe  
Ingen kamoe pandang mata

Zangki seuot beukit meunan  
Lon jak meusom po meukuta  
Cut Diwa Akahpi cit meusom  
Lam taman nyan jarak hana

Di dalam nyan na sikeujap  
Leumah neulihat dua rakata  
Neueu pantah miseue kilat  
Keunan leugat cit geuhala

Di dalam ate Cut Diwa Akah  
Saleh nyan sah Meukutaraja  
Rakata jitren keunán pantah  
Rupa indah hana tara

Bak uroe nyan raja beurangkat  
Meuntroe ngon rakyat hana neuba  
Nyang na sajan Mangkubumi  
Peurmaisuri ngon aneukda

Syahdan Diwa nan geurasi  
Aneuk doli Meukutaraja  
Na sikeujap beurlayangan  
Sret u taman laju rakata

Rakata teuduek di leuen bale  
Ka neutren le Meukutaraja  
Sajan deungon peurmaisuri  
Dan lagi dendayang nyang na

Neutamong leugat dalam taman  
Diwa Syahdan sama-sama  
Raja neuek atueuh bale  
Mangkubumi tinggai di luar

Dudoe nibak nyan neupot bungong  
Dalam taman beurangkat raja  
Deungon suri sajan-sajan  
Neubeurjalan lingka-lingka

Troh bak teumpat Cut Diwa Akah  
Neueu leumah Meukutaraja  
Rupa hebat miseue rimueng  
Han tajeuet ngieng nibak rupa

Hebat miseue gunong apui  
Meugasui-gasui jiek cahya  
Cut Diwa Akah neubeudoh dong  
Neubri taklem akan baginda

Raja neungieng yoh masa nyan  
Hireuen teuceungong poteu raja  
Ureueng muda sangat indah  
'Ajaeb leupah poteu raja

Neutanyong le yoh nyan pantah  
Hai nyak tapeugah soe nan gata  
Pane tajak siri teumpat  
Soe geulakab nan ayahda

Pakri gata beurani that  
Jak bak teumpat raja raja  
Cut Diwa Akah seuot yoh nyan  
Angkat tangan u jeumala

Deelat ampon ya junjongan  
Ampon laman sibarang deesya  
Nama patek Cut Diwa Akah  
Nama ayah Diwa Laksana

Martagangsa nanggroe nyang sah  
Keunoe leupah bak let rusa  
Mandu Diwi nama ibu  
Ampon tuanku nyankeuh bunda

Raja deungo nyan peuneugah  
Hireuen dasyah hana tara  
Neudeungo narit Cut Diwa Akah  
Bak silsilah aneuk raja

Akan hai putroe Mandu Diwi  
Syeedara wali ngon baginda  
Yoh nyan raja suka ate  
Neucom le muda beulia

Neuwa neucom ban saboh badan  
Keusukaan Meukutaraja  
Seureuta neukheun yoh nyan pantah  
Bu meutuah bijeh mata

Diwa Laksana nama ayah  
Patot langkah keunoe teuka  
Cut Diwa Akah seumbah deelat  
Neubri horeumat that mulia

Poteu raja sambot beureukat  
Meutuah that cahya mata  
Neuba leugat ubak suri  
Seumayam di bale peurmata

Ban sare troh ubak suri  
Neutanyong le ubak baginda  
Supo aneuk neuba sajan  
Lon kalon sang indah rupa

Raja seuot neukheun rijang  
Aneuk sulotan Diwa Laksana  
Nyankeuh aneuk Mandu Diwi  
Syeedara doli deungon hamba

Deungon kheundak nibak Rabbi  
Jatoh keumari bak let rusa  
Cut Diwa Akah nyang samlakoe  
Neuseumbah putroe yoh nyan sigra

Peurmaisuri wa samlakoe  
Neucom bak dhoe ate suka  
Wahe keumuen tangke ate  
Rasa cut gle 'oh troh gata

Sijuek mata deungon ate  
That meusampe 'oh troh gata  
Bak Diwa Syahdan neuisyarah  
Neuyue seumbah nyan kakanda

Diwa Syahdan beudoh pantah  
Cut Diwa Akah seumbah lanja  
Neuseumbah le neucom bak teuot  
Banta sambot peumulia

Meucon meuwa mubalot-balot  
Sabe patot sisyeedara  
Galak neukalon bunda ngon ayah  
Sabe cidah banta muda

Keudeh keunoe hana salah  
Sibeuna sah sang syeedara  
Neubri ngon ranup dalam karah  
Cut Diwa Akah pajoh lanja

Ranup neupajohpi lheueh sudah  
Pulang karah akan bunda  
Teuma neuyue le Diwa Syahdan  
Pot buahan sianeka

Laju jipot le dendarayang  
Jiba keunan u nap raja  
Teuma neusantap buah-buahan  
Diwa Syahdan ngon banta muda

Ngon baginda sajan-sajan  
Suri sajan peuet seureuta  
Lheueh santapan geujak manoe  
Muda samlakoe beursama-sama

'Oh lheueh manoe leugat geuwoe  
Kareuna uroepi ka 'asa  
Cut Diwa Akah neuba sajan  
Leugat u gunong Martaganja

Ban sare troh keunan rab toe  
Muda samlakoe suka cita  
Neueu pucak tangoe lam awan  
Hana saban gunong nyang na

Di ateueh pucak kuta saboh  
Analan jroh hana tara  
Geuturab batee panca logam  
Jampu pualam sangkamara

Leumah jeuoh bukon hebat  
Miseue kilit dalam hawa  
Pintoji nibak meuh nyang mirah  
Bukon indah hana ngon sa

Cawareudi dum meutatah  
Tingkap teuhah dum peurmata  
Padum-padum payong alam  
That meukrang dum suara

Jeuep-jeuep kuta meunan macam  
Payong alam bandum rata  
Jeuep-jeuep sagoe bale geupeudong  
Ngon bunyian sianeka

Alat bale pudoe intan  
Cahyaji trang hu meunyala  
'Ajaeb neukalon muda samlakoe  
Seureuta pujo Allah Ta'ala

Di makhluk ek sidumnoe  
Tuhan sidroe meuribee ganda  
Seupeurti ban firman Tuhan  
Dalam Quran nyang mulia

Innallaha ghaniyyon 'anil 'alamin  
Keukayaan Allah Ta'ala  
Bahaha sunggoh kaya Tuhan  
Bak seukalian alam donya

Hingga raja leugat neuwoe  
U meuligoe ban seumua  
Duek seumayam dum sinaroe  
Ngon samlakoe sama-sama

Di ateueh geuta keueumasan  
Seumayam sulton Meukutaraja  
Cut Diwa Akah Diwa Syahdan  
Ngadap junjongan doli baginda

Na sikeujap duek seumayam  
Peursantanpi troh jiba  
Raja santap peuet sihidang  
Sajan-sajan ngon aneukda

Lheueh santapan pinah hidang  
Ranup lam puan pajoh lanja  
Teuma neungui ngon bee-beewan  
Dhien teupasang lam istana

Neumeusabda doli sulton  
Neukheun nyoe ban uleh raja  
Wahe aneuk Cut Diwa Akah  
Sinoe taeh ngon ayahda

Neuseuot le ban nyang titah  
Hana bantah nibak hamba  
Ka jihias teumpat peuraduan  
Le dendayang ban sineuna

Seureuta jileueng dum hamparan  
Meuribee ban jeuneh rupa  
Padum-padum peureumadani  
Jiseundi pudoe meutia

Jiboh sajan ngon zalzari  
Ngon kasymiri haloh raya  
Padum tiree ngon leulanget  
MUBL'ET-BL'ET ban bintang kala

Deungon haloh that mumet-met  
Hana singet ube seuma  
Deungon bantai wie ngon uneun  
Jroh that bangon indah rupa

Cukop dumpeue sileungkapan  
Tamong junjongan peuet seureuta  
Raja tanyong bak Diwa Akah  
Aneuk tapeugah ngon sibeuna

Pakon tatinggai bunda ngon ayah  
Sampoe langkah nyoho teuka  
Neupeukek seumbah muda samlakoe  
Neuhareutoe dum peukara

Nyang fon awai troh 'oh dudoe  
Abeh sampoe neucalitra  
Sira marit sira neumoe  
Samlakoe jatoh ie mata

Miseue meutia putoh taloe  
Meunan neumoe banta muda  
Raja deungo meunan peneugah  
Sangat marah keu jen raksasa

Seureuta neukheun insya Allah  
Bek tagundah cahya mata  
Ulon balah gunaji nyan  
Di teungoh mideuen Anta Cahya

Peurmaisuri deungo nyan ban  
Balah kasehan sret ie mata  
Seureuta deungon Diwa Syahdan  
Keudukaan hana tara

Lheueh nibak nyan neubeuradu  
Lam keuleumbu peuet seureuta  
Singoh beungoh uroe siang  
Beudoh rijang jak srah muka

Teuma neuek bak santapan  
Duek sihidang peuet seureuta  
Lheueh nyan neungui ngon bee-beewan  
Beurangkat sulton jak u lua

U bale rom troh sulotan  
Ireng sajan aneuk dua  
Raja seumayam bak keurusi  
Meuh meuseundi mupeurmata

Muda samlakoe kanan kiri  
Ngadap doli poteu raja  
Wadi meuntroe uleebalang  
Ngadap sulotan Meukutaraja

Bandum hireuen keunan mandang  
Pane datang ureueng muda  
Raja kalon dum seukalian  
Sabe keunan bandum mata

Teusinyom **raja** leumah gigoe  
Neukheun meunoe jatoh sabda  
Na taturi muda samlakoe  
Keumuen kamoe baro teuka

Diwa Laksana po aneuk nyoe  
Raja nanggroe Martagangsa  
Nyang jeuet keu troh langkah keunoe  
Roh sisat nyoe bak let rusa

Ban geudeungo sabda meunan  
Beudoh yoh nyan raja raja  
Beudoh meuntroe uleebalang  
Jak meuteumeung ngon ureueng muda

Bri horeumat mumat jaroe  
Muda samlakoe sambot mulia  
Ate suka dum sinaroe  
Po samlakoe maneh raya

Lheueh nibak nyan geubet hidang  
Peurjamuan nibak raja  
Makeuen minom seukalian  
Ban atoran ateueh kada

Poteu santap lhee sihidang  
Laen nibak nyan maseng kada  
Miseue adat nyang saboh roe  
Raja ngon meuntroe han meutuka

Adat bangsapi cit meunan  
Indra ngon mambang han meutuka  
Pari ngon jen han jeuet sapat  
Maseng meuhat atueh bangsa

Hana geubri beurjampuran  
Meunan tuan adat nyang ka  
'Oh lheueh minom deungon makan  
Ranup lam puan geubri rata

Piala meuh tatah intan  
Peiduek sinan dum mubanja  
Raja raja uleebalang  
Meuntroe sajan ngon bentara

Bak masa nyan suleng-meunyuleng  
Keusukaan minom rata  
Seureuta geupeh dum bunyian  
Gong ngon geundrang dhap nukira

Rame sabe uroe malam  
Dum peurasan hana reuda  
Cut Diwa Akah Diwa Syahdan  
Sabe sajan droeneu dua

Jak ubale ngadap sulotan  
Sabe sajan jarak hana  
Miseue syeedara satu jalan  
Bak lakuan meunan rupa

Suka ate peurmaisuri  
Raja doli meunan juga  
Neugaseh that hana sakri  
Sang seundiri punya putra

Hana ubah ban aneuk droe  
Bandua droe suka rasa  
Kata rawi punya kisah  
Cut Diwa Akah pike teuka

Ingat keu nanggroe teuka sosah  
Ile limpah ngon ie mata  
Teuka ingat bak pikeran  
Saleh pajan ulon gisa

Pajan apoh keumaluan  
Lon simpan inong jen rimba  
Jadi ate keusyugolan  
Uroe malam duka cita

Cut Diwa Akah bak siuroe  
Neumarit nyoe deungon raja  
Deelat ampon payong nanggroe  
Idin lon woe po meukuta

Bunda tinggai bak mangkubumi  
Saleh pakri di likot hamba  
Harap patek idin neubri  
Beursama suri paduka bunda

Seureuta adek Diwa Syahdan  
Idin keu cut bang siklep mata  
Raja deungo meunan kalam  
Beurdeubarhan ate lam dada

Peurmaisuri Diwa Syahdan  
Jatoh sajan ngon ie mata  
Kareuna leubeh gaseh sayang  
Sang bek leukang nibak mata

Meukutaraja tundok ulee  
Ngon eleumee neupareksa  
Putoh eleumee ka meuteuntee  
Pubeudoh ulee seureuta sabda

He aneuk lon po samlakoe  
Lon hareutoe nibak gata  
Bak pandangan ulon sidroe  
Gohlom jeuet woe bijeh mata

Kareuna goh troh bak bilangan  
Hana seunang bak tagisa  
Goh tahadap bak prang rayek  
Gohlom tundok raja raja

'Oh ka talo prang ngon mambang  
Dum sibarang milon raksasa  
Meuka talo pari edeurang  
Baro jeuet riwang he aneukda

Nyankeuh baro jeuet tariwang  
'Oh meunang nyan cahya mata  
Lompi aneuk kuhareutoe  
Tadeungo nyoe kucalitra

Diwa Seundari na tatusoe  
Aneuk nyoe raja raksasa  
Gagah beurani keusaktian  
Syahi Alam Bulia raksasa

Bakjih taklok pari mambang  
Dum sibarang indra jindra  
Bak sa'at nyoe han soe linteung  
Ngon nyan tamuprang teuma gata

Bitpi meunan hana peue hit  
Bek taisit han peue mara  
Jinoe aneuk bak pike lon  
Bahle tatren tajak tapa

Teuma seumbah Cut Diwa Akah  
Insya Allah po meukuta  
Bak soe lon jak tuanku peugah  
Peue daerah soe peundita

Baginda teusinyom teuma neupeugah  
Bu meutuah cahya mata  
Jinoe tajak u gunong Halam  
Sidroe Brahman Sakti teurpuja

Brahman Sakti nama tuan nyan  
Di gunong Manikam Halam nama  
Seugala raja dum jak keunan  
Sebab gop nyan meugah jeuep donya

Cut Diwa Akah deungo meunang  
Ingat yoh nyan nyang seumporna  
Gotkeu bahle kujak keunan  
Bak tuan nyan kujak tapa

Kareuna hai Diwa Seundari  
Aneuk doli raja raksasa  
Meunyo hana eleumee saktian  
Seukalian han ek daya

Meuna untong nibak Allah  
Neubri leupah seugala bahya  
Beukit hana kupaban bah  
Hukom Allah atueh hamba

Seubeurmula wahe sahbat  
Raja deelat Meukutaraja  
Neubri saboh guliga hekeumat  
Analana that banyak guna

Wahe aneuk Cut Diwa Akah  
Nyoe na saboh kubri keu gata  
Ka neusambot le samlakoe  
Neupeuduek nyoe u jeumala

Seureuta neutanyong haba meunoe  
Guliga nyoe peue beurguna  
Raja seuot neuhareutoe  
Ase nanggroe 'oh tacinta

Pangulee jen sinan peuet droe  
Rakyat meukatoe sajan seurenta  
Deungon nama lon peugah soe  
Kuhareutoe nibak gata

Peurana Diwa nama sidroe  
That seureuloe ngon peurkasa  
Gagah beurani kon sigeutu  
Aneuk tuanku that seutia

Nyang keudua nama Indaran  
Sakti pahlawan hana tara  
Ismuraja nama nyang keulhee  
Keupeuet meuteuntee Dantaraja

Ban peuet droe nyan that pahlawan  
Analana gagah peurkasa  
Neucinta le yoh masa nyan  
Troph le keunan ban peuet teuka

Ban sare troh seumbah sujud  
Bak teuot doli baginda  
Meukutaraja le neusambot  
Deungon patot balah mulia

Turon titah raja doli  
Gata lon bri keu muda beulia  
Keumuen ulon beu na taturi  
Keunan kubri ban peuet gata

Cut Diwa Akah keumuen kamoe  
Nyankeuh jinoe tapeulara  
Udep mate laba rugoe  
Gata peuet droe nyan tajaga

Ho nyang jijak beu taseutot  
Kuthee nyang got di lon saja  
Meunan sabda nibak deelat  
Seulama hayat patek keurija

Insya Allah ampon deelat  
Raja nyan peuet sujud sigra  
Lheueh jikheun nyan jiwoe leugat  
Lam hekeumat nyang that eela

Cut Diwa Akah sukaan that  
Sujud khidmat bak mamanda  
Teuma neuseumbah peurmaisuri  
Com di gaki paduka bunda

Suri neumoe han beureunti  
Raja doli sret ie mata  
Diwa Syahdan apa lagi  
Sebab ka cre ngon syeedara

Beurtangisan hana sakri  
Maklum akhi ureueng bungka  
Cut Diwa Akah neubeurjalan  
Sampoe yoh nyan u lua kuta

Neuboh hadap u seulatan  
Ban wasiet nyan meukutaraja  
Padum gunong rimba padang  
Padum sarokan alue paya

\* \* \* \*

## VI MEUNUNTUT ELEUMEE BAK SYIAH TAPA

Cut Diwa Akah neupujoe Tuhan  
Neusrah badan seureuta nyawa  
Padum lawet neubeurjalan  
Troph u padang Lila Peurkasa

Neueu padang that bit luah  
Cut Diwa Akah 'ajaeb raya  
Sion naleueng hana timoh  
Puteh tanoh sama rata

Pasi puteh miseue gapeueh  
Cahya peungeuh jroh han tara  
Leugat neujak neubeurjalan  
Sigeutu han ate lia

Dum neukalon keukayaan Tuhan  
Keubeusaran Allah Ta'ala  
Neujak laju u teungoh padang  
Indah han ban neueu rupa

Ban troh keunan leumah neukalon  
Saboh gunong indah rupa  
Nama gunong Manikam Halam  
Indah han ban ngon tapeusa

Cut Diwa Akah neujak keunan  
Gaki gunong nyan troh neuhala  
Ban troh keunan po samlakoe  
Neupioh droe sikutika

Neukalon gunong hireuen laloe  
Dum sinaroe indah rupa  
Geupeugot nibak meuh dua blah mutu  
Barangsoe eu ate suka

Ngon bak kayee le han bagoe  
Ate laloe soe eu rupa  
Deungon bungong macam-macam  
Harom tuan hana tara

Cut Diwa Akah hireuen mandang  
Peurintah Tuhan Azza Wajalla  
Jinoe teuduek Cut Diwa Akah  
Jinoe lon peugah laen calitra

Nyung po gunong ulon kisah  
Nyang that meugah hana tara  
Diwa Sakti nama tuan nyan  
Lagi Brahman pangkat eela

Bak siuroe kheundak Tuhan  
Leumah neupandang di dalam tapa  
Neuduek di bale keueumasan  
Bale jimeunan Rungka Cahya

Jingadap le murit seukalian  
Uleebalang raja raja  
Aneuk raja kureueng sa sireutoh  
Bandum sunggoh dalam tapa

Timu barat tunong baroh  
Keunan dum troh bak Sakti Diwa  
Di dalam dua aneuk sulton  
Dua droe nyan that peurkasa

Lagi neugaseh uleh Brahman  
That leubeh nyan nibak nyang na  
Diwa Danta sidroe geuboh nan  
Damsyek Kaindran nyang keudua

Seubeurmula akan Brahman  
Treh peungeutuhan sampoe mata  
Deuh neukalon sidroe ureueng  
Di gaki gunong meuseunia

Sabda Brahman yoh nyan pantah  
Neupeugah bak raja dua  
Diwa Danta Damsyek Kaindran  
Tajak tuan bak aneuk raja

Cut Diwa Akah namajih nyan  
Aneuk sulotan Diwa Laksana  
Martagangsa nama nanggroe  
Jak tueng keunoe syeedara gata

Deungon gata jeuet keu sahbat  
Jak tueng leugat keunoe taba  
Hajat lon aneuk tameugaseh  
Bangsa leubeh manusia

Kareuna neupeujeuet uleh Tuhan  
Leubeh ensan nibak nyang na  
Lagi aneuk raja that meugah  
Meusyeuhurah Diwa Laksana

Bandum raja keunan taklok  
Meurtabat rayek nibak nyang na  
Ban lheueh sabda nibak Brahman  
Beudoh yoh nyan raja dua

Deungon rakyat ireng sajan  
Uleebalang ngon bentara  
Ban sare troh bak samlakoe  
Mumat jaroe sabe mulia

Diwa Danta marit meunoe  
Nyang jeuet kamoe keunoe teuka  
Rindu deundam Diwa Sakti  
Neuyue tueng le paduka kakanda

Baginda neupreh nibak bale  
Saleuem neuyue me bak kamoe dua  
Cut Diwa Akah deungo meunan  
Hireuen yoh nyañ hana tara

Bit nyoe that meugah Brahman  
Abeh neutuban tiep peukara  
Ayah ulonpi neutusoe  
Seureuta kamoe geutupeue nama

Beukit meunan wahe adoe  
Bak kamoe ateueh jeumala  
Dalehpi ka neuyue jak tueng  
Adat Han nyanpi lon teuka

Lheueh nibak nyan geubeurjalan  
Gunong Halam geukek lanja  
Abeh gunong geutren curam  
Bak bale keumang sampie dum ka

Brahman duek di bale rom  
Nama geukheun Rungka Cahya  
Ateueh keurus nyang keueumasan  
Meutatahkan mutu rakna

Beurnyala-nyala ban matauroe  
That peungaroe hebat muka  
Brahman kalon muda samlakoe  
Hana bagoe that mulia

Neubri horeumat hana bagoe  
Keu samlakoe that mulia  
Taek keunoe aneuk badan  
Taduek sajan rab ayahda

Cut Diwa Akah deungo meunan  
Neuk yoh nyan pantah sigra  
Com di teuot seumbah di gaki  
Brahman Sakti sampoh keupala

Horeumat taklem hana sakri  
Diwa sakti gaseh meusra  
Neukalon muka that peureuseh  
Meukeumat gaseh di dalam dada

Neubri keurus nyang keueumasan  
Meutatahkan mutu rakna  
Seureuta titah baginda sulotan  
Duek seumayam he aneuka

Bek meujampu ngon raja laen  
Meunan atoran bak baginda  
Ateueh taraf maseng-maseng  
Ban lagee tren ateueh bangsa

Diwa Sakti tanyong pantah  
'Oh na langkah bijeh mata  
Pakon tatinggai bunda ayah  
Sampoe troh langkah bak ayahda

Teuma seuot Cut Diwa Akah  
Seureuta seumbah teuot baginda  
Jeuet troh langkah patek keumari  
Peuhamba diri bak meukuta

Meunjadi kidam keubawah doli  
Akan 'abdi hamba dina  
Beukit han trep tuanku ampon  
Kada sithon atawa dua

Baginda deungo narit meunan  
Teusinyom yoh nyan doli baginda  
Patot aneuk tadong sinoe  
Sajan kamoe siuroe dua

Seureuta tajak eu reusam nanggroe  
Troh bak kamoe ureueng tuha  
Sabda raja yoh masa nyan  
Yue pot buahan sianeka

Troh le jime keunan datang  
U hadapan doli baginda  
Teuma neukheun uleh Brahman  
Santap buahan dumteu rata

Wahe aneuk Cut Diwa Akah  
Pajoh pantah boh kayee rimba  
Neuseuot le alhamdulillah  
Neucok pantah pajoh lanja

Asoe tapajoh kulet taboh  
Keudeh bak tanoh tatiek rata  
Na sikeujap karonya Allah  
Kulet nyan bagah timoh sigra

Teubiet ngon on di dalam bak  
Cabeueng rampak hana tara  
Teubiet ngon boh laju masak  
Karonya hak sakti baginda

Na sikeujap teuma dudoe  
Muda samlakoe seumbah baginda  
Seureuta deungon neubet jaroe  
Ampon kamoe po meukuta

Harap gaseh deelat ampon  
Neutueng ulon beu jeuet keu hamba  
Lon cre gampong deungon teumpat  
Lon harap keu Tuhan Esa

Di likot nyan wahe deelat  
Patek harap ngon sibeuna  
Neutueng keu namiet soe me kawah  
Soe sampoh broh lam istana

Meunan harap lon nyang putoh  
Sampoe jeuet troh keunoe hamba  
Brahman deungo seumbah meunan  
Neutupeue ban hajat pinta

Beukit meunan he samlakoe  
Tuhan peusampoe hajat gata  
Sideh takalon uroe dudoe  
Sajan ngon kamoe Danta Diwa

Cut Diwa Akah keusukaan  
Neudeungo Brahman peugah haba  
Hingga teuma lheueh nibak nyan  
Muda bangsawan le neu aja

Brahman aja muda samlakoe  
Dum sinaroe eleumee mintra  
Eleumee meutak tangkeh-mangkeh  
Bandum abeh neubri aja

Ate peungeuh jroh peureuseh  
Siat abeh jeuet le sigra  
Eleumee taki lam puprangan  
Eleumee meucang atueh guda

Nyanpi abeh bandum neufam  
Sangat ajam muda beulia  
Lheueh neuaja Cut Diwa Akah  
Baginda pantah masok tapa

Muda samlakoe tinggai sinan  
Sajan-sajan aneuk raja  
Na sikeujab dudoe nibak nyan  
Troph hidangan keu muda beulia

Saboh sapo teuduek sinan  
Ureueng me tan hidang ka na  
Seureuta suara keudeungaran  
Makeuen he tuan dumteu rata

Makeuen he aneuk sihidang sapo  
Bek meujampu ngon muda beulia  
Hoka gata he samlakoe  
Makeuen beu troe bek malee mata

Lah ka tajak nyoho sampoe  
Makeuen aneuk droe peue-peue nyang na  
Teuma seuot Cut Diwa Akah  
Insya Allah po meukuta

Ateueh ulee patek keubah  
Ban nyang titah doli baginda  
Suara na keudeungaran  
Rupaneu tan lahe nyata

Nyan dum sakti that Brahman  
Sangat hireuen dum barangna  
Teuma makeuen dum seukalian  
Maseng tuan atueuh kada

'Oh lheueh makeuen gaeb hidang  
'Ajaeb tuan hana tara  
'Oh lheueh makeuen gaeb hidang  
Lahe puan keunan dumna

Bandum teuduek di hadapan  
'Ajaeb tuan hana tara  
Pajoh ranup dum seukalian  
Puanpi hilang han meuhoka

Lheueh nibak nyan jula malam  
Beurkataan banta muda  
Bak raja dua neukheun nyoe ban  
Lon tiduran teungeut raya

Danta Diwa marit meunoe  
Deungo kamoe Cahya Mangindra  
Di ateueh tuanku neumupioh  
Meunan suroh bak baginda

Cut Diwa Akah deungo meunan  
Teusinyom yoh nyan mameh muka  
Teuma neukek bak bale nyan  
Teumpat seumayam doli baginda

Cut Diwa Akah neueh sidroe  
Beungoh uroe leugat jaga  
'Oh ban jaga po samlakoe  
Neubeudoh nyoe jak srah muka

Teuma neutren u peungadapan  
Duek le sajan aneuk raja  
Meunan sabé baranggajan  
Seulawet sinan Cahya Mangindra

Di dalam le aneuk sulotan  
Leubeh saktian muda beulia  
Nyang keudua Damsyek Kaindran  
Keulhee tuan Danta Diwa

Di dalam lhee nyang geuturi  
Leubeh sakti Cahya Mangindra  
Khedmat jroh hana sakri  
Meureundah diri ubak baginda

Peuhina droe hana padan  
Harap gasehan doli sripada  
Timue gaseh deungon sayang  
Bak seukalian aneuk raja

Danta Diwa gaseh han ban  
Miseue badan deungon nyawa  
Dan lagi Damsyek Kaindran  
Nyanpi saban gaseh meusra

Laen nibak nyan aneuk sulotan  
Di jih tuan beunci raya  
Syahdan lagi deungo jinoe  
Karangan muwoe bak baginda

Jinoe ka troh bak uroe Jum'at  
Patot beurangkat Brahman Diwa  
Kareuna lazem meunan adat  
Uroe Jum'at neujak meusuka

Neujak manoe dalam kulam  
Murid sajan ireng baginda  
Nama kulam Dahralfuri  
Brahman Sakti teumpat meusuka

Diwa Danta Damsyek Kaindra  
Lhee sajan ngon Cahya Mangindra  
Ireng Brahman jak bak kulam  
Murid sajan dum seureuta

Saboh sapo jime tabak  
Di dalam beudak langie ngon ata  
Rata bandum jiba sajan  
Meulaenkan nyang tan Cahya Mangindra

Teuma beurkata Damsyek Kaindran  
Ubak tuan Cahya Mangindra  
Pakon hana langie ngon beudak  
Jeuet keu rusak 'aeb nama

Di gop rata dum ngon tabak  
Di gata tajak han sapeuena  
Sambe teusinyom Cut Diwa Akah  
Meunoe neupeugah jaweueb haba

Pane bak lon langie ngon beudak  
Keunoe lon jak sidroe saja  
Hana meuntroe ngon uleebalang  
Pane tuan ureueng nyang ba

Paduka Damsyek seuot yoh nyan  
Na bak ulon ureueng nyang ba  
Asai na langie deungon beudak  
Nyang meumbawak gampang saja

Diwa Dantapi kheun meunan  
Saban-saban jih bandua  
Ban neudeungo haba meunan  
Khem teusinyom muda beulia

Neusuet yoh nyan keumala hekeumat  
Neuse leugat peuet droe raja  
Lheueh nibak nyan na sikeujap  
Raja ban peuet troh le teuka

Jisujud bak Cut Diwa Akah  
Teuma neupeugah le ngon haba  
He syeedara lon ban peuet droe  
Beudak keu kamoe tajak mita

Beu troh tame dalam jeuem nyoe  
Lon jak manoe sajan baginda  
Lheueh nibak nyan na sikeujap  
Raja ban peuet jak mumita

Han padum trep lama jijak  
Troph le beudak keunan jiba  
Seureuta deungon saboh tabak  
Di dalam beudak langie ceundana

Jime le peuet droe uleebalang  
Hireuen teuceungong raja raja  
Jieu saktian Cut Diwa Akah  
Teuhah babah dum sineuna

Seureuta neukheun bak raja peuet droe.  
Udeh gata nyoe ireng baginda  
Jiseuot le deelat ampon  
Patek seuon ban nyang sabda

Ban nyang titah patek junjong  
Tuanku ampon kamoe seureuta  
Bahle teuduek dilee haba nyan  
Muwoe karangan akan baginda

Brahman Sakti jinoe lon seubot  
Teubiet lam kaluet bak neutapa  
Jieu le murit dum seukalian  
Beudoh yoh nyan dum peumulia

Dumji sare sujud khedmat  
Jibri horeumat akan baginda  
Raja peuet droe keumala hekeumat  
Hireuen dahsyat jieu baginda

Jieu Brahman Diwa Sakti  
Hebat han sakri lagee rupa  
'Oh lheueh seumbah seukalian  
Baginda beurjalan laju sigra

Neujak bak kulam Dahralfuri

Ireng doli aneuk raja

Kulam indah hana sakri

Brahman Sakti po areuta

Di bineh kulam dum bak bungong

Geuboh jeumbangan dum peurmata

Ban peuet sagoe bale geupeudong

Hireuen jikalon uleh mata

Geupeulheueh eungkot dum lam kulam

Mataji intan sisek suasa

Geupeugot dua boh naga hekeumat

Bukon 'jab hana tara

Sisekji meuh mata manikam

Pusparagam geuboh keu cula

'Oh takalon hebat han ban

Rasa pulan meunan rupa

Di teungoh kulam analan jroh

Geupeudong saboh singgasana

Taeu jeuoh that seureuloe

Nam boh sagoe bak calitra

Di ateuoh meurcu saboh meurak

Teudong di pucak seulama-lama

Beukit taeu ate galak

Indah meurak hana tara

Paroh nilam ulee manikam

Geuboh intan aneuk mata

Soe nyang kalon ate galak

Sakti nibak Sakti Diwa

Jipot angen meugisa meurak

Ngon meukring-krak meusuara

Sang takalon sayeuep jikeupak

Sang-sang meurak meunan di mata

Buet hekeumat nibak Brahman  
Keusaktian that baginda  
Seubeurmula 'oh tee lheueh nyan  
Diwa Brahman keunan teuka

Troh bak kulam dum sinaroe  
Tren jak manoe raja raja  
Uleebalang wadi meuntroe  
Dum sinaroe ate suka

Ismuraja Paduka Indran  
Me bee-beewan Cahya Mangindra  
Cut Diwa Akah muda bangsawan  
Beudak yoh nyan jicok sigra

Maseng-maseng dalam hidang  
Hireuen jikalon uleh mata  
Kareuna neumanoe sajan-sajan  
Beursiburan sabé muda

Cut Diwa Akah pubuet hekeumat  
'Ajaeb sangat taeu rupa  
Neulambong saboh keusaktian  
Ju ie kulam meubura-bura

Ie ka manyang amat dalam  
Keususahan aneuk raja  
Meulangue-langue timue-teunggeulam  
Aneuk sulotan meugriet raya

Meulangue-langue dum sinaroe  
Muda samlakoe suka teumasa  
Brahman kalon meunan bagoe  
Bak samlakoe neukheun sigra

Neukheun ubak Cut Diwa Akah  
Bek tabalah he aneukda  
Aneuk raja jeh dum sosah  
Tacok pantah hekeumat gata

Cut Diwa Akah cok hekeumat  
Ie jisurot miseue nyang ka  
Aneuk raja manoe leugat  
Sukaan that sabe muda

Ija nyang hanyot hana basah  
'Ajaeb leupah aneuk raja  
Kalon sakti Cut Diwa Akah  
Hireuen dasyah dum sineuna

That bit sakti po samlakoe  
Baginda pujo manusia  
Lheueh nibak nyan abeh manoe  
Beudoh jak woe Brahman Diwa

Woe u gampong Manikam Halam  
Aneuk sulotan ireng baginda  
Cut Diwa Akah neuba sidroe  
U bale nyoe Rungka Cahya

Neuaja hekeumat dum sinaroe  
Muda samlakoe neugaseh raya  
Cit nyankeu buet baranggajan  
Seulawet sinan Cahya Mangindra

Baginda gaseh hana macam  
Nibak seukalian aneuk raja  
Neugaseh keunan nibak laen  
Jadi ngeuren dum ban nyang na

Kureueng sa lhee reutoh nyang troh deundam  
Di dalam hana keulua  
Malaenkan hana Damsyek Kaindran  
Dua sajan ngon Danta Diwa

Nyang laen dum aneuk sulotan  
Marah tuan keu muda beulia  
Hingga teuma bak siuroe  
Muda samlakoe seumbah baginda

Neulakee idin neukeumeung woe  
Keudeh u nanggroe Martagangsa  
Yoh nyan baginda le teusinyom  
Mameh renum ngon ie muka

Seureuta neukheun he aneuk droe  
Deungo kamoe cahya mata  
Bek dilee aneuk gata tawoe  
Gohlom sampoe bak kutika

Tajak u nanggroe Neugara Puri  
Sinan meunjadi fon keurija  
Sinan muprang meungadu sakti  
Indra ngon pari talo ban nyang na

Lagi aneuk tatueng putroe  
That sambinoe hana ngon sa  
Dum tunangan le that sampoe  
Raja nanggroe hana suka

Aneuk raja sikureueng ploh tujoh  
Leungo tuboh miseue geumpa  
Jikeumeung tueng meuh seuneupoh  
Jibeudoh troh mohon gisa

Lheueh jiseumbah teuot Brahman  
Jiwoe yoh nyan bak ayahda  
Cut Diwa Akah mantong sinan  
Deungan Brahman ate suka

Baginda aja uroe malam  
Baranggajan jeuep kutika  
Hingga teutap tinggai sinan  
Nibak Brahman preh kutika

\* \* \* \*

## VII. BEUREUMA DIWA DARI NEGARA PURI

Jinoe laen lon karangan  
Lon seubot nyan laen raja  
Alkisah tadeungo jinoe  
Saboh nanggroe lon calitra  
  
Saboh raja lon hareutoe  
That seureuloe hana tara  
Asai indra bangsa raja nyan  
That pahlawan ngon peurkasa  
  
Le that raja taklok keunan  
Nama raja nyan Beureuma Diwa  
Nama nanggroe Neugara Puri  
Ngon luahpi hana ngon sa  
  
Cukop deungon meuntroe wadi  
Dan lagi mideuen ngon kuta  
Geupeugot kuta tujoh lapeh  
Saboh bareh peuet ploh deupa  
  
Lapeh nyang fon kuta pirak  
Jroh meuhalak puteh safra  
Lapeh dua teumaga kuneng  
Hana bandeng ateudonya  
  
Lapeh nyang lhee geuturab meuh  
Taeu peungeuh trang that cahya  
Lapeh nyang peuet kuta pudoe  
Hireuen laloe soe eu rupa  
  
Lapeh limong kuta intan  
Jroh analan hana tara  
Hireuen mata soe nyang pandang  
Ceumeureulang hu meucayha  
  
Lapeh nyang nam lon peugah kri  
Intan biduri tatah rakna  
Nyanpi indah hana sakri  
Baek seukali 'ajaeb lagoina

Nyang keutujoh kuta meuligoe  
Le that bagoe meutatah rakna  
Beukit taeu hireuen laloe  
Sang bek tawoe dumna gata

Beureuma Diwa aneuk peuet droe  
Ureueng lakoe nyang peurtama  
Namli Diwa sidroe geuboh nan  
Nyang adoe nyan Kusna Raja

Mangindra Pari lom adoe nyan  
Aneuk sultan Beureuma Diwa  
Aneuk nyang keupeuet ureueng binoe  
That sambinoe indah rupa

Seubaek-baek ureueng binoe  
Tan miseue nyoe indah rupa  
Han peue peugah sifeuet putroe  
Baranggasoe cit maklum ka

Lang geumilang bukon bubarang  
Sang buleuen trang yoh purnama  
Dumnan sifeuet putroe intan  
Han teuladan meunan rupa

Rakna Keumala geuseubot nan  
That bit padan deungon rupa  
Keulakuan nama geuseubot  
Lom meusambot ngon suara

Akai jroh that bungong pade  
Teuploh ate ayah ngon bunda  
Neuyue peugot saboh taman  
Beurteuntangan ngon istana

Teumpat putroe beursukaan  
Dalam taman seureuba bunga  
Fon geutanom bungong peukan  
Geunireng nyan deulima dansa

Nyang rot uneun bak siri gadeng  
Di geunireng meulu cina  
Takalon jroh hana bandeng  
Meujandreng taeu jipula

Lom geupeugot saboh kulam  
Jroh hana ban taeu rupa  
Kulam indah that seureuloe  
Ban peuet sagoe batee kaca

Ie jeureuneh hana bagoe  
Jeuet talhoh droe leumah nyata  
Di teungoh kulam saboh bale  
That meudeune taeu rupa

Tujoh pucak tameh saboh  
Analan jroh hana ngon sa  
Di ateueh nyan pucak manikam  
Meuceureulang hu meucahya

Bubong teuma teumaga kuneng  
Geuboh lheueng-lheueng ngon suasa  
Lingka bubong dum meureumboe  
Sikureueng bagoe jeuneh peurmata

Meujampu ngon batee rukham  
Panca logam seundi warna  
Tameh gahru jroh that licen  
Miseue ceureumen ngon lhoh muka

Sepkeu 'oh nan keu hai taman  
Maklum tuan dum nyang baca  
Hana abeh lon karangan  
Sikada nyan bacut saja

Lheueh nibak nyan raja nanggroe  
Tuan putroe keunan neuba  
Ka neupeuduek bak meuligoe  
Dayang sinaroe dum seureuta

Neubri peungasoh nyang seudang-seudang  
Seureuta sajan bita peurira  
Neukeubah jaga tujoh pahlawan  
Dum analan gagah peurkasa

Sajan meuntroe uleebalang  
Kawai sinan putroe muda  
Simalam peuet seun lingka meuligoe  
Meunankeu proe neubri jeumba

Hingga meugah jeuep-jeuep nanggroe  
Jroh that putroe aneuk raja  
Beureuhi ate soe nyang pandang  
Pari mambang indra jindra

Aneuk raja dum seukalian  
Keunan datang dum sineuna  
Jijak pinang putroe intan  
Aneuk sulotan raja raya

Sireutoh sikureueng ploh aneuk sulotan  
Peusep beukai kapai bahtra  
Cukop ase sekalian  
Kapai jalan dum jibungka

Takalon miseue unggah teureubang  
Di teungoh arongan meulumba-lumba  
Neugara Puri jitujuan  
Ate seunang aneuk raja

Han padum trep peulayaran  
Kapai datang u kuala  
Ateueh kuala bandum ka troh  
Jilhom saoh kapai bahtra

Jitet beude meugeureupoh  
Sang ka runtoh nanggroe raja  
Keujruen kuala peurab keunan  
Geujak tanyong pane bahtra

Jipeugah le aneuk sulotan  
Hajat tuan ubak raja  
Keujruen kuala woe u dalam  
Ngadap sulotan Beureuma Diwa

Baginda seudang peunghadapan  
Meuntroe seukalian hade sana  
Keujruen kuala peugah leugat  
Ampon deelat patek hamba

Kapai tuanku teuka le that  
Peunoh sarat di kuala  
Aneuk raja sireutoh sikureueng ploh  
Dum jipioh dalam bahtra

Jikeumeung ngadap syahi alam  
Sideh mantong di kuala  
Raja deungo meunan kalam  
Yoh nyan sulotan meunoe haba

Hoka gata mangkubumi  
Jak taili u kuala  
Tajak tanyong ho peureugi  
Peue geucari pane teuka

Mangkubumi beudoh rijang  
Dayong sampan ubak bahtra  
Ban troh keudeh mubri salam  
Duek le sajan aneuk raja

Mangkubumi beurkataan  
Lon surohan nibak raja  
Neuyue tanyong dumna tuan  
Ho beurjalan peue na haba

Aneuk raja jiseuot le  
Hai mangkubumi deungo hamba  
Sebab kamoe datang keumari  
Kumbang meunyeuri akan bunganya

Kamoe deungo gop hareutoe  
Meugah na sinoe bungong jeumpa  
Hajat ate lon meungpakoe  
Bungong geutoe nyang jroh rupa

Harap kamoe bu meujadi  
Keu 'abdi neutueng hamba  
Nyanteuh hajat hai mangkubumi  
Meunyeurah diri akan baginda

Mangkubumi deungo meunan  
Jikheun nyoe ban jak udehta  
Tajak ngadap baginda sulotan  
U dalam bak bale raya

Teuma beudoh dum beurjalan  
Aneuk sulotan ban sineuna  
Tamong leugat le u dalam  
U bale keumang dum geuhala

Troh u bale aneuk sulotan  
Seumbah yoh nyan poteu raja  
Neuyue duek le atueh keurus  
Maseng geubri atueh kada

Deungon ranup raja yue bri  
Jisambot le aneuk raja  
Pajoh ranup na sigapu  
Teuma meusu poteu raja

Wahe aneuk dum sinaroe  
Trox bak kamoe ureueng tuha  
Peue meukeusud he aneuk droe  
Nyang jeuet sampoe keunoe teuka

Teuma seuot aneuk sulotan  
Seureuta tangan atueh jeumala  
Deelat ampon doli junjongan  
Kalee beurkeunan bak baginda

Harap tuanku neutueng keu namiet  
Miseue neumeuniet saboh sikamba  
Si sampoh broh miseue aneuk miet  
Meunan nyang bit meukeusud di hamba

Raja deungo narit meunan  
Teupike yoh nyan Beureuma Diwa  
Dalam ate kureueng seunang  
Seubab raja nyan kureueng rupa

Aneukku jroh that analan  
'Oh tan sipadan pane gura  
'Oh han kutueng keususahan  
Jih u dalam keunoe dum ka

Lagi aneukkupi sidroe  
Ureueng lakoe sangat that bha  
Beukit kutueng salah sidroe  
Nyanpi dudoe jeuet prang raya

Lam pada nyan raja doli  
Mangirna Pari neuhei sigra  
Deungon baginda syeedara wali  
Saboh nini asai mula

Akai bijak sangat ahli  
Dan lagi umu ka tuha  
Mangirna Pari aneuk na tujoh  
Bandum utoh ngon peurkasa

Deungon nama sinoe lon boh  
Ban tujoh bandum ka raya  
Nyang tuha nan Kusna Pari  
Nama akhi Kusnu Diwa

Nyang keulhee Meureudan Akah  
Nyang peuet geupeugah Danta Sina  
Nyang keulimong Syahi Pardan  
Di leumueng nyan Indra,Sisa

Ismu Diwa nyang keutujoh  
Bandum utoh bak peundeka  
Lagi gagah ngon beurani  
Lagi sakti that peurira

Teuma meusabda raja doli  
Mangirna Pari neubri bahsa  
Baginda kheun ngon isyarah  
Neuyue peugah bak aneuk raja

Mangirna Pari haloh leupah  
Mufom isyarah kheun baginda  
Seureuta neukheun haba meunoe  
Deungo kamoe he aneuk raja

Seupeurti narit nyang ka bunoe  
Peunamiet droe bak baginda  
Sureuta deungon gaseh sayang  
Seupeurti ban sang ayahda

Teutapi bacut keusyugalan  
Nibak sulton ate suka  
Sebab aneuk cit nyan sidroe  
Ureueng lakoe le that teuka

Akhe dudoe jeuet peue sahbat  
Meunan ibarat doli baginda  
Meunan nyang beutoi nibak deelat  
Peue akibat bak dum raja

Aneuk raja seuot bandum  
Meunoe jikheun sama rata  
Bit neueu le kamoe nyoe dum  
Toh nyang neutueng le baginda

Nyankeuh ureueng dapat putroe  
Nyang laen woe hana haba  
Raja deungo meunan kalam  
Keusukaan that baginda

Seureuta lom neusyarah  
Neuyue peugah beu troh haba  
Lom neumarit Mangirna Pari  
Neupeugah kri bak aneuk raja

Jinoe he aneuk raja doli  
Tabeureunti preh troh masa  
Kareuna putroe mantong keuce  
Gohлом bike teuka masa

Lagi akai gohlom sampe  
Mantong lahe aneuk dara  
Aneuk raja deungo meunan  
Keusukaan hana tara

Seureuta jikheun narit nyoe ban  
Patek seukalian suka rela  
Patek lanti deelat ampon  
Baek sithon atawa dua

Nibak bale leugat geutren  
Geuseuon ngon jaroe dua  
Peugot kimah teumpat pioh  
Dang troh tanggoh poteu raja

Teutap haba 'oh nan teudoh  
Dalam pioh aneuk raja  
Jinoe teuseubot peukataan  
Akan sulotan Beureuma Diwa

U istana neuwoe rijang  
Seumayam ngon putroe muda  
Neuduek deungan peurmaisuri  
Dendayangpi ngadap lingka

Neuyue tueng le Mangirna Pari  
Meusajan le ngon aneukda  
Diwa Brahmanpi na sajan  
Sabda sulotan jinoe sigra

Na sikeujap peurheuntian  
Ureueng limong nyanpi ka teuka  
Ban tröh keunan seumbah sulotan  
Duek le sajan rab baginda

Sabda raja yoh masa nyan  
Bak ureueng limong neumeuhaba  
Neukheun bak raja Mangirna Pari  
Meusajan le Brahmana Diwa

Seureuta ngon aneuk ban lhee droe  
Neukheun meunoe bak baginda  
Pakri bicara buet geutanyoe  
Pasai sinarœ aneuk raja

Nibak ate ulon sidroe  
Hana lagee nyoe aneuk raja  
Hana meukeunong bak mata lon  
Han ek mufom bak lon kira

Teuma seumbah Mangirna Pari  
Ampon doli po meukuta  
Meuhan jitueung uleh ate  
Sosah pike ngon bicara

Han jeuet tuanku talawan ate  
Roh di akhe bak seungsara  
Kareuna ate cit sulotan  
Bak seukalian dum angeeta

Rot tatulak le that jalan  
Ngon peuleuheuen tabicara  
Meulaenkan tapreh lhee peuet buleuen  
Tapaban kheun ngon bicara

Lagipi nyan bek teuma  
Sabe patot tuanku raja  
Kareuna tuanku raja rayek  
Pakon teujalok gop le teuka

Akan teutapi dalam kimat  
Dalam ingat bek na lupa  
Lagi han jeuet ubah janji  
Kareuna doli raja raya

Meunan haba Mangirna Pari  
Raja doli ate suka  
Peuet droe raja nyang duek sinan  
Sibeuna nyan han meutuka

Bahle taeu keulakuan  
Tangieng jalan pakri rupa  
Keumah tuto deungon pakat  
Maseng teumpat dum meugisa

Aneuk raja sireutoh sikureueng ploh  
Hana teudoh jak bak raja  
Hana teudoh teubiet tamong  
Jak meuteumeung deungon raja

Neugara Puri rame leupah  
Rakyat barollah sabe teuka  
Lagot meuneukat han peue peugah  
Meuhai murah jicoh lanja

\* \* \*

## VIII. ANEUK RAJA SIKUREUENG PLOH TUJOH

Seubeurmula laen kisah  
Jinoe lon peugah laen calitra  
Jinoe lon seubot Cut Diwa Akah  
Nyang indah samlakoe rupa  
  
Meurunoe hekeumat uroe malam  
Bak Brahman Sakti Diwa  
Tuhan neubri abeh tamam  
Gaseh Tuhan keu cut banta  
  
Bak siuroe Cut Diwa Akah  
Neuseumbah Brahman Sakti Diwa  
Neulakee idin neukeumeung langkah  
Neuharap meuah bak baginda  
  
Seuot Brahman hai intan cut  
Deungo lon seubot cahya mata  
Cit ka dilee ulon peugah  
Jeuoh that langkah mantong gata  
  
Lompi teuma mak tatu'oh  
Jeuoh tanoh manusia  
Tujoh thon burong teureubang  
Ka lon pandang bak kutika  
  
Wahe aneuk tadeungo lon  
Putroe tatueng uleh gata  
Neugara Puri nama nanggroe  
Sinan aneuk droe prang tapuga  
  
Insya Allah tulong Tuhan  
Dum sulutan taklok bak gata  
Abeh dumpeue Brahman peugah  
Hireuen dasyah muda beulia  
  
Di dalam nyan bangket meunyeumbah  
Harap limpah do'a baginda  
Brahman bri saboh cumboi  
Jroh meuloi-loi hana tara

Seureuta neukheun he samlakoe  
Cumboi lon nyoe le that guna  
Nyang beurnama keumala hekeumat  
Jeuet keu ubat pakaian gata

Beukit na kheundak baranggapeue  
Nama kamoe aneuk tacinta  
Teubiet sinoe raja peuet droe  
Cukop sampoe balatantra

Bangsa nibak jen ngon mambang  
Amat pahlawan that peurkasa  
Namajih nyan ulon peutrang  
Lila Mambang.nyang peurtama

Nila Beuranta sidroe geurasi  
Beurantawi nyang keutiga  
Syahid Sikanda nama nyang peuet  
Hai intan cut lon bri keu gata

Neusambot le rijang-rijang  
Peiduek yoh nyan di keupala  
Neuseumbah le Brahman sidroe  
Sira neumoe ngon ie mata

Brahman yoh nyan neucom bak dhoe  
Samlakoe beu troh ban pinta  
Neubeudoh sinan mumat jaroe  
Raja dua droe meucom meuwa

Seureuta neukheun meunoe bagoe  
Muda samlakoe ngon ie mata  
Bek tuwo keu lon dagang gareb  
Ka trok nasib tinggai gata

Jikalee kon ngon grak Tuhan  
Seukali han cre ngon gata  
Teuma seuot raja dua droe  
Sira jimoe nyan bandua

Wahe syeedara ulon paban  
Kheundah Tuhan pakri teuma  
Jikalee kon keusudahan  
Sabe sajan lon ngon gata

Gunong manyang neuek leupah  
Leugat langkah ureueng muda  
Lheueh nibak nyan Cut Diwa Akah  
Neujak pantah le neubungka

Sira neutren atueh gunong nyan  
Beureunti sinan sikutika  
Kareuna uroepi tarek that  
Pioh leugat payah raya

'Oh puleh hek lom neukarat  
Neujak leugat miseue nyang ka  
Teutap dang jak po samlakoe  
Laen jinoe lon calitra

Aneuk raja lon hareutoe  
Nyang awai woe nibak tapa  
Ban sare trohjih u nanggroe  
Jihareutoe bak ayahda

Idin ayah dum keu kamoe  
Meujak u nanggroe Beureuma Diwa  
Meujak pinang tuan putroe  
Aneuk raja nyoe jroh that rupa

Ban jideungo dum le ayah  
Galak leupah dumgeu rata  
Jiyue peusep dum peukakah  
Dum kafilah balatantra

Ase kapai deungon gurap  
Peujap-peujap beuncalang jawa  
Aneuk raja ek le leugat  
Saoh angkat kapai bungka

Padum uroe peulayaran  
Sampoe tuan ho geuhala  
U kuala kapai dum troh  
Jilhom saoh laju sigra

Saoh jitiek meuriam jicoh  
Bunyoe guroh troh lam kuta  
Sabda raja ubak bujang  
Tajak rijang u kuala

Tajak laju nyan tatanyong  
Pakri bangon jaweueb haba  
Meunyo kapai peurdagangan  
Peurab keunan bak syahbanda

Meunyo kapai peurmusohan.  
Teutap sinan di kuala  
Meunan sabda bak sulotan  
Yoh nyan bujang jijak lanja

Ubak kapai sampoe datang  
Ek u dalam kapai bahtra  
Ban troh keunan teungku bujang  
Tanyong yoh nyan jipareksa

Tuan-tuan baro datang  
Keumana jalan dumna gata  
Lon kalon tajak ngon angkatan  
Tet meuriam di kuala

Saleh peue-peue peurusohan  
Sabda sulotan yue pareksa  
Beukit kapai peurjualan  
Peurab u peukan bak syahbanda

Atawa kapai peurmusohan  
Nyanpi tuan tacalitra  
Ureueng kapai seuot meunoe  
Kon kapai nyoe maniaga

Lagi bukon peurmusohan  
Aneuk sulotan raja raja  
Aneuk raja sikureueng ploh tujoh  
Nanggroe jeuoh jarak raya

Hajat ate jak keunoe troh  
Teukeumeung pioh bak lieng raja  
Hajat teupinang tuan putroe  
Salah sidroe nyang neusuka

Soe nyang untong deungon tuah  
Putroe indah nyan po jeumba  
Nyang laen dum woe u nanggroe  
Hana sapeue haro-hara

Abeh narit bujang jiwoe  
Troh sampoe u dalam kuta  
Bak masa nyan baginda sulotan  
Duek seumayam atueh tahta

Sajan meuntroe uleebalang  
Aneuk sulotanpi seureuta  
Bujang jiduek le di sinan  
Angkat tangan peugah haba

Deelat ampon ya junjongan  
Sampoe laman ubak bahtra  
Suara beude nyang meugeucoh  
Sikureueng ploh tujoh aneuk raja

Nanggroe jarak nyoho ka troh  
Keumeung pioh bak meukuta  
Singoh tuanku troh utosan  
Aneuk sulotan yue ba haba

Raja deungo seumbah bujang  
Neukheun yoh nyan pantah sigra  
Neukheun bak raja Mangirna Pari  
Meusajan le Brahman Diwa

Aneuk lhee droe sinan sapat  
Istalat Majat Lila Cahya  
Seugala raja neugara Puri  
Ngadap doli dumteu rata

Sabda raja nyang beurdeelat  
Pakri pakat bandum gata  
Haba singoh teuka surat  
Pakri pakat nyang seujahtra

Seumbah raja Mangirna Pari  
Ampon doli po meukuta  
'Oh troh surat datang keumari  
Baro jadi tabicara

Yue tueng raja sireutoh sikureueng ploh  
Ngon raja ban troh peuduek seureuta  
Di geutanyoe tahei taroh  
Peue nyang gadoh po meukuta

Soe beuran ciit jimuprang  
Di teungoh padang Anta Cahya  
Kareunajih dum le that girang  
Jilandang keunoe jiteuka

Raja deungo meunan macam  
Keusukaan ate raja  
Beuna sangat peurkataan  
Bah jimuprang sabé teuga

Hingga teuma siploh uroe  
Meubunyoe utosan teuka  
Raja deungo meunan bagoe  
Yue tueng jinoe aneuk raja

Aneuk raja sireutoh sikureueng ploh  
Yoh nyan ka troh dum jiteuka  
Na sikeujap bunyoe riöh  
Bandum ka troh aneuk raja

Ban troh keunan junjong doli  
Neuyue duek le maseng kada  
Deungon ranup raja yue bri  
Duek beureunti preh troh haba

Na sikeujap peurheuntian  
Troh utosan surat jiba  
Jitamong le troh u dalam  
Ngadap sulton Beureuma Diwa

Lheueh jiseumbah raja deelat  
Jisurot leugat sigra-sigra  
Seureuta jikheun syahi alam  
Nyang po makam nyang teureela

Patek peuseumbah keu bawah kidam  
Meumbawa salam paduka aneukda  
Patek meumbawa sarat kireman  
Di dalam nyan nyata sabda

Raja deungo keusukaan  
That bijakan ureueng teuka  
Sabda raja yoh masa nyan  
Surat kireman neuyue baca

Nyang that cidah baca surat  
Istalat Majat Lila Cahya  
Yoh masa nyan neubeuet leugat  
Dalam surat meunoe haba

Seumbah sujud seureuta taklem  
Nyang teukirem bak aneukda  
Nyang hina lagi miseukin  
Lagi yatim papa nadra

Aneuk raja sikureueng ploh tujoh  
Nyang baro troh di kuala  
Lon peuek seumbah keu bawah doli  
Harap beurani simata-mata

Niet lon heundak peuhamba diri  
Keu bawah doli harap mulia  
Seubuleh-buleh nyang kamoe harap  
Neupeutroh hajat kamoe nyang teuka

Bit neukalon kamoe le that  
Nyang hakikat sidroe saja  
Soe nyang untong keunan putroe  
Nyang laen woe tan peukara

Kon na hajat meudeh meunoe  
Kareuna kamoe harap seujahtera  
Nyankeu haba dalam surat  
Istalat Majat cit nyang baca

Aneuk raja sireutoh sikureueng ploh  
Leungo tuboh miseue geumpa  
Seureuta ngon jicok surat  
Jipriek leugat di nap raja

Ngon amarah beungehji that  
^o meutat-tat jeuep angeeta  
jiploh surat jitiek 'Oh lheueh  
Teuma jicriek ube-be seuma

He utosan beudoh jak woe  
Narit kamoe keudeh kaba  
Bak raja kah kahareutoe  
Kakheun kamoe nyang po jeumba

Rakna Keumala putroe siti  
Ka lheueh neubri keu aneuk raja  
Putoh narit deungon janji  
Han jeuet mungkiri le bak raja

Jinoe bek le panyang cakri  
Meung beurani kayue teuka  
Di padang Anta sideh kunanti  
Mangat katuri aneuk raja

Sideh kukalon di teungoh mideuen  
Kreh ngon peudeueng gagah peurkasa  
Bit raja kah sang kon ureueng  
Gop boh kareuem jih jak hila

Gop keumawe jih tiek tanoh  
Eungkot teungoh jimeng hila  
Areuta gop jih jak seunoh  
Hana meu'oh raja gila

He utosan got kayue woe  
Kayue jak bloe keutuprak jawa  
Bek meunapsu nyan keu putroe  
Ka na lakoe aneuk raja

Utosan deungo dum habaran  
Seumbah sulotan jiwoe lanja  
Ban troh keudeh peugah ngon trang  
Peurkabaran aneuk raja

Sireutoh sikureueng ploh aneuk sulotan  
That kurangkam po meukuta  
Surat jiploh dum jicang-cang  
Jikheun binatang po meukuta

Meunyo meuhajat that keu putroe  
Jiyue jak bloe keutuprak jawa  
Le that macam jihareutoe  
Dum sinaroe aneuk raja

Meuna gagah ngon beurani  
Sideh jilanti di padang Anta  
Nyang cut putroe hana kubri  
Nyan pat bubiri saboh kaba

Aneuk raja sikureueng ploh tujoh  
Sang teumboh geutop bak dada  
Sang jeuet geumpa leungo tuboh  
Sang ka luroh jeuep angeeta

Seureuta jikheun ngon amarah  
Sideh kubalah di padang Anta  
Seureuta jikheun dum bak rakyat  
Tapeusapat alat seunjata

Singoh beungoh meuna hayat  
Keudeh leugat u padang Anta  
Bak malam nyan minom makan  
Beursukaan sabé muda

Seureuta geupeh ngon bunyian  
Meung geupreh jan teubiet faja  
Aneuk raja sireutoh sikureueng ploh  
Hana teudoh jimeujuara

Ngon bunyian kapah-kapoh  
Bunyoe riöh dalam kuta  
Aneuk raja dum sinaroe  
Peumeugah droe hana tara

Hana teudoh peugot beusee  
Silak bajee di nap raja  
Hana ubah miseue gutee  
Kureueng malee aneuk raja

Simalam beungoh sabé meucruk  
Manok ku'uk hampe faja  
Seugala bungong beurkeumbangan  
Dalam taman peulipor lara

Faja meureukah siblah timu  
Jiteubiet syamsu trang cuaca  
Dalam hijab tiree eumasan  
Aneuk sulotan dum ka jaga

Jak srah babah minom makan  
Ngui pakaian sianeka  
Cukop dumpeue sileungkapan  
Teubiet u padang Anta Cahya

Sajan meuntroe uleebalang  
Pahlawan 'adi bentara  
Peudong kimah dum meureuntang  
Jipreh lawan musoh teuka

Aneuk raja sikureueng ploh tujoh  
Urœ beungoh teubiet lanja  
Sajan meuntroe uleebalang  
Seukalian balatantra

Aneuk raja ngui pakaian  
Lu'lu' intan bl'et-bl'ot cahya  
Jingui meukuta tujoh pangkat  
Bukon hebat taeu rupa

Jiteungoh le dum u darat  
Cukop alat dum seunjata  
Jipeugot kimah dum meureuntang  
Pahlawan mula peurtama

Di likot nyan uleebalang  
Keujruen blang dengon bentara  
Di likot nyan teuma rakyat  
Jijak leugat dumna tantra

Aneuk raja di teungoh kawan  
Meuntroe ngon juhan ireng lingka  
Leugat geutuju u teungoh midan  
Saureuta bunyian meusuara

Nyang ladom ek atueuh kandran  
Ladom teureubang atueuh rakata  
Ladom giduek atueuh jintayu  
Ladom tengku atueuh guda

Ngon geundrang prang geupeh laju  
Meu'u-'u siseun bandua  
Akan baginda raja sulotan  
Tinggai di dalam deungon bentara

Seumayarh di ateueh bangun-bangunan  
Eu peurasan u lua kuta  
Neueu lagee ureueng muprang  
Di teungoh padang Anta Cahya

Kheun le raja Mangirna Pari  
Neuyue gunci pinto kuta  
Seureuta neukheun bak aneuk droe  
Aduen adoe lhee syeedara

Tajak aneuk duek bak pinto  
Taeu laku aneuk raja  
Salah saboh soe nyang talo  
Bek bri tajo dalam kuta

Bek bri tamong nyan u dalam  
Bah jihantam nyan di lua  
'Oh nan sabda raja deelat  
Lon riwayat ureueng ngaza

Bandua blah jiek rapat  
Meuhadap ngon dua tantra  
Ban meuteumeung dua pihak  
Jimeutak hana ban publa

Sideh leumbeng sinoe kapak  
Jilikak geusyik panglima  
Tadeungo su deumpek surak  
Sang meuhayak alam donya

Nyang mate sinan teukeupak  
Nyang rusak jiklik meu'a'-a  
Nyang beurani hana peue kheun  
Miseue rimueng jilet rusa

Nyang teumakot ate geusuen  
Sang kameng plueng ujeuen timpa  
Na sikeujap nyang meunan prang  
Uroe teungoh trang hilang cahya

Kareuna dhoi ka meusagop  
Padang seupot glap gulita  
Hana sapeue keulihatan  
Meulaenkan kilat seunjata

Keudeh keunoe jimeutop tak  
Mate rusak dum meukeuba  
Nyang di meuntroe sabe meuntroe  
Jimeukiloe han ban publa

Nyang pahlawan sabe pahlawan  
Uleebalang meunan juga  
Nyang di rakyat sama rakyat  
Meunan adat bek meutuka

Rusak mate han ek kimat  
Prang maken that nibak nyang ka  
Le that mate keudeh keunoe  
Blahdeh blahnoe dum meutimpa

Darah ile dum u bumoe  
Jeuet jilangoe gajah guda  
Taeu darah miseue ie krueng  
Darah ureueng darah guda

Mate sinan dum teugageueng  
Seulinteueng dalam ie raya  
.Prang raya that hana macam  
Tujoh malam hana reuda

Aneuk raja sikureueng ploh tujoh  
Maken tanggoh prang jingaza  
Ho jipeunap keunan teudoh  
Sang geusampoh safan-safa

Ho jipeukeue keunan seungap  
Ho jipeunap ka seureufa  
Peudeueng raya jiseumangat  
Taeu leunyap dum meukeuba

Le that mate siblah lawan  
That analan aneuk raja  
Sikureueng ploh tujoh aneuk sulotan  
That pahlawan ngon peurkasa

Talo raja sireutoh sikureueng ploh  
le that teudoh rakyat fana  
Nyang na tinggai leugat jiplueng  
Jimeung tamong dalam kuta

Mangirna Pari laju neutham  
Bek u dalam keunoe gata  
Jideungo geutham nibak pinto  
Jiplueng laju dalam rimba

Jiseutot le ka' a-ka'u  
Jipoh laju han jikira  
Hingga teutap ureueng nyang plueng  
Dalam uteuen meuraba-raba

Aneuk raja nyang meunang prang  
Biñeh padang meuseunia  
Ubak raja lom meuriwang  
Sulotan Beureuma Diwa

Neumeusabda raja doli  
Mangirna Pari ngon syeedara  
Seureuta deungon meuntroe wadi  
Jinoe pakri keu aneuk raja

Seumbah meuntroe deelat ampon  
Neuyue jak tueng po meukuta  
Bah jipioh sinoe dilee  
Dudoee teuntee tabicara

Poteu raja yoh nyan neukheun  
Neuyue jak tueng aneuk raja  
Mangkubumi beudoh rijang  
Jak u padang Anta Cahya

'Oh troh keudeh mumat jaroe  
Jihareutoe sabda raja  
Tuanku patek peusurohan  
Bak sulton Beureuma Diwa

Harap neulangkah keudeh u dalam  
Rindu deundam poteu raja  
Aneuk raja deungo meunan  
Tamong yoh nyan dalam kuta

U bale rom laju keunan  
Ngadap junjongan Beureuma Diwa  
Baginda seudang dihadap urang  
Uleebalang raja raja

Peunoh seusak di bale rom  
Hadap bandum poteu raja  
Aneuk raja ngadap doli  
Neuyue duek le yoh nyan sigra

Seureuta geubri ngon keurusi  
Nyang meuseundi mupeurmata  
Deungan ranup geubri sajan  
Dalam puan mupeurmata

Aneuk raja sambot rijang  
Keusukaan that mulia  
Raja kheun bak Mangirna Pari  
Isyarat neubri deungon bahsa

Mangirna Paripi that ahli  
Cit neutukri isyarat raja  
Mangirna Pari tanyong rijang  
Bak aneuk sulton baro teuka

Tajak keunoe dum he teelan  
Peue tuntutan tajak mita  
Aneuk raja seuot leugat  
Dalam surat ka na haba

Nyankeuh kamoe troh beurangkat  
Meuharap gaseh baginda  
Brahman Diwa seuot leugat  
Mantong cut that aneuk raja

Pakri jinoe tameuhajat  
Gohлом trok hat sampoe masa  
Aneuk raja seuot keudroe  
Ampon kamoe nyang mulia

Meunyo ubit tuan putroe  
Lon preh sinoe sithon dua  
Harap meuna karonya limpah  
Rahim dan murah doli baginda

Lheueh jikheun nyan aneuk sulotan  
Peurseumbahan jijok keu raja  
Jeuneh pudoe deungon intan  
Beurlian deungon sukadana

Neuyue sambot rijang-rijang  
Tanda tuan that mulia  
Poteu raja dum bri salen  
Ban lagee tren aneuk raja

Seureuta deungon rakyat laen  
Maseng-maseng ateuh kada  
Seureuta geubri minom makan  
Seukalian aneuk raja

Rame sabé uroé malam  
Ngon peurasan hana tara  
Aneuk raja sinan teutap  
Geubri teumpat ban sikada

Geunap uroé jak meungadap  
Woe bak teumpat 'oh ka seunja  
Cit nyankeu buet tiep-tiep uroé  
Jijak jiwoe ngadap raja

Jipreh rayek tuan putroe  
U nanggroe hana jigisa  
Lawet lawan teuma dudoe  
Teuduek 'oh noe aneuk raja

\* \* \*

## **IX. CUT DIWA AKAH DI TAMAN INDRA SELOKA**

Jinoe laen lon hareutoe  
Bak samlakoe lom meugisa  
Seubeurmula ulon kisah  
Cut Diwa Akah Cahya Mangindra

Neucre di gunong Manikam Halam  
Treh neujalan gunong Angkasa  
Antara gunong nyan saboh padang  
Hireuen teuceungong muda beulia

Neueu jeuoh puteh meululu  
Tanoh gapu naleueng komkoma  
Ban troh keunan pioh siat  
Ka teuingat nyan keu bunda

Sret ie mata le meudrap-drap  
Kareuna trep that ka neubungka  
Inbat maleepi raya that  
Peue akibat 'oh kugisa

Inong raksasa han ek kulukat  
Lom maken that malee mata  
Bunda lon jok ubak Tuhan  
Nyang laen tan na kuasa

Bah kuikot kheun le Brahman  
'Oh sampoe nyan troh di mata  
Teuma teuingat Lang-lang Daranu  
Nama laju le neucinta

Ngon sikeujap troh jilalu  
Lang-lang Daranu sujud sigra  
Seureuta jikheun ya tuanku  
Peue na napsu neuhei hamba

Siri gunong neukeumeung ek  
Siri tasek neukeumeung hala  
Pat na janji ka mubalek  
Pat nyang han ek neuprang kuta

Teuma seuot Cut Diwa Akah  
Wahe ayah lon hei gata  
Lon nyoe hajat jeuoh langkah  
Taseuleuah leh gata

Taba ulon u Neugara Puri  
Raja geurasi Beureuma Diwa  
Lang-lang Daranu ka teusinyom  
Ka jimaklum hajat cita

Beukit meunan tuanku droe  
Bak rueng kamoe neuduek lanja  
Keu geureuda jipeujeuet droe  
Cukop sampoe deungon rungka

Cut Diwa Akah ek le rijang  
Neupasang ateueh geureuda  
Lang-lang Daranu jiteureubang  
Sangat tajam hana tara

Rab meusampoh deungon awan  
Dumnan manyang bak calitra  
Padum uroe jipo sunggoh  
Sampoe troh bak nanggroe raja

Geureuda tren ka jibaroh  
Sampe troh bak padang Anta  
Cut Diwa Akah neubeurjalan  
Sret bak taman Indra Seloka

Taman nyan rab istana putroe  
Sinan sidroe inong tuha  
Nama bibi Sikandawati  
Dilee esteuri tuan syeedaga

Lakoepi mate geuduek sinan  
Pula tanaman sianeka  
Padum ureueng lakee meukawen  
Hana geutem seubab ka tuha

Lom ngon male aneukpi tan  
Han seulindan le keu donya  
Geiduek lam keubon pula bungong  
Peue nyang keunong nibak mata

Cut Diwa Akah tamong keunan  
Dalam taman Indra seloka  
Neueu peurasan macam-macam  
Jeuneh bungong le that rupa

Seureuta ngon buah-buahan  
Han sapeue tan dum seugala  
Cut Diwa Akah neudong sinan  
Leumah geukalon le ureueng tuha

Geukalon rupa indah han ban  
Hireuen mandang hana haba  
Padumna trep meunan bagoe  
Muda samlakoe marit lanja

Hai ma teungku neungieng keunoe  
Neubri keu kamoe peue hade na  
Neubri hai ma ie siteugok  
Lon baro trok keunoe teuka

Yoh nyan bibi ka teukeujot  
Geudeungo narit ureueng teuka  
Seureuta neukheun tatamong keunoe  
Ubak kamoe ma ka tuha

Ka neutamong po samlakoe  
Mumat jaroe sigra-sigra  
Neuyue duek le ubak teumpat  
Neutanyong leugat neupareksa

Pane langkah po samlakoe  
Pajan keunoe troh tateuka  
Pane gampong deungon nanggroe  
Tapeugah soe ibu bapa

Deungon nama tahareutoe  
Pakri sampie keunoe teuka  
Neuseuot le po samlakoe  
Neuhareutoe dum peukara

Nama ulon ma meutuah  
Cut Diwa Akah Cahya Mangindra  
Diwa Laksana nama ayah  
Bangsa nyang sah manusia

Martagangsa nama nanggroe  
Jeuet troh keunoe bak let rusa  
Kheun ma bibi Sikandawati  
Beuna seukali cahya mata

Meukon aneuk raja doli  
Han beurani keunoe teuka  
Kareuna jeuoh peurjalanan  
Kayangan ngon nanggroe donya

Jinoe aneuk pakri seunang  
Beursamaan deungon bunda  
Kareuna lon aneukpi tan  
Sampie badan lon ka tuha

Jinoe aneuk gaseh sayang  
Tadong sajan deungon hamba  
Seuot le Cut Diwa Akah  
Han peue salah he ma raja

Meuka neutem cit peusayang  
Keusukaan nibak hamba  
Ma bibi neudeungo meunan  
Sangat yoh nyan ate suka

Sang meuteumeung peurmata intan  
Keusukaan ureueng tuha  
Neuyue jak pot dum buahan  
Bak seukalian hamba sahya

Jime keunan u hadapan  
Makeuen rijang ri nyang suka  
Nyang han abeh dum sinaroe  
Pajoh keudroe ma Sikanda

Bri ngon teumpat keu samlakoe  
Nyang meusujoe tiree rawa  
Meunankeu buet baranggajan  
Seulawet datang banta muda

Cut Diwa Akah neukhideumat  
Miseue adat raja- raja  
'Oh ka beungoh neuseumanoe  
Neuuet asoe pat nyang leuta

Lheueh seumanoe minom makan  
Lheueh nibak nyan jak pot bunga  
Po samlakoe neuba sajan  
Dalam taman Indra seloka

Ban sare troh u yup bungong  
Duek meunawong yup bak jeumpa  
Neudeungo bungong jimupanton  
Su meualon mangat raya

Ikan beulanak di bawah titi  
Anak tiong maen di pante  
Beurapa lama putroe meunanti  
Baro seukarang tuanku sampe

Bungong peukan balah panton  
Jroh that bangon meusuara  
Kapai beurdiri di singapura  
Angen beurgasak di atueh kurong

Jika lambat tuanku teuka  
Buah masak dimakan burong  
Bungong meulu lom jitaleh  
Nyanpi leubeh that suara

Burong gagak turon mandi  
Mirahpati di dalam kandang  
Jika lama tuanku keumari  
Tuan putri diambek urang

Meunan bandum mubalah-balahan  
Cut Diwa Akah hana haba  
Neupujoe Po sidroe Allah  
Peunoh limpah that kuasa

Lheueh nibak nyan jak pot bungong  
Ngon ma inong ti Sikanda  
Bungong ase leugat neuwoe  
Samlakoe ngon ureueng tuha

Troh u rumoh karang bungong  
Keumeung peutamong dalam kuta  
Cut Diwa Akah sinan sajan  
Neulakee karang nibak bunda

Neubri hai ma ulon karang  
Mangat rijang bek tho bunga  
Yoh nyan teusinyom Sikandawati  
Neupeugah le meunoe sigra

Cuba karang he boh ate  
Lon eu pakri keunarang gata  
Yoh nyan neukarang le samlakoe  
Hana ngon taloe meunan saja

Ban neukalon le ma bibi  
That bit baek neueu rupa  
Allah hai aneuk han tom lon pandang  
Peue geupeunan keunarang gata

Neuseuot le muda samlakoe  
Keunarang nyoe hana nama  
Lon karang ngon cabak jaroe  
Tan meurunoe asai mula

Ma bibi 'ajaeb han bagoe  
Neueu buet jaroe muda beulia  
Bit areh that po samlakoe  
Patot ngon putroe sama padra

Miseue buleuen ngon matauroe  
Meunan bagoe ureueng bandua  
Lheueh neukarang bungong sinaroe  
Teuma neupasoe lam ceurana

Neutop ngon sahab nyang meusujoe  
Indah that bagoe takalon rupa  
Teuma neutanyong le samlakoe  
Keupeue bungong nyoe wahe bunda

Lon kalon neutop ngon sahab sange  
Miseue neumeung me keu raja raja  
Seuot ma bibi Sikandawati  
Bungong nyoe lon me keu putroe muda

Ban neudeungo keu tuan putroe  
Muda samlakoe ate suka  
Neutanyong lom meunoe bagoe  
Peue nan putroe toh ayahda

Nama nanggroe peue geurasi  
Neupeugah kri wahe bunda  
Seuot ma bibi Sikandawati  
Pakon tasudi han tom nyang ka-ka

Ma bibi neuseuot meunoe  
Nama putroe Rakna Keumala  
Nama nanggroe Neugara Puri  
Raja geurasi Beureuma Diwa

Putroe indah hana sakri  
Patot seukali beukit ngon gata  
Seubab elok sama padan  
Peureuseh saban hana beda

Teutapi jinoe ka na tunangan  
Aneuk sulotan kureueng tiga  
Aneuk raja sikureueng ploh tujoh  
Nyang baro troh that peurkasa

Prang raya that meugeureupoh  
Sireutoh sikureueng ploh aneuk raja  
Bandum talo ka jiparoh  
Raja nyang troh leubeh peurkasa

Jinoe mantong sinoe jipioh  
Jipreh umu troh putroe muda  
Cut Diwa Akah neukheun leugat  
Linto le that lagoe hai ma

'Oh tapike sangat 'ajab  
Taloe le that saboh tima  
Bahwa sunggoh po samlakoe  
Ka neutusoe aneuk raja

Murid Brahman dum sinaroe  
Ngon samlakoe cit biasa  
Akan ma bibi Sikandawati  
Neupeureugi dalam kuta

Deungon bungong saboh talam  
Sidroe teubosan nyang meumbawa  
Dang Seundari nyang me bungong  
Leugat neutamong dalam kuta

Sikandawati jak bak wareh  
Seundari keudeh u istana  
Ban sare troh u meuligoe  
Dendayang bloe yoh nyan sigra

Jieu bungong jroh han bagoe  
Keunarang nyoe han tom nyang ka  
Siumu lon han tom kukalon  
Keunarang bungong taloe hana

Bak masa nyan tuan putroe  
Neiduek sidroe atueuh geuta  
Neueu dendayang dum bloe bungong  
Sinan meutamon di bineh raga

Neukheun bak dendayang Manginda Diwi  
Bungong tayue me lon eu rupa  
Nyang ba bungong tahei keunoe  
Nyang laen nyoe pakri rupa

Yoh nyan jihei le dendayang  
Bungong rijang keunan jiba  
Dang Seundaripi troh keunan  
Seumbah yoh nyan putroe muda

Putroe kheun le yoh nyan pantah  
Cuba peuleumah bungong gata  
Dang Seundari le jipeuhah  
Jipeuseumbah ngon-ngon raga

Cok sitaloe putroe lihat  
Bukon 'ajab hana tara  
Keunarang nyoe bit indah that  
Saleh pat-pat nyang keurija

Salang keunarang sidumnoe got  
Beukit nyang peugot leubeh ganda  
Putroe kheun bak Dang Seundari  
Bak ma bibi tacalitra

Takheun singoh datang keumari  
Nyang meuseuti han jeuet hana  
Lon meung meurunoe karang bungong  
Tayue tamong ureueng tuha

Meuhana troh esok pagi  
Ma bibi keunong meureuka  
Meunan takheun hai Seundari  
Jak keumbali keudeh lanja

Dang Seundari leugat jiwoe  
Troh sampoe u rumoh tangga  
Bak ma bibi jihareutoe  
Haba putroe jicalitra

Neuyue tamong uleh putroe  
Keumeung meurunoe karang bunga  
Meuhana trok neukheun paloe  
Tuan putroe pumeureuka

Pada masa jihareutoe  
Samlakoe sinan seureuta  
Ka teusinyom 'oh leumah gigoe  
Neudeungo putroe keumeung beulaja

Ma bibi deungo narit putroe  
Kuyut asoe ureueng tuha  
Seureuta neukheun narit meunoe  
Pakri kamoe ya Rabbana

Neupoh meuhat uleh putroe  
Han jeuet kamoe karang bunga  
Maken sosah hana bagoe  
Samlakoe bacut teurtawa

Seureuta neukheun he ma bibi  
Bek kiam le he ma raja  
Cit neubri jeuet uleh Tuhan  
Na rot jalan bak aneukda

Lon bri saboh lalat hijo  
Ho jilalo nyankeu tanda  
Pat nyang jidong lalat hijo  
Jarom laju keunan neuba

Na sikeujap beungoh uroe  
Ma bibi sidroe baro jaga  
Neujak peugoe aneuk lam rumoh  
Bek le kaeh he beulaga

**Jibeudoh le ka'a-ka'u**  
Ladom teungku jak pot bunga  
Nyang ladom peurab u dapu  
Jak taguen bu ngon ie kahwa

**Na sikeujap ase bungong**  
Ka meutamon saboh raga  
Bupi lheueh dalam hidang  
Jibet rijang keu ureueng muda

**Neupajoh bu po samlakoe**  
Nekmat ka troe 'oh mumada  
Ma bibi jak makeuen dudoe  
Dum sinaroe aneuk nyang na

**Bupi lheueh cok ngon bungong**  
Ka neutamong u istana  
Ban sare troh u meuligoe  
Leumah putroe duek le sigra

**Neubri ngon ranup teuma dudoe**  
Neusambot nyoe ngon mulia  
Neupajoh ranup na sigapu  
Marit laju putroe muda

**He ma bibi lon yue jak eu**  
Na peue napsu lon bak gata  
Lon meurunoe karang bungong  
Miseue bangon nyang ka taba

**Ban neudeungo narit meunan**  
Teusinyom yoh nyan ureueng tuha  
Neucok bungong mat bak jaroe  
Neupeurunoe putroe muda

**Jarom neumat siblah uneun**  
**Lalat jidong ateuh bunga**  
**Pat nyang jidong lalat hijo**  
**Jarom laju neutop lanja**

Meukarang le bungong keudroe  
Tan ngon taloe jarom saja  
Sabe jingieng keunan putroe  
'Ajaeb taloe ureueng tuha

Fon beungoh kon troh cot uroe  
Sabe putroe keunan mata  
Ho maken trep maken laloe  
Lalat pindoe dong bak mata

Putroe paroh le ngon jaroe  
Keudeh jiwoe ubak bunga  
Pat nyang jidong lalat hijo  
Jarom tajo keunan lanja

Putroe kalon 'ajab tahe  
Lalat hijo le bicara  
Ho maken toe putroe peurab  
Maken rapat ureueng tuha

Bak mata lom jidong lalat  
Ka jikap bak iku mata  
Putroe kheun le ngon amarah  
Lalat bedeu'ah le bicara

Geutanyoe teungoh beulaja keumarang  
Lalat suang dong bak mata  
Lalat neupoh deungon jaroe  
Teukeujot nyoe ureueng tuha

Lalat mate gop nyan teukeujot  
Jarompi sret pura mita  
Seureuta neukheun ubak putroe  
Got uroe nyoe karang nyang na

Lakee idin neukeumeung woe  
Lagi uroe ka poh dua  
Seuot putroe jeuet tariwang  
Singoh dendayang lon yue teuka

Lon yue dendayang jak pot bungong  
Dalam taman Indra seloka  
'Oh lheueh marit deungon putroe  
Ma bibi woe le neugisa

Troh u rumoh bak samlakoe  
Neueu sidroe sinan saja  
Neutanyong le ka lheueh manoe  
He samlakoe cahya mata

Kadang meubupi eit gohlom  
Bungong teuprom kadang lapa  
Neuseuot le gohlom makan  
Manoepi tan lon preh bunda

Teusinyok Sikandawati  
Seunang ate ureueng tuha  
Beukit meunan he samlakoe  
Tajak keunoe manoe sigra

Neubeudoh le rijang keudroe  
Neujak manoe yoh nyan sigra  
'Oh lheueh manoe jak pajoh bu  
Sajan teungku ti Sikanda

'Oh lheueh bu pinah hidang  
Ngui bee-beewan sianeka  
Neutanyong hai di meuligoe  
Haba putroe Rakna Keumala

Pakon tatanyong po samlakoe  
Dilee baroe han tom nyang ka  
Neuseuot le hai ma badan  
Lon meuayang pura-pura

Syahdan teuma uroe malam  
Neueh tiduran malam jula  
Beungoh uroe cahyapi trang  
Beudoh rijang jak srah muka

Hidang geubet bu neupajoh  
Teuma mneuteuoh haba nyang ka  
Kheun ma bibi he samlakoe  
Tamakeuen jinoe cahya mata

Kareuna baroe sabda putroe  
Dendayang keunoe neuyue teuka  
Ka teusinyom po samlakoe  
Neumakeuen jinoe pantah sigra

'Oh lheueh makeun neusrah jaroe  
Dendayang dua droepi ka teuka  
Dendayang jiek laju keunan  
Duek le sajan ma Sikanda

Jieu sidroe ureueng agam  
Hana lawan indah rupa  
Hireuen jikalon po samlakoe  
Dalam nanggroe han sapat sa

Saleh supo cit aneuk nyoe  
Hana meunoe laen rupa  
Jisangka aneuk Diwa Mambang  
Hireuen mandangji bandua

Ka neutanyong le ma bibi  
Bila keumari dayang dua  
Peue neusuroh le putroe ti  
Bak ma bibi namiet tuha

Dayang dua baro teukeujot  
Jideungo narit ma ti Sikanda  
Teuma jikheun narit nyoe ban  
Lon surohan putroe muda

Ma bibi yue panggelan  
Deungon bungong cit neuyue ba  
Kheun ma bibi he dendayang  
Sinoe diam siat gata

Ulon jak pot bungong keumang  
Lon woe ninan tajak lanja  
Kheun dendayang he ma bibi  
Lon peureugi sajan gata

Lon jak kalon taman indah  
Nyang meugah Indra seloka  
Ma bibi nyan tren le langkah  
Dendayang sahpi seureuta

Sira neujak jihareutoe  
Jitanyong soe ureueng muda  
Lon eu rupa that samlakoe  
Hana meunoe laen nyang na

Wahe dayang deungo kupeugah  
Cut Diwa Akah geuboh nama  
Diwa Laksana nama ayah  
Nanggroe nyang sah Martagangsa

Manusia bangsa gop nyan  
Nyang leubeh nyan nibak nyang na  
Jak meurusia peurburuan  
Sisat gop nyan troh keunoe ka

Ulon tueng keu aneuk angkat  
Sebab jroh that budi bahsa  
Lheueh marit geujak leugat  
Troph bak teumpat geupot bunga

Bungong geupot ka seuleusoe  
Teuma geuwoe yoh nyan sigra  
Troph u rumoh nyan ban lhee droe  
Bungong geupasoe lam ceurana

Geutop ngon sahab nyang meusujoe  
Dendayang dua droe neuyue bawa  
Ma bibi jak yoh nyan rijang  
Ngon dendayang sama-sama

U meuligoe sampie datang  
Neuek rijang ma Sikanda  
Bak masa nyan tuan putroe  
Neuduek sidroe atueh geuta

Bak peuranginan tingkap meuligoe  
Neueu sampie ma Sikanda  
Trok ma bibi Sikandawati  
Com di gaki putroe muda

Neusapa le putroe siti  
E ma bibi ka trok teuka  
Keunoe taduek rab ngon kamoe  
Tapeurunoe beu seumporna

Jrok that hai ma keunarang baroe  
Galak kamoe hana tara  
Ban neudeungo haba putroe  
Ma bibi nyoe duka cita

Pakri jinoe kupeurunoe  
Han jeuet kamoe lalat hana  
Lalat hijopi ka neupoh  
Soe peuleumah nyan keu hamba

Ate ma bibi sangat gundah  
Neukheun pantah meunoe haba  
Hana.jeuet le po cut ampon  
Eleumee lon nyankeu nyang na

Laen nibak nyan hana mufom  
Beukit neupoh lon laen hana  
Putroe deungo kheun ma bibi  
Neuiem putroe ti han le haba

Seumbah putroe com di gaki  
Tren ma bibi langkah gisa  
Trok u rumoh ma bibi woe  
Banta sidroe tanyong haba

Peue na haba wahe ma droe  
Tuan putroe yue tueng gata  
Peue na salah peurbuatan  
Nyang surohan putroe muda

Sikandawati ka teusinyom  
Seureuta neukheun meunoe ha.ba  
Lon neuyue tueng uleh putroe  
Yue peurunoe karang bunga

Neuyue peulheueh keunarang baroe  
Nyankeuh kamoe neuyue teuka  
Teuma lon kheun han lon tu 'oh  
Jarom gadoh han meuho ka

Sebab lalatpi ka neupoh  
Nyankeu gadoh akai hamba  
Cut Diwa Akah khem teusinyom  
Mameh renum ngon ie muka

Lheueh nibak nyan jak beuradu  
Lam keuleumbu teumpat nyang ka  
Seubeurmula lon hareutoe  
Dendayang baroe peugah haba

Jipeuseumbah ubak putroe  
Ureueng lakoe jroh that rupa  
Po cut ampon sidroe ensan  
Bak makam bibi Sikanda

Samlakoe jroh hana lawan  
Na miseue ban gamba di peuta  
Elok maneh hana macam  
Sapatpi tan meunan rupa

Lang geumilang cahya badan  
Muka na ban buleuen purnama  
Ladat mata patek pandang  
Teuceungong han sapeue haba

Siumu lon po cut ampon  
Tan lon kalon meunan rupa  
Ie muka jroh that meualon  
Meukek meutren taeu cahya

Beukit jieu le ureueng duson  
Jipeugah kon manusia  
Narit meujeulih supan santon  
Bak agak lon aneuk raja

Di dalam nyan patek sudi  
Bak ma bibi sajan gata  
Pane ureueng han lon turi  
Hai ma bibi sajan gata

Kheun ma bibi nyankeu ensan  
Aneuk sulotan Diwa Laksana  
Martagangsa nama makam  
Luah han ban rame raya

Nama gop nyan Cut Diwa Akah  
Bukon cidah hana tara  
Jeuet keunoe troh sampoe jalan  
Peurburuan paroh rusa

Tinggai meuntroe uleebalang  
Sampoe datang troh keunoe ka  
Putroe deungo nyan jipeugah  
Sang aruwah ka keulua

Salang haba ban gop peugah  
Beukit leumah pakri rasa  
Lheueh nyan putroe jikheun nyoe ban  
He kak dayang that peurbula

Narit gata lon pikekan  
Agak lon tan tapeugah na  
Ban jideungo narit putroe  
Bandua droe khem teurtawa

Ngon jiseumbah tuan putroe  
Jibet jaroe le bandua  
Neukheun po cut kamoe sulet  
Na padum blet meunoe nyang ka

Jameun masa padum lawet  
Han tom siblet nyang peurbula  
Meulaenkan nyang ka na lon pandang  
Nyang leubeh trang ngon dua mata

Tuan putroe lom kheun yoh nyan  
Tajak keunan lom bandua  
Tajak kalon mantong sinan  
Na deungon tan tawoe lanja

Na sikeujap keudeh sampoe  
Bandua droe tamong lanja  
Leumah jikalon Cut Diwa Akah  
Bak bale indah neumeuseunia

Nibak jaroe jieu keureutah  
Teungoh neutuleh peue nyang suka  
Dendayang dong bandua droe  
Hana sapeue jimeuhaba

Tahe hireuen pandang laloe  
Sang kameng troe pajoh buga  
Hana sapeue jeuet jimirit  
Nyang na mumet-met aneuk mata

Jikalon rupa jroh that keubit  
Jikeumeung marit sang han daya  
Akan proe hai muda samlakoe  
Neupura iem droe han neusapa

Dendayang dong sinan lakoe  
Banta iem droe hana haba  
Na sikeujap jidong sinan  
Marit yoh nyan dalam dua

Nyoekue saleh Cut Diwa Akah  
Nyang geupeugah indah rupa  
Teuma seuot le nyang sidroe  
Agak lon nyo laen hana

Lon eu rupa jroh samlakoe  
Lam nanggrœ nyoe han sapat na  
Han tom lon eu rupa meunoe  
Seulama kamoe pandang donya

Nyoekueh lon eu rupa cidah  
Meung Diwa Akah laen hana  
Seuot sidroe jipeugah bit  
Ban gata marit sabet beuna

Cuba tanyong ho ma bibi  
Suroh putroe ti geutanyoe dua  
Teuma jitanyong le jisudi  
Jibeurani dendayang dua

Nyo tuanku Cut Diwa Akah  
Neutulong peugah hoka Sikanda  
Hoka ma bibi Sikandawati  
Tuanku neubri jaweueb lanja

Muda samlakoe teuma seuot  
Deungon patot kon ngon gasa  
Cut Diwa Akah nyo nama lon  
Keupeue tatanyong bunda hamba

Peue meukeusud cuba takheun  
Mangat seunang lon calitra  
Ban jideungo le dendayang  
Keumanisan ngon suara

Lom deungon su leumah leumbot  
That mupatot deungon rupa  
Yoh nyan dendayang ka jiseuot  
Sajan jibot jaroe dua

Lon surohan tuan putroe  
Neuyue kamoe jak cok bunga  
Pat tuanku bunda jinoe  
Hajat kamoe lakee bunga

Banta seuot ka lam keubon  
Jak pot bungong meulu cina  
Dendayang dua sinan jidong  
Lale jikalon neutuleh gamba

Jieu neutuleh macam-macam  
Hireuen dendayang hana tara  
Jikalon meurak meugambaran  
Kheun dendayang meunoe haba

Adat meujeuet keu meurak bit-bit  
Indah sangat hana tara  
Muda samlakoe ka teusinyom  
Seureuta neukheun meunoe haba

Beukit na nyawong meurak lon nyoe  
Na ureueng bloe ubak gata  
Jiseuot le jikheun meunoe  
Bak patek nyoe han kuasa

Beukit neubri kamoe puwoe  
Keu putroe Rakna Keumala  
Beukit jeuet nyoe keu meurak sunggoh  
Padum yum neuboh kamoe calitra

Pakri ek jeuet tuanku ampon  
Meurak tulesan neuyue bawa  
Neuseuot le he kak dayang  
Nyankeuh kalam sia-sia

Nyang boh nyawong cit meung Tuhan  
Jen ngon ensan hana daya  
Peue cit bunoe lon meuayang  
Teulanjoran kon lon saja

Yoh nyan dendayang teukhem galak  
Bit that bijak ureueng muda  
Bit tuanku bunoe wayang  
Sangkira nyan ek na nyawa

Lheueh nibak nyan Cut Diwa Akah  
Neuek bagah duek bak geuta  
Na sikeujap duek beureunti  
Trok ma bibi ka neugisa

U rumoh ka neuek pantah  
Cut Diwa Akah duek seureuta  
Ma bibi kalon dendayang  
Yoh nyan rijang neupareksa

Pane tajak he dendayang  
Peue surohan putroe muda  
Jiseuot le bandua droe  
Suroh putroe mita bunga

Nyankeu jeuet troh keunoe sampoe  
Trep ka bunoe hana cut ma  
Beukit meunan he dendayang  
Kaek rijang keunoe lanja

Ban jideungo ha ba meunan  
Jiek yoh nyan laju sigra  
Cut Diwa Akah jiseumbah le  
Ngon ma bibi sama-sama

Jiduek leugat jibeureunti  
Ranup geubri le Sikanda  
Cut Diwa Akah beudoh leugat  
Neuhei sahbat jen raksasa

Neukheun nama Lang-lang Daranu  
Trok le laju ngon siklep mata  
Jikheun ampon he tuanku  
Peue na napsu neuhei hamba

Neuseuot le wahe bapak  
Dua meurak lon peulara  
Taeu rakan toh nyang bijak  
Tayue lop bak meurak gamba

Tayue marit peue nyang patot  
Nyang karot bek tabri buka  
Lang-lang Daranu seumbah sujud  
Bek teumakot gampang saja

Lam gamba jiyue lop leugat  
'Oh ka troh hat kakeulua  
Makanan kah di atueh kee  
Jeuep-jeuep watee lam kukira

Di kah nyoe buet kupeureulee  
Di lon kuthee nyang jroh saja  
Lheueh marit Lang-lang Daranu  
Jiwoe laju seumbah banta

Jen dua droe nibak hantu  
Jilop laju dalam gamba  
Cut Diwa Akah teubiet rijang  
Jak duek sajan ma Sikanda

Meurakpi troh keunan datang  
Jiteureuban nyan bandua  
Jisujud bak Cut Diwa Akah  
Jiseumbah ngon sayeuep dua

Sifeuet meurak deungo lon peugah  
Bukon cidah hana tara  
Tuboh hijo miseue zamrut  
Bulee yakut ngon peurmata

Bulee iku panyang lanjot  
Meuharot takalon rupa  
Mata nibak manikam mirah  
Teuma di babah meutatah rakna

Sisek gaki pudoe intan  
Geumeurlapan that meucahya  
Saboh inong saboh agam  
Meurak nyan sijudo dua

Jidong di nap Cut Diwa Akah  
Jiseumbah ngon sayeuep dua  
Ma bibi ka teuhah babah  
Tan sipatah meusuara

Dendayangpi tahe mandang  
Hana kalam sikrak haba  
Jieu meurak jroh hana ban  
Di hadapan banta muda

Jimeunari syae madah  
Mangat leupah ngon suara  
Meunoe bangon jimupanton  
Mula fon buka suara

Puan di pingge sireh di dalam  
Peursantapan Diwa Nur Mali  
Tuanku raja nyang beurseumayam  
Patek datang meunjunjong doli

Sira jikeupak deungon sayeuep  
Teuma jisujud com di gaki  
Nyang ka mupanton meurak agam  
Jinoe he teelan meurak padusi

Meurak inong dong rab agam  
Surot keudeh lom hai suami  
Kukeumeung sujud bak baginda  
Kuseumbahnya com di gaki

Seureuta jikheun syae madah  
Rancak babah meurak padusi  
Faja sidek meuneurangkan nyata  
Bintang timu cahya beundeurang

Tuan kam̄i ureueng beurbangsa  
Sudah meusyeuhu seugala alam  
Taeu jigrop meugisa-gisa  
Bandua inong ngon agam

Dendayang ngon ma Sikanda  
Bandua ka tahe rmandang  
Biet areh that Cut Diwa Akah  
Meunan jipeugah le dendayang

Di ma bibi teuhah babah  
Han sipatah teubiet kalam  
Teuma dendayang jibet jaroe  
Jimohon droe heundak pulang

Teusinyom le po samlakoe  
Neukheun meunoe peurkataan  
Nyan pat meurakkah tapuwoe  
Keu cut putroe peurseumbahan

Seureuta panton neukheun keudroe  
Meunoe bagoe fon mulaan  
Bunga pandan dalam ceurana  
Lipat rindi tuliskan kata

Ini peurseumbahan dagang nyang hina  
Akan peurbuatan maenan mata  
Lom sikrak treuk neumupanton  
Jroh meualon ngon suara

Pokok mamplam beunua Cina  
Pohon rampak peunghibur hati  
Katakan seumbah dagang nyang hina  
Niatnya heundak peurhamba diri

Dendayang deungo bunyoe panton  
Khem teusinyom ngon Sikandawati  
Nibak ate cit mufom ka  
Maklum teuma ka jituri

## X MEUTURI NGON PUTROE RAKNA KEUMALA

Dendayang tren le jigisa  
Bandua ka jipeureugi  
Troph sampoe bak pinto kuta  
Jipareksa le keumisi

Jitanyong le pane gata  
Fon baroe ka ule-ili  
Cuba peugah peue keurija  
Bek doseuta nyang meuseuti

Jiseuot le bandua droe  
Tuan putroe yue peureugi  
Bungong meulu neuyue jak bloe  
Bak keubon nyoe Sikandawati

'Oh lheueh marit leugat jiwoe  
Troph bak putroe com di gaki  
Tatkala nyan cut sambinoe  
Di seuramoe neubeureunti

Deungon dendayang dum sinaroe  
Lingka putroe kanan kiri  
Jipeuduek le meurak ragoe  
Di nap putroe nyang juhari

Bak masa nyan tuan putroe  
Hireuen laloe hana sakri  
Neueu meurak nyan dua boh  
Bukon le jroh hana sakri

Inong saboh agam saboh  
Cut putroe jroh 'ajaeb diri  
Putroe tanyong wahe kakak  
Pane meurak bawak keumari

Lon kalon jroh that meusigak  
Sang-sang galak lon kalon hi

Yoh nyan dendayang peuek seumbah  
Bak Cut Diwa Akah ampon doli

Keu po cut geuyue peuseumbah  
Tanda ikhlah akan bakti  
Abeh jipeugah akhe ngon fon  
Deungan panton sama seukali

'Ajaeb patek po cut ampon  
Han tom lon kalon that bit sakti  
Sampoe meurak jimeusyae  
'Ajaeb ate patek ini

Putroe deungo kheun dendayang  
Meugeulumbang dalam ate  
Sang adat jeuet meundapatkan  
Rasa meunan bak putroe ti

Dang-dang putroe neumeututo  
Meurak tajo datang keumari  
Jidong di nap tuan putroe  
Sayuep jaroe meureundah diri

Seureuta jikheun narit meunoe  
Ampon kamoe po cut siti  
Deungan panton jikheun sajan  
Jroh that ragam mangat bunyi

Ganceng eumas di dalam peuti  
Dirampah uleh tukang meunatu  
Patek unggah baro di sini  
Akan meunjunjong doli tuanku

Teuma jibalah le meurak inong  
Su meudeungong miseue bangsi  
Ureueng deungo dum teuceungong  
Meurak inong jikheun nyanyi

Burong pipit teureubang beurdua  
Sang-sang galak lon kalon hi  
Patek nan burong dari angkasa

Saya meungadap cut po doli

Abeh mabok dum dendayang

Bukon 'ajam meurak meunari

Apalagi putroe intan

Keusukaan hana sakri

Sampoe haba dum meuhayak

Meugah meurak bak putroe ti

Jimeututo sangat rancak

Troh meugah bak raja doli

Poteu raja ate galak

Neudeungo meurak bak putroe ti

Bak masa nyan leugat neujak

Deungon cut nyak peurmaisuri

Deungo aneukpi na sajan

Aneuk agam lhee seukali

Namli Diwa sidroe geuboh nan

Nyang adoe nyan Mangindra Pari

Nyang keulhee Kusnaraja

Ireng ayahda neupeureugi

'Oh troh keudeh poteu raja

Bak seulasa neubeureunti

Neuyue jak eu putroe muda

Troh le lanja neupeureugi

Neuseumbah le ayah bunda

Ngon syeedara dum seukali

Mangat ate poteu raja

Bandua paduka suri

Neueu pareh that aneukda

Ayah bunda sijuek ate

Neumarit le raja nanggroe

Ubak putroe neupeugah le

Tayue jak tueng meurak keunoe

Gop peugah nyoe jimeunyanyi

Lon keumeung eu pakri bagoe  
Kakanda nyoe suka ate  
Putroe neuyue bak dendayang  
Jak tueng rijang meurak ahli

Jibeudoh le jibeurjalan  
Trok le datang bak meurak ahli  
Dendayang kheun le bak meurak  
Gata neuyue jak le putroe ti

Tajak keunoe mangat lon ba  
Ubak raja deungon suri  
Meurak deungo meunan sabda  
Teureubang lanja ngon esteuri

Ban sare troh keunan sampoe  
Peureundah droe junjong doli  
Seumbah raja deungon putroe  
Sinaroe peurmaisuri

Ka jibet ngon sayeuep dua  
Di nap raja jimeunari  
Deelat ampon patek hamba  
Meu'ah deesya jaroe gaki

Seureuta ngon jikheun panton  
Mula fon-fon nyan esteuri  
Dari Rangon akan Peutani  
Simpang eumpat jalan satu

Alang keudua patek jalani  
Akan meungadap doli tuanku  
Lom sikrak treuk jikheun panton  
Su meualon kon sigeutu

Gunteng keureutah di ladang peuti  
Digunteng deungon gunteng kaen  
Patek nan unggah si Rapikah  
Deungon peurintah buleh beurmaen

Teuma jibalah le meurak inong  
Jroh that bangon jimeunyanyi  
Aneuk meureubok keutitiran  
Aneuk beulatok teureubang keu desa

Tuanku mabok deungo-deungoran  
Sebab si kutoh bawak teumasa  
Timbon batu di jalan gaki  
Di timbon sampe di atueh jeurat

Ampon tuanku raja doli  
Patek ini khadamnya deelat  
Meunan panton meurak inong  
That teuceungong raja deelat

Peurmaisuri bek tatanyong  
Sangat keunong bak neulihat  
Dum dendayang bek tapeugah  
Babah teuhah peunoh lalat

Jideungo su mangat leupah  
Hireuen dasyah nyang na lihat  
Tatkala nyan Mangindra Pari  
Teuduek pike fam ibarat

Peurbuatan nyoe ureueng ahli  
Eleumee sakti teuntee meuhat  
Saleh supo meurakeu nyan  
Pakon meunan cidah that-that

Neumeung peugah bak junjongan  
Takot sinan jeuet meularat  
Mangindra Pari that budiman  
Akai tajam ngon ijtihat

Barang peue buet ngon peulahan  
Kon barangjan ngon meukarat  
Seubeurmula didalam nyan  
Doli junjongan neumeusabda

Neuyue peugot le rante meuh  
Geuboh diateueh dum peurmata  
Takalon hu cahya peungeuh  
Rante meuh ngon mutiara

Neuboh bak gaki meurak dua boh  
Bukon le jroh hana tara  
'Oh ban neuboh pruh jibeudoh  
Bandua boh seumbah raja

Seureuta ngon jimupanton  
Bak agam fon mula-mula  
Syah beurdeelat mambang Sikanda  
Bungong jeumpa tiga beurkarang

Limpah karonya doli baginda  
Teurima gaseh bukon bubarang  
Teuma seuot meurak inong  
Jroh that bangon mangat suara

Takoh keudundong ateueh pante  
Jatoh teurleutak keu timung jati  
Suka teurceungong mak di pagi  
Indahnya tidak lagi teurpeuri

Lheueh jikheun nyan jigrop rijang  
Lam ribaan Candra Lela  
Seureuta jikheun takalon nyoe  
Rante kamoe jroh lagoina

Seudeukah doli raja nanggroe  
Mee lon pakoe kak beurkata  
Mee ulon ngui atawa han  
Beu takheun nyan da le gata

Teuma jicoh nibak susu  
Ate seuu meurak dua  
Candra Lela that teukeujot  
Rasa saket hana tara

Bit meurak nyoe coh geutanyoe  
Hana mupeue ngon kareuna  
Seuu raya mangat asoe  
Gaki jaroe rante ka na

Teuma jikheun meurak jantan  
Hai kak dayang bek marah raya  
Kareuna ka leupah lon meuayang  
Hai kak intan Candra Lela

Akan baginda suka galak  
Neukalon meurak jimeuseunda  
Peurmaisuri khem meukhak-khak  
Neukalon meurak ngon Candra Lela

Ban jikalon le meurak inong  
Meurak agam teungoh meuseunda  
Beungehji that hana macam  
Jicoh yoh nyan bak keupala

Jicoh bak ulee meurak agam  
Seureuta kalam meunoe haba  
Agam bajeueng hana malee  
Salang di nap kee kueu teumasa

Beukit di likot beurapa lagi  
Adat barangri kameuseunda  
Seureuta jipoh lom ngon sayeuep  
Han sapeue jeuet jibeukata

Teuma jiplueng meurak agam  
Jimeusom jipadok muka  
Jimeusom di likot putroe  
Khem sinaroe ban sineuna

Poteu raja hireuen laloe  
Meurak ragoe jimeuhaba  
Lheueh nibak nyan raja deelat  
Neubeurangkat u istana

Maseng-maseng woe bak teumpat  
Maseng adat teulah nyang ka  
Makeuen minom beursukaan  
Uroe malam le ho seunja

Rakna Keumala putroe intan  
Bak malam nyan teungeut hana  
Dalam ate rindu deundam  
Rasa jipandang muda beulia

Hingga beungoh uroe siang  
Putroe intan beudoh sigra  
Jimeuheu le ngon dendayang  
Nyang geuboh nan Candra Lela

Troh le keunan bandua droe  
Seumbah putroe Rakna Keumala  
Seureuta jikheun meunoe bagoe  
Tajak jinoe gata dua

Bak samlakoe Cut Diwa Akah  
Meunoe tapeugah sikrak haba  
Takheun saleuem deungon seumbah  
Keu Cut Diwa Akah nyang mula

Ceurana Beurisi gandom  
Ambong-ambong di dalam buloh  
Haba surat teulihat beulom  
Meukunjong-kunjong datang meunyeumbah

Ambong-ambong di dalam buloh  
Kutep deulima deungon tangkenya  
Sikeujap-keujap datang peusuroh  
Bagaimana karangan akhenya

Dendayang jak leugat pantah  
Bak Diwa Akah taman Saluka  
Ban troh keunan ka jiseumbah  
Dendayang peugah le ngon haba

Tuanku ampon nyang troh kamoe  
Saleuem putroe keu meukuta  
Seureuta jikheun syae nyanyoe  
Miseue bunoe putroe baca

Cut Diwa Akah khem teusinyom  
Deungon panton meulaksana  
Teuma neukheun bak dendayang  
Jibalasan jak leh taba

Ambek parang rancongkan buloh  
Akan manikam meulumba-lumba  
Sabet dagang datang peusuroh  
Nietnya heundak meunjadi hamba

Aneuk badeukek mate di rimba  
Keuna tumbak tidak beurtali  
Jakalee sudi meunjadi hamba  
Relalah dagang meunyeurah diri

Dendayang deungo bunyoe panton  
Leugat jitren le bandua  
Jiwoe leugat jikeumbali  
Bak putroe ti sampoe lanja

Ban troh keunan jibeureunti  
Com di gaki putroe muda  
Putroe tanyong yoh nyan rijang  
Peue na barang sideh taba

Meunyo ka na peuduek rijang  
Lon pandang pakri ban rupa  
Ka jiseuot le dendayang  
Jroh that barang po cut raja

Beukit ija karong nyang Peulimbang  
Biek Padang Bugeh Beunggala  
Teuma jipeugah le ngon panton  
Miseue neukheun ubah hana

Putroe deungo khem teusinyom  
Maneh meunyum sang meurasa  
Lom jipeugah le dendayang  
Ampoñ laman po meukuta

Bijaksana hana lawan  
Peue nyang takheun jaweueb kata  
Lagi rupa that analan  
Sapatpi tan na umpama

Putroe kheun le bak dendayang  
Jak tariwang lom le gata  
Deungon panton lon taba sajan  
Meunoe macam takheun hai da

Kayee seurapat di tanoh Ingreh  
Patah dahan beurganti tumboh  
Dayakan sahbat sajakan buleh  
Kalee sitia tidakkan takot

Meunan putroe jikheun panton  
Dendayang tren le bandua  
Hingga sampoe dalam keubon  
Jiek langsung u istana

Meuteumeung le ngon ma bibi  
Duek beureunti sinan dua  
Seureuta ngon muda samlakoe  
Jiseumbah nyoe sigra-sigra

Lheueh jiseumbah jikheun panton  
Bak po cut lon putroe muda  
Cut Diwa Akah khem teusinyom  
Makna panton trang that nyata

Teuma neukheun le samlakoe  
Beukit tawoe gata hai da  
Tame panton lon keu putroe  
Tapuwoe jinoe le gata

Tanom halia kalee nak tumboh  
Tanoh digali sampoe bungka  
Budi seutia tiada sunggoh  
Bukalah patot raja nyang beusa

Guda leumbu guda buraksa  
Meulayang dumna diheumpaskan  
Hanco leumbot badan binasa  
Seutia tidak dimungkirkan

Lheueh nibak nyan dendayang woe  
Bandua droe le jigisa  
Ban sare troh u meuligoe  
Seumbah putroe peugah haba

Seugala panton Cut Diwa Akah  
Dum jipeugah jicalitra  
Putroe deungo mangat leupah  
Meurasa glah jeuep anggeeta

Dalam hate meunanggong 'ibarat  
Gaseh teurikat di dalam dada  
Sang adat bu meundapat  
Meunan hajat putroe muda

Neukheun bak Dang Mangindra Diwi  
Bit juhari bijaksana  
linggong haba dum geuturi  
Sangat ahli ureueng muda

Jinoe tajak lom u keubon  
Deungon panton sajan taba  
Putroe kheun le jroh meualon  
Dendayang som nyang ba haba

Yakot intan dalam peutoe  
Sujoe bantai sutra beuleudu  
Jangan di takot saket dan mate  
Miseue abeh dari dahulu

Tanom ganja di teungoh pasi  
Ditanom uleh datok Mangka  
Jaga beutoi raja nyang beusa  
Mari beursila keu taman beta

Meunan panton tuan putroe  
Dendayang nyoe jak le sigra  
Leugat jituju u dalam keubon  
Leumah jikalon le ureueng jaga

Leumah jikalon le kawai putroe  
Dendayang dua droe jak u lua  
Geunap uroe pulang peureugi  
Peue tacari pat keurija

Jiseuot le jipeugah kri  
Cut putroe ti suroh hamba  
Neuyue ngadap raja doli  
Saban pagi lon u lua

Ureueng jaga deungo meunan  
Seungap yoh nyan han le haba  
Jijak leugat jibeurjalan  
U taman Indra seloka

Jijak ngadap Cut Diwa Akah  
Jiseumbah bak teuot lanja  
Kheun samlakoe yoh nyan pantah  
Lon kira han leupah keunoe gata

Lon kheun han troh gata keunoe  
Tapreh kamoe di istana  
Jiseuot le dendayang ragoe  
Sebab keunoe patek teuka

Kareuna lon neuyue ba panton  
Bak po cut lon di istana  
Neuyue ba keu deelat ampon  
Nyankeu troh lon bak meukuta

Teuma seuot Cut Diwa Akah

Cuba peugah he kak sigra

Kadang cit jeuet keu faidah

Lon keubah siumu donya

Dendayang kheun le ngon syae

Bangon mise putroe baca

Hana salah meung sigeutu

Uram iku han meutuka

Cut Diwa Akah neukheun laju

Nyoe sigeutu bak lon nyang na

Lon keumeung ngadap tuan putroe

Takot kamoe ureueng jaga

Raja Zangki jaga that kreueh

Takot han lheueh jan lon teuka

Bitpi meunan he dayang droe

Ja<sup>b</sup> le tawoe dilee gata

Takheun saleuem lon keu putroe

Panton lōn nyoe me le gata

Seulaseh dalam ceurana

Tanoh kulam ie meuleleh

Gata seumbah dagang nyang hina

Jaga malam seunjanya saleh

Tanoh kulam ie meuleleh

Bunga teurjatoh keu dalam randi

Jaga malam seunjakan jadeh

Akan beta meungadap doli

Lheueh jideungo haba panton

Jaroe jiseuon lakee gisa

Lheueh nibak nyan leugat jitren

Jiwoe langsong u istana

Ban sare troh u meuligoe

Seumbah putroe le bandua

Jipeugah dum jihareutoe  
Panton samlakoe jicalitra  
Seureuta jikheun jipeusaheh  
Malam nyoe neupreh jamee teuka

Cawan pingan patot neusrah  
Cut Diwa Akah sampoe teuka  
Teusinyom le tuan putroe  
Neukheun meunoe laju sigra

Manusia ladom sulet  
Di gata bit tapeucaya  
Kheun dendayang po cut ampon  
Bak agak lon troh neuteuka

Kareuna baginda Cut Diwa Akah  
Nyang that meugah hana tara  
Neuthee keunoe saja leupah  
Patek peugah kon peurbula

Ban jideungo le meurak agam  
Laju keunan le jihala  
Leugat u nap tuan putroe  
Jibet jaroé sayeuep dua

Seureuta ngon syae panton  
Meunoe jikheun fon beurkata  
Wahe po cut peurmaisuri  
Deungo kiranya patek beurpeuri

Baginda itu saja keumari  
Seudiket tidak takot dan ngeuri  
Meung taman nyoe han neujeut tamong  
Han gunaan gagah peurkasa

Neutren di gunong Manikam Halam  
Hana neupantang barangri raja  
Meung dum sigak raja Zangki  
Hana neugri peue neusangka

Neuthee saja datang keumari  
Malam ini lahe nyata  
Ngon jilumpat han jitukri  
Jinari jilila-lila

Meunan narit meurak agam  
Kheun dendayang Jandra Lila  
Hana laen nyang pahlawan  
Ngon saktian that peurkasa

Bah kukalon euntreuk malam  
Inong agam nyan pat nyata  
Jikalee troh nyo bit jantan  
Jikalee han nyo peurbula

Seureuta jigrop u hadapan  
Hai dendayang peue ri haba  
Pakon kapeutan keu po kamoe  
Bit nyo kah nyoe keumeung fana

Meunyo han troh euntreuk malam  
Keunyataan kee doseuta  
Meung watee troh pakri macam  
Peue balasan keu kah teuma

Euntreuk malam ka preh keunoe  
Kah sinaroe kaeu nyata  
Jicoh bak mom yoh nyan rijang  
Meunoe macam kukeurija

Beungeh dayang hana bagoe  
Jicoh geutanyoe bak-bak dada  
Seureuta jikheun meurak teuboh  
Geutanyoe jicoh han kareuna

Seuot meurak nyan goh kupoh  
Baro kucoh nak karasa  
Rame meukhem lam meuligoe  
Dayang sinaroe dum teurtawa

Suka galak hana bagoe  
Tuan putroe leubeh ganda  
Laloe geukalon meurak meuayang  
Ngon dendayang Candra Lela

Putroe kheun bak meurak jantan  
Beuna cit ban narit gata  
Lon bri upah seutimang brat  
Kareuna beureukat babah gata

Yoh nyan meurak seumbah putroe  
Jikheun meunoe jibeukata  
Meuhana troh bak malam nyoe  
Bandua kamoe neupumeureuka

Tuanku hukon sipeunoh hukom  
Ateueh ulon ban nyang suka  
Beukit nyang troh po cut ampon  
Neubri hukom si Dang Cahya

Putroe deungo haba meurak  
Suka galak hana tara  
Dum dendayang meukhem meukhak  
Suka galak khem teurtawa

Seureuta meuase seukalian  
Dum makanan jati rasa  
Abeh jihiah seukalian  
Sileungkapan lam istana

Tiree langet reumboe intan  
Dum seukalian ase dum ka  
Tilam keuleumbu nyang eumasan  
Reumboe intan mutiara

Sare ase dum sinaroe  
Neujak manoe putroe muda  
Sabon wangi pleu bak badan  
Po cut intan gleh angeeta

Lheueh nibak nyan ngui pakaian  
Jeuneh intan mutu rakna  
Cukop leungkap seukalian  
That analan putroe muda

Duek bak geuta keueumasan  
Dum dendayang ngadap lingka  
Sina syamsu nyang teungoh trang  
Lang geumilang limpah cahya

Meutamah lom ngon dendayang  
Cahya that trang hana tara  
Sang buleuen jipageue bintang  
Meunan teelan umpamanya

Dum dendayang that sambinoe  
Ngadap putroe Rakna Keumala  
Beukit taeu baranggasoe  
Sang bek tawoe meunan rasa

Teuduek bandum ngadap putroe  
Preh samlakoe pajan teuka  
Beurseunda guroe dum dendayang  
Meurak sajan poh-poh cakra

Teutap 'oh nan siat diam  
Bak uram keudeh meugisa  
Seubeurmula deungo jinoe  
Po samlakoe lon calitra

## **XI PUTROE RAKNA JICOK LE CUT DIWA AKAH**

'Oh ban sare seupot uroe  
Neujak manoe po jroh rupa  
Neulakee le bak ma bibi  
Beudak ngon langie lam ceurana  
  
Neubeudoh le neupeureugi  
Beudak ngon langie sajan neuba  
Lheueh nibak nyan neujak manoe  
Neupleu asoe pat nyang leuta  
  
Ma bibi uet dum sinaroe  
Suci sampoe jeueb angeeta  
'Oh lheueh manoe suci badan  
Ngui pakaian sianeka  
  
Pakaian alat keurajaan  
Jeuneh pakaian raja raja  
Maken meutamah lom beurseuri  
Gaseh ma bibi lom meuganda  
  
Teuma neutanyong le neusudi  
Ho peureugi cahya mata  
Heundak keumana tuan beurjalan  
Lon eu pakaian seugala rupa  
  
Cut Diwa Akah seuot rijang  
Hai ma badan u istana  
Bak malam nyoe lon beurjalan  
Saleuem putroe nyan han jeuet hana  
  
Ban geudeungo meunan macam  
Sret le mubram ngon ie mata  
Pakri tajak bungong geutoe  
Ban peuet sagoe ureueng jaga  
  
Raja Zangki ban tujoh droe  
Kuta meuligoe jikuasa  
Meuntroe wadi uleebalang  
Pahlawan gagah peurkasa

Pakri tajak bungong peukan  
'Oh jipandang ho lheueh gata  
Neuseuot le cut Diwa Akah  
Bek neugundah po ma raja

Meuna tulong nibak Allah  
Neuthee leupah ngon tan mara  
Deungon tulong Tuhan sidroe  
Dum sinaroe seupot mata

Ma bibi deungo meunan bagoe  
Ka geuiem droe han le haba  
Bitpi neuiem neubeureunti  
Cit sret sabe ngon ie mata

Sayangneu that bungong pade  
Neutakot mate cahya mata  
Bak masa nyan bungong meulu  
Lang-lang Daranu le neucinta

bak sa'at nyan troh jilalu  
Teudong laju di nap banta  
Jiseumbah le po samlakoe  
Jipeujeuet droe keu geureuda

U atueuh rueng neuek samlakoe  
Jitanyong nyoe ho patek ba  
Neuseuot le u meuligoe  
Bak putroe Rakna Keumala

Geureuda yoh nyan peulayang droe  
'Ajaeb tuloe ma Siganda  
Meuna dumnan keusaktian  
Leupah jalan u istana

Bijaksana sangat 'ajam  
Areh bangsawan hana tara  
Dapat meulakee nyang deumikian  
Patot keu lawan Rakna Keumala

Meutamah gaseh hana macam  
Keusukaan hana tara

Syahdan jinoe lon hareutoe  
Samlakoe Cahya Mangindra

Deungon siat sudah sampoe  
Bak meuligoe putroe muda  
Cut Diwa Akah leugat neutren  
Di ateueh rueng burong geureuda

Rot tingkap laju neutamong  
Neuyue riwang le geureuda  
Bak likot tiree sinan neudong  
Neukalon putroe jroh rupa

Cut Diwa Akah mandang hireuen  
Neueu buleuen hu meucanya  
Teiduek di ateueh geuta meuh  
Dendayang dum ngadap lingka

Hireuen teuceungong tahe mandang  
Indah han ban neueu rupa  
Yoh nyan teuingat muda bangsawan  
Neupujoe Tuhan Rabbon 'ala

Salang makhluk sidumnan tarek  
Beukit nyang khalek meuribee ganda  
'Oh neukalon meungucap syuko  
Bee meuhambo lam istana

Angen bapot that meudram-dram  
Dum bee-beewan that geumeunta  
Yoh nyan beurtitah putroe intan  
Bak dendayang ban sineuna

Putroe com bee naruwastu  
That meuharu silagoina  
Saleh malaikat teuka keunoe  
Bak malam nyoe han tom nyang ka

Candra Lela seuot pantah  
Beuna sileupah po cut raja  
Bak idong lon that mupeuah  
Bee jroh leupah hana tara

Meunan jikheun dum mupakat  
Marit meuhat Lela Cahya  
Beukit na bee nyang miseue nyoe  
Ureueng lakoe pungo gila

Beukit nyang inong agam beureuhi  
Jitem barangkri trom ngon tampa  
Abeh meukhem dum sinaroe  
Teusinyom putroe neudeungo haba

Sepkeu 'oh nan haba meuligoe  
Jinoe samlakoe ulon kira  
Neudeungo khem dum dendayang  
Teukhem sajan muda beulia

Seureuta droe keuhaderan  
Di hadapan putroe muda  
Tuan putroe ngon dendayang  
Hireuen mandang hana haba

Sikunyong-kunyong ka na sinan  
Malee-malee han Rakna Keumala  
Bahle putroe patot meunan  
Dum dendayang peue keurija

Deumi teudong di hadapan  
Sidroepi tan na soe sapa  
Cut Diwa Akah kalon meunan  
Sidroepi han meusuara

Teuma neukheun le samlakoe  
Meunoe bagoe panton seuluka  
Raja Indra Lila peurdana  
Tabai di padang Indrapuspa

Apa mula deungon kareuna  
Dagang nyang datang tidak meungapa  
Tuan putroe deungo meunan  
Neungieng yoh nyan dayang Nur Lela

Hana jituri isyarat putroe  
Bandum laloe publoe mata  
Bandum hireuen mabok keudroe  
Jieu samlakoe indah rupa

Neukek meuligoe deungon mudah  
Nyankeu dasyah keunan mata  
Dum dendayang 'ajab leupah  
Lagi indah han sapat sa

Jieu le meurak teuma yoh nyan  
Peurab bak dayang Candra Lela  
Seureuta jicoh bak geulunyueng  
Teuma jikheun meunoe haba

Bit nyo gata sang ureueng tuloe  
Neuhei le putroe padoli hana  
Candra Lela that teukeujot  
'Jiplueng u likot putroe muda

Seureuta jikheun po cut ampon  
Muda bangsawan jeh ka teuka  
Putroe neukheun tajak peugah  
Tayue pioh bak singgasana

Lheueh nyan jijak pantah-pantah  
Jiseumbah deungon mulia  
Tuanku ampon sila beureunti  
Bak keurusi singgasana

Ka teusinyom muda juhari  
Neupioh le yoh nyan sigra  
Cut Diwa Akah duek beureunti  
Ngon putroe ti sapeng dua

Dum dendayang duek di kiri  
Jiiringi putroe ngon banta  
Miseue uroe deungon buleuen  
Soe eu hireuen ladat mata

Miseue gamba ngon tulesan  
Meunan tuan proe umpama  
Jibri ngon ranup dalam puan  
Buet dendayang putroe muda

Seureuta jibet deungon jaroe  
Jikheun meunoe panton seuluka  
Tanoh suci di neugri Arab  
Sireh seuleupong bak kamoe nyang na

Jika sudi tuanku santap  
Jika tidak apakan daya  
Teuma neukheun le samlakoe  
Meunoe bagoe balah haba

Batang nireh buatkan titi  
Bunga tanjung di atas papan  
Datang sireh padanya putri  
Teulah dijunjung maka dimakan

Meunan neukheun po samlakoe  
Teusinyom putroe Rakna Keumala  
'Oh lheueh nibak nyan teuma dudoe  
Geubet jinoe hidang raya

Leugat jipeuduek u hadapan  
Jaroe sajan jibet sigra  
Deelat ampon syahi alam  
Peursantapan bak adekda

Makanan ureueng Neugara Puri  
Harap putroe ti tuanku rasa  
Cut Diwa Akah khem teusinyom  
Seureuta neukheun meunoë haba

Han peue salah hai kak dayang  
Keumuliaan that bak hamba  
Teutapi harap lon dek dayang  
Sajan-sajan ngon putroe muda

Neujak keunoe tuan putroe  
Makeuen ngon kamoe sama-sama  
Teuma seuot tuan putroe  
Bahle dudoe lon kakanda

Neumakeuen dilee he junjongan  
Di beulakang santap adekda  
Kheun samlakoe beukit meunan  
Di ulon han hai adekda

Tabri idin ulon jak woe  
Lon nyoe sidroe han meuguna  
Ban jideungo narit jak woe  
Beudoh putroe makeuen sama

Makeuen dua le sihidang  
Dum dendayang suka cita  
Mubagoe-bagoe jeuneh makanan  
Lam hidangan sianeka

Suleueng-muleueng keudeh keunoe  
Raja ngon putroe sabe muda  
Jehpi utoh nyopepi ragoe  
Bandua droe sabe padra

'Oh lheueh makeuen pinah hidang  
Bet minoman lam piala  
'Oh lheueh minom raja ngon putroe  
Dendayang sinaroe minom rata

Bandum minom keusukaan  
Dum dendayang muda-muda  
Sare mabok seukalian  
Panton dendayang maken gura

Panton le that macam-macam  
Hana teelan lon calitra  
'Oh lon ingat han jeuet keu buet  
Nyang na meujeuet cit keu deesya

Hingga teuma bak malam nyan  
Rioh kiam lam istana  
Sebab mabok dum dendayang  
Sare kiam khem teurtawa

Ureueng datang sampie keunan  
Bak dendayang jak pareksa  
Peue jeh rioh lam meuligoe  
Malam uroe sangat kubra

Peue na saket tuan putroe  
Lon bri thee nyoe bak baginda  
Ka jiseuot le dendayang  
Sapeuepi tan mara baya

Meukalon meurak peugot wayang  
Nyankeuh kiam khem teurtawa  
Hingga 'oh nan seungap kalam  
Jiwoe yoh nyan ureueng jaga

Dalam meuligoepi ka diam  
Kareuna malampi ka jula  
Cut Diwa Akah jak beuradu  
Lam keuleumbu tiree rawa

Akan putroe bungong meulu  
Malee sipu sang bak rupa  
Cut Diwa Akah turi laku  
Neucok laju le neubawa

Pakon meunan he cut bungsu  
Han mee taeu kamoe teuka  
Meuny<sup>o</sup> meunan he nyak putroe  
Bah lor jak woe yoh goh faja

Peue meukeusud lon eh sidroe  
Tuan putroe kureueng suka  
Putroe yoh nyan khem tesinyom  
Neutamong lam tiree rawa

Jadi ate keusukaan  
Eh tiduran le bandua  
Bandua droe ate rindu  
Peue lom teungku lon calitra

Pubuet leugat peue nyang napsu  
Minom laju peue nyang suka  
Buet nyang laen han lon seubot  
Ulon takot jeuet keu deesya

Kareuna buet nyan dalam seupot  
Hana patot lon jak buka  
Maseng teungku maklum bak droe  
Baranggasoe nyang na baca

Kareuna raja deungon putroe  
Sebab ragoe cit bandua  
Lagi umipi ka sampoe  
Bandua droe sabe muda

Peue guna lom lon hareutoe  
Baranggasoe cit maklum ka  
Tujoh uroe tujoh malam  
Nyang ka sinan banta muda

Troh bak uroe nyang keulapan  
Bak uroe nyan neumeusabda  
'Oh lheueh makeuen deungon minom  
Ngui pakaian sianeka

Nibak putroe neukheun nyoe ban  
Idin intan akan kanda  
Lon woe siat bak ma bibi  
Saleh pakri ureueng tuha

'Oh ka seupot lon keumbali  
Idin tabri cahya mata  
Seuot putroe ampon doli  
Han ulon bri teubiet u lua

Meung sitapak han lon bri cre  
Udep mate beu seureuta  
Beukit mate saboh kubu  
Meunan napsu lon kakanda

Ngon ie mata sret meu'u-u  
Putroe meulu sayang rugha  
Beukit neujak laen nanggroe  
Ulon jinoe cit beu neuba

Udep mate laba rugoe  
Lon seutot lakoe jeuep-jeuep donya  
Beuthat gohlom neuseuot nikah  
Bak lon sudah lon meuniet ka

Bak ate lon hana ubah  
Wallah billah han meutuka  
Meunan narit tuan putroe  
Samlakoe sosah neukira

Seubab sayang that keu putroe  
Ulah bagoe kong seutia  
Leumah pike dalam ate  
Cut putroe ti bahle kuba

Bak ma bibi Sikandawati  
Taman geurasi Indra Seloka  
Lagi seunang kumeulawan  
Bak seukalian raja raja

Meunan ingat muda budiman  
Neucom yoh nyan Rakna Keumala  
Neupeuduek le ubak leumueng  
Seureuta neukheun meunoe haba

Gaseh sungoh rupa ya tuan  
Akan abang dagang nyang hina  
Tatem putroe baranggaban  
Beursamaan ngon kakanda

Seuot putroe nyang analan  
Peue lom cut bang han' peucaya  
Tutue krueng tingkeuem papeuen patah  
Ie raya limpah sampoe lam bangka

Narit abeh sumpah ka leupah  
Kalee ubah kiamat donya  
Ka teusinyom muda samlakoe  
Utoh putroe canek haba

Beukit meunan hai bngong geutoe  
Gata uroe nyoe jadéh lon ba  
Ubak teumpat Sikandawati  
Sinan beureunti putroe muda

Tuan putroe seuot yoh nyan  
Bek meung 'oh nan he kakanda  
Beukit neupo dalam awan  
Ulon sajan he meukuta

Bek 'oh teumpat Sikandawati  
Lam laot api ulon seureuta  
Meusitapak cre han lon bri  
Udep mate sajan dua

Rakna Keumala meunan kalam  
Keusukaan muda beulia  
Sang meundapat gunong manikam  
Meunan nyum sang umpamanya

Neubeudoh sinan neujak leugat  
Neuduek bak tingkap nyan jeundila  
Deungon putroe duek meusapat  
'Oh talihat mameh raya

Neucinta Brahman Diwa Sakti  
Siat troh le saboh rakata  
Teupat tingkap sinan hade  
Indah han sabe laen rakata

Rakata nibak nilam pualam  
Pusparagam seundi warna  
Deungon raya kon sigeutu  
Indah laku hana tara

Teuma neuseubot Lang-lang Daranu  
Nyanpi laju hade teuka  
Teudong di nap doli tuanku  
Sujud laju jap keupala

Seureuta jikheun ya junjongan  
Neupangge laman po meukuta  
Cut Diwa Akah seuot yoh nyan  
Deungo laman lon meusabda

Jinoe taba lon u taman  
Nyang geupeunan Indra seloka  
Nyan pat rakata di leuen meuligoe  
Tapeudieng putroe Rakna Keumala

Deungon dendayang dum sinaroe  
Dum tapasoe dalam rakata  
Dum peungasoh ngon dendayang  
Masok u dalam ban sineuna

Han jeuet sidroe na tinggalan  
Meulaenkan bawak seumua  
Dendayang dum ka'a-ka'u  
Jiek laju dalam rakata

Hana tinggaipi meung sidroe  
Soh meuligoe ngon istana  
Hingga neukek le samlakoe  
Deungon putroe dalam rakata

Lang-lang Daranu jicok leugat  
Ka jiangkat laju rakata  
Jiteureubang miseue kilat  
Troh le siat Indra seloka

Hireuen sangat tuan putroe  
Dendayang sinaroe 'ajab raya  
That sakti muda samlakoe  
Judo putroe Rakna Keumala

Masa jipo Lang-lang Daranu  
Ka jimeusu that meutaga  
Tadeungo he tuan tuan  
Seukalian raja- raja

Wahe Zangki nyang tujoh droe  
Tuan putroe nyoe ka lon ba  
Deungon dendayang dum sinaroe  
Soh meuligoe han sapeue na

Biet ka kuba hana jeuoh  
Dalam lampoh Indra seloka  
Meuna agam lam kawan nyoe  
Seutot kamoe jinoe sigra

Nyang cok putroe deungo lon peugah  
Cut Diwa Akah Cahya Mangindra  
Beukit beurani deungan gagah  
Seutot bagah putroe muda

Lheueh jimeusu haba meunan  
Troh u taman Indra seloka  
Nyoe lon peugah keu ma bibi  
Duek beureunti bak seulasa

Teungoh-teungoh duek di sinan  
Samlakoe nyan leumah nyata  
Sajan neuba tuan putroe  
Sinaroe dendayang dumna

Hireuen teuceungong mabok keudroe  
Bit samlakoe sakti raya  
Meuna dumnan gagah sakti  
Raja barangri hana kuasa

Teuma neutren le ma bibi  
Beurlari-lari ureueng tuha  
Reubah limpah kanan kiri  
Lom ma bibi beudoh sigra

Peurab laju bak samlakoe  
Deungon putroe Rakna Keumala  
Sira neukheun meunoe bagoe  
Sira neumoe ro ie mata

He samlakoe pakon meunoe  
Taba putroe aneuk raja  
'Oh neuthee le raja nanggroe  
Dum geutanyoe mate fana

Sira neukheun deungon neumoe  
Neutumbok droe hana reuda  
Teuma neukheun Cut Diwa Akah  
Ma meutuah jroh neusaba

Meuna untong bisa leupah  
Adat han bah pakri teuma  
Ka teusurat bak azali  
Sama mate ngon putroe muda

Ka teusinyom le ma bibi  
Dalam ate sangat geunta  
That teumakot nyan ma bibi  
Gaduh pike ngon bicara

'Oh lheueh nyan teuma dudoe  
Mat di jaroe putroe muda  
Bek trep po cut neudong sinoe  
Saleh soe-soe kalon rupa

Sila po cut laju neukek  
Rumoh patek namiet tuha  
Teusinyom putroe seudang baek  
Yoh nyan neukek pantah sigra

Nyoe lon peugah muda samlakoe  
Neucinta jinoe saboh do'a  
Rumoh ma bibi indah han bagoe  
Jeuet meuligoe ngon istana

Ngon peukakah dum sinaroe  
Meureumboe-reumboe dum meutia  
Jeuet meuligoe tujoh pangkat  
Cukop alat ban sineuna

Jeuneh tiree ngon lelanget  
Bandum cukop intan meutia  
Meuligoe jroh hana sakri  
Teumpat putroe ti Rakna Keumala

Leubeh nibak meuligoe droe  
Meureumboe-reumboe intan peurmata  
Suka hireuen tuan putroe  
Ase sinaroe sikutika

Teutap sinan tuan putroe  
Ngon samlakoe ate suka  
Miseue buleuen deungon uroe  
Samlakoe ngon putroe muda

Ngon dendar yang dum sinaroe  
Ngadap putroe Rakna Keumala  
Putroe di teungoh miseue buleuen  
Barangsoe hireuen jikalon rupa

Hana bandeng ngon teuladan  
Nyang sa ngon nyan putroe muda  
Teutap 'oh nan lam meuligoe  
Laen jinoe lon calitra

## XII PRANG MEUSUNOH PUTROE

Syahdan lagi deungo jinoe  
Dum sinaroe nyang na baca  
Raja Zangki nyang tujoh droe  
Kawai meuligoe suroh raja

Hingga teuma bak siuroe  
Jideungo bunyoe di antara  
Saboh rakata nyan jipandang  
Jiteureubang dalam miga

Raja Zangki beungeh han ban  
Jibeurlalan u istana  
Jijak kalon putroe intan  
Bit nyo kadang nyan jibawa

Ban troh keunan jieu ka tan  
Meung dendayang sidroe hana  
Lam meuligoe bunyoe seungap  
Saboh lalat jieu hana

Bek ngon ureueng langongpi tan  
Seukalian beungeh raya  
Sangat hireuen hana macam  
Putroe hilang sikutika

Jiduek yoh nyan seukalian  
Mita jalan toh bicara  
Bunyoe suara nyang di manyang  
Sang u taman putroe muda

Pakri jinoe nyang mupakat  
Tajak seutot putroe muda  
Bek tabri thee ubak deelat  
Tajak leugat keudeh lanja

'Oh meuteumeung nyan ba putroe  
Taboh taloe si ceulaka  
Ubak raja le tapuwoe  
Bak lon sidroe meunan gura

Seuot laen beuna meunan  
Ban takheun nyan han meuriba  
Meunyo ase peukeurjaan  
Sabet tuan dapat nama

Jikalee han teuma pakri  
'Aeb keuji lon bak raja  
Kadang-kadangpi cit mate  
Donya han le 'aeb nama

Kareuna lon deungo bak jipeugah  
Cut Diwa Akah Cahya Mangindra  
Bak pike lon that bit gagah  
Ban peuneugah that peurkasa

Meutan gagah deungan sakti  
Han beurani jijak langga  
Beureuma Diwa Cit geuturi  
Di jih pakri han jitaba

Meukon ka sep pangkai jime  
Han seukali putroe jiba  
Jicok putroe deungan mudah  
Hana payah ngon usaha

Keupeue jaga dum neukeubah  
Aneuk khalifah tujoh raja  
Putroe gop ba hana tathee  
Padum malee geutanyoe jaga

Lom jinoe tapeugot beusee  
Han tabri thee ubak raja  
Tajak seutot lajuji nyan  
U taman Indra seloka

Jikalee ek tapohji nyan  
Beukit han ho tame muka  
Nyankeu bacut nyang na bak lon  
Nyang laen hom bak kakanda

Miseue haba si mupanton  
Bahle lon kheun saboh banja  
Tutue krueng Blang Me dumna kuat  
Troh ie raya that patah dua

Meuhan abeh sifeuet gutee jeungkat  
Hana meuhat meuteumee laba  
Bek nyang laba kadang rugoe  
Peunyaket tabloe utang tapeuna

Nyankeuh narit bak lon adoe  
Sibarang peue lon seureuta  
Teuma seuot aduen nyang nam  
Jikalee han duek di gata

Cuba kalon kujak hantam  
Kusimpan ngon siklep mata  
Jibeudoh le jibeurjalan  
Ngon angkatan balatantra

Beungehji that hana macam  
Peudeueng jireugam hu ngon mata  
Trok taman jibeurdiri  
Jidong antri dua dua

Taeu jidong dum meuriti  
Nyang marsose dong di muka  
Bataliyon di beulakang  
Beude panyang tumbak rata

Taeu jidong jroh meureuntang  
Di hadapan dum keupala  
Maseng-maseng dum kapitan  
Ngon leteunan nyang bri aja

Raja Zangki di hadapan  
Meuheui lawan hana reuda  
Wahe ureueng nyang ba putroe  
Teubiet keunoe kueu muka

Beukit gata ureueng lakoe  
Tajak keunoe meuen seunjata  
Mangat kupeucré ulee ngon badan  
Seubab kapitan kamoe dumna

Rakna Keumala kucok pulang  
Aneuk sulotan Beureuma Diwa  
Dendayang eu blah rot barat  
Rakyat le that tujoh raja

Dum dendayang ka teukeujot  
'Iek ngon geuntot meubura-bura  
Leungo badan yo ngon atot  
Teumakot ate lam dada

Ladom han jan jibeudoh dong  
Bak duek mantong ek keulua  
Nyang ladom duek nyang ladom dong  
Tahe mantong yo sang geumpa

Sidroe dendayang saboh laku  
Sare 'a-'u kiam subra  
Allah hai Po ya Tuhanku  
Neubantu muda beulia

Nyang leubeh that Sikandawati  
Neugule-gule lam duka cita  
Hana sapeue neupadoli  
Sikandawati neutumbok dada

Dum meukeumat ek bak badan  
Hironeu tan ureueng tuha  
'Iek deungon ek dum meuligan  
Geuniet bee-beewan minyeuk ata

Teuploh pingang teusuet luweue  
Meugaleue-galeue miseue waba  
Hireuen dendayang hana sakri  
Jieu ma bibi peugot keugura

Dendayang plueng meuhah-meuhah  
Bak Diwa Akah ngon putroe muda  
Ban troh keunan ka jipeugah  
Ile limpah ngon ie mata

Ampon tuanku meuribee kali  
Geutanyoe mate ban sineuna  
Jipoh le aneuk raja Zangki  
Ka jiantri dum di lua

Lua taman bandum jidong  
Jimeutamong keunoe lanja  
Sira marit beurtangisan  
Dum dendayang tuha muda

Yoh nyan putroe ka teuingat  
Akan deelat ayah bunda  
Di dalam nyan muka pucat  
Sret le leugat ngon ie mata

Sret ie mata beurlinangan  
Ingar panyang putroe muda  
Cut Diwa Akah khem teusinyom  
Putroe neukalon ubah raya

Teuma tanyong po samlakoe  
Tuan putroe pakon rugha  
Sang miseue nyan gata adoe  
Bak laku proe lon eu rupa

Kuluk lagee ulon kalon  
Tameuduek dong ngon kakanda  
Takheun tabloh laot apui  
Baro 'oh noe laen sang ka

Jinoe taiem he sambinoe  
Bek le tamoe nyawong kakanda  
Dum neupeugah meudeh meunoe  
Seungap putroe han le rugha

Cut Diwa Akah 'oh noe heunti  
Raja Zangki lon calitra  
Di lua taman jibeureunti  
Jinari-nari jilila-lila

Seureuta jihei meuadoe-adoe  
Teubiet keunoe he ureueng muda  
Pakon jinoe kah teumakot  
Dilee kapubuet jalan mungka

Jinoe peue lom hoka meunggrop  
Kubalot han jan ka gisa  
Beukit nyo kah aneuk agam  
Teubiet rijang keunoe lanja

Kupeucre ulee deungon badan  
Sinoe lam blang kukeurija  
Neudeungo narit Cut Diwa Akah  
Bacut marah 'oh sikada

Ubak putroe teuma neupeugah  
Lon langkah siat u lua  
Lon jihei le raja Zangki  
Malee ate lon han tara

Han lon teubiet hana meukri  
Malee keuji lon adekda  
Teuma neubeudoh rijang-rijang  
Neungui pakaian sianeka

Ban jikalon uleh putroe  
Jimat samlakoe yoh nyan sigra  
Seureuta jikheun narit meunoe  
Sira jimoe ro ie mata

Bek neuteubiet bak uroe nyoe  
Bah sinoe mate bandua  
Kareuna sitree muploh katoe  
Kakanda sidroe pakri daya

Seureuta neukheun peulheueh hai putroe  
Beuthat sidroe han peue mara  
Meudum aneuk raja Zangki  
Hana ngeuri ate kakanda

Tuan putroe han cit neubri  
Muda juhari sosah raya  
Seureuta neukheun uleh putroe  
Sira jimoe ngon ie mata

Hana neugaseh keu lon sidroe  
Bit tuboh nyoe tan bahgia  
Lon boh nang mbah seutot lakoe  
'Oh troh keunoe beunci teuka

Neukeumeung jak muprang sidroe  
Gop meukatoe laksin laksa  
Ate ulon han ek sampoe  
Han lon bri nyoe jak u lua

Meuna gaseh keu lon sidroe  
Bek sampoe neumeung jak ngaza  
Meunan jikheun uleh putroe  
Samlakoe gadoh bicara

Hilang budi bicara abeh  
Kareuna gaseh keu putroe muda  
Bek le tamoe tuan putroe  
Han ulon yue teubiet u lua

Udep mate bahle sinoe  
Deungon putroe meusapat dua  
Neubeudoh le teuma dudoe  
Bak tingkap meuligoe neuduek banta

Beursama deungon tuan putroe  
Neukalon nyoe ngieng u lua  
Tuan putroe ate ngilu  
Han neujeuet eu kilat seunjata

Maken jihei mubagoe-bagoe  
He ureueng lakoe nyang angkara  
Teubièt rijang leugat keunoe  
Bek uem putroe sabe gata

Raja Zangki meunan jikheun  
Aneuk bajeueng leupah haba  
Cut Diwa Akah deungo sabe  
Nibak ate han ek saba

Keumeung teubiet putroe han bri  
Muda juhari ingat sigra  
Yoh nyan neusuet keumala hekeumat  
Neuingat nama mamanda

Meukutara ja nyang beurdeelat  
Nyang po hekeumat asai mula  
Na sikeujap teuma dudoe  
Teuka peuet droe aneuk raja

Ban troh keunan jibet jaroe  
Jiseumbah nyoe teuot baginda  
Seureuta jikheun deelat ampon  
Jeuet neuhei lon peue kareuna

Siri nanggroe neukeumeung prang  
Pat gunong neumeung plah dua  
Cut Diwa Akah seuot rijang  
Bak raja nyan neukheun sigra

Jeuet lon pangge gata teelan  
Lon yue lawan raja raja  
Raja Zangki nyang tujoh droe  
Aduen adce sisyedara

Jikheun keu kamoe le that bagoe  
Nyankeuh jinoe lawan gata  
Raja peuet droe peuek seumbah  
Ban nyang titah junjong hamba

Bek antara raja tujoh  
Beukit sireutoh milek hamba  
Deungon beureukat keubawah doli  
Han patek bri nama cidra

Baranggasoe han lon ngeuri  
'Oh mate abeh keurija  
Cut Diwa Akah deungo meunan  
Keusukaan hana tara

Neujok ranup dalam puan  
Peuet raja nyan ate suka  
Putroe kalon sangat 'ajab  
Bukon hebat peuet droe raja

Ma Sikanda galakneu that  
Raja deelat sakti raya  
Raja peuet droe lakee idin  
Leugat jitren peuet seureuta

Jiteubiet le troh u padang  
Ubak lawan jipeurab lanja  
Ban troh keunan meuhadapan  
Di tangan peudeueng jipuba

Hana sapeue jimeukalam  
Jihantam leugat lam tantra  
Jigisa wie deungon uneun  
Teugageueng reubah meutimpa

Tadeungo su peuet boh peudeueng  
Hana meutheun ho nyang jigisa  
Reubah mate cangkieng-mangkeueng  
Seulinteueng mate meukeuba

Rakyat Zangkipi amarah  
Ngon jipanah hana reuda  
Aneuk panah han jihireuen  
Cit peudeueng leugat jipuba

Hana sapatpi meukaleueng  
Buet peudeueng raja keumala  
Raja peuet droe that guransang  
Rakyat jicang dum meukeuba

Sang rimueng leupah tangkapan  
Jilet kameng deungon rusa  
Rakyat Zangki han ek le theun  
Leugat jiplueng le rab raja

Raja Zangki yoh nyan kalon  
Rakyat jiplueng ban sineuna  
Ateueh guda ka jilumpat  
Beungehji that hana tara

Ban tujoh droe jimupakat  
Jijak leugat linteueng raja  
Ban meuteumeung jitanyong le  
Raja Zangki deumpek sigra

Hai ureueng peuet han kuturi  
That beurani keunoe teuka  
Nyang kumeuheu si tueng putroe  
Kah nyang peuet droe teuma teuka

Jinoe nama kapeugah soe  
Kah ban peuet droe tinggai donya  
Raja peuet droe seuot pantah  
Ngon amarah hana tara

Wahe Zangki haram jadah  
Bit kuthee kah sang beulaga  
Kee nyoe ureueng Cut Diwa Akah  
Nyang geupeugah Cahya Mangindra

Kah nyan ureueng sang binatang  
Hana jalan utak keupala  
Zangki deungon marah han ban  
Panah yoh nyang peulheueh lanja

Raja peuet droe hiroji tan  
Dum panah nyan hana guna  
Beukit keunong nibak badan  
Sang tasrom ban bungong seulanga

Raja peuet droe that amarah  
Jigrop pantah keunan sigra  
Jitak ngon peudeueng sangat gagah  
Teuhah babah tujoh raja

Han jituho mita ilah  
Sangat gagah peuet droe raja  
Keunong peudeueng sinan reubah  
Ban tujoh sah ka teurhanta

Rakyat kalon raja han le  
Jiplueng sare ban sineuna  
Ladom plueng tamong u dalam  
Bak sultanan Beureuma Diwa

Tatkala nyan doli junjongan  
Seumayam di bale rakna  
Raja raja dum di sinan  
Ngadap junjongan seugala raja

Rakyat nyang plueng peuek seumbah  
Jipeugah akan buet nyang ka  
Jikheun putroe ka gop baplueng  
U taman Indra seloka

Raja Zangki seutot jak prang  
Abeh karam ban tujoh raja  
Raja peuet droę nyang poh mate  
Hana sakri gagah peurkasa

Miseue siwah rajawali  
Cukop beurani po meukuta  
Ban neudeungo haba rakyat  
Raja deelat beungeh raya

Yo le badan ngon meutat-tat  
Mirah leugat le ngon muka  
Meunyala-nyala miseue apui  
Jibeudoh rui bulee mata

Deelat meutitah bak raja peuet droe  
Lam nanggroe droe poteu raja  
Gagah beurani hana bagoe  
Aduen adoe ban peuet raja

Lapan reutoh uleebalang  
Nyang genggam sidroe-droe raja  
Nyang di rakyat han tatuban  
Uleebalang bandum saja

Raja nyang peuet han lom boh nan  
Harap sulton Beureuma Diwa  
Sabda raja bak masa nyan  
Tajak u taman Indra seloka

Tapoh mate ureueng peuet droe  
Raja nanggroe jatoh sabda  
Raja nyan peuet beudoh yoh nyan  
Leugat u taman Indra seloka

Ban sare troh bak teumpat nyan  
Peudong sinan balatantra  
Deumpek surak bukon bubarang  
Sang meulinggang alam donya

Bak masa nyan po samlakoe  
Bak tingkap meuligoe meuseunia  
Sajan deungon tuan putroe  
Raja peuet droepi seureuta

Leumah neukalon rakyat meukatoe  
Peunoh sinaroe peudeueng raya  
Seureuta neukheun le samlakoe  
Ubak peuet droe raja keumala

He syeedara jak talawan  
Raja seukalian baro teuka  
Seugala ureueng Neugara Puri  
Tapoh mate ban sineuna

Uleebalang meuntroe wadi  
Dum seukali tapufana  
Sira neungieng atueh putroe  
Ulah bagoe masam muka

Sebab neuyue poh ureueng nanggroe  
Jadi putroe duka cita  
Ka teusinyom po samlakoe  
Neukheun dudoe bak peuet raja

Jak syeedara beu seulamat  
Nyang khianat tapufana  
Tiep-tiep nyang jroh beu seulamat  
Tiep-tiep umat dum syeedara

Baro teuploh muka putroe  
Raja peuet droe beudoh sigra  
Seumbah raja deungon putroe  
Teubiet sampoe troh u lua

Ban sare troh dalam kawan  
jihantam hana pareksa  
Ban peuet sabe bak jimeucang  
Na tamse ban kilat faja

Rakyat mate wie ngon uneun  
Han jan jikheun meung halua  
Reubah mate dum teugageung  
Seulinteueng mate meukeuba

Dumna rakyat han ek jitheun  
Le that jiplueng ubak raja  
Deelat tuanku leugat jikheun  
Han tom meuteumeung meunan peurkasa

Teuma marit Bulia Seumindon  
Ubak aduen jipareksa  
Peuet geutanyoe pakri mufom  
Nyang bak ulon pindek saja

That meusyuke bak talawan  
Peuet raja nyan sang silaksa  
Han ek talawan pakri jalan  
Bak sulotan kadang meureuka

Uleebalang dumnan beurani  
Siribee kali adat tuannya  
Seuot nyang lhee teuma lagi  
Beutoi seukali ban kheun gata

Meunyo meunan jak udeh woe  
Ban peuet droe leugat jigisa  
Deungon rakyat dum sinaroe  
Troph le sampoe ubak raja

Sujud seumbah beuet jaroe  
Raja peuet droe pucat muka  
Sabda raja bak raja peuet  
Na tapubuet ban nyang sabda

Ka lheueh tapoh atawa tan  
Kheun beurijang lon deungo nyata  
Kamoe meujak ureueng peuet nyan  
Padum rakan nyang ka fana

Sakti tuanku bukon bubarang  
Patek pandang ate lia  
Teutapi nyang ka di beulakang  
Tuanku pandang pakri rupa

Bak uroe nyoe akai hilang  
Patek lawan hana daya  
Meutan tuanku syawe pike  
Rakyat mate jeuheut nama

Raja deungo seumbah meunan  
Teupike yoh nyan doli baginda  
Dalam ate meunyum gundah  
Pakri kusrah adang di muka

Ubak meuntroe raja peugah  
Jinoe takrah taseuranta  
Soe-soe nyang poh ureueng limong droe  
Keunan putroe Rakna Keumala

Ban jideungo uleh meuntroe  
Teubiet jinoe jak seuranta  
Bak ureueng le keubanyakan  
Meuntroe sinan peugah haba

Ayoh he tuan dum seukalian  
Akan sulton duka cita  
Soe nyang ek poh musoh doli  
Keunan neubri putroe muda

Soe ek lawan jeuet meujanji  
Raja doli hana mungka  
Jideungo uleh raja tujoh ploh  
Deumpek rioh that meutaga

Seureuta jikheun ubak putroe  
Jak leh tawoe ubak raja  
Kamoe nyang poh ureueng limong droe  
Bek sosah nyoe le baginda

Bek antara nyang limong nyan  
Siribee dumnan han kutaba  
Sireutoh sikureueng ploh ek cit simpan  
Meudum po nyan teuungka-ungka

**Meunyo** ngon kee siat sudah  
Taeu kuplah nyan di muka  
Bah beurani deungon gagah  
Hana payah siat saja

Meungon kamoe gadoh agam  
Bukon kalam lon peurbula  
Jeuet takalon sideh di blang  
'Oh mupandang sinan nyata

Raja deungo meunan kalam  
Keusukaan Beureuma Diwa  
Neukira na ban jikheun nyan  
Ate junjongan rab lagoina

Seureuta neukheun adat meunan  
Buet nyoe tuan bek le lama  
Bek tapeutrep he boh ate  
Meutamah keuji lon ayahda

Ban jideungo kheun sulton  
Jiteubiet ngon balatantra  
Seugala 'adi juhan pahlawan  
Ireng sulton aneuk raja

Deumpuk surak hana teudoh  
Sang ka runtoh alam donya  
Jitarek alam macam-macam  
Leugat u taman le jihala

Aneuk raja dum seukalian  
Maseng kandran dumji rata  
Ladom atueh singa peutawi  
Siteungoh ri atueh geureuda

Ladom giduek atueh waliman  
Ladom tuan naga angkara  
Maseng-maseng atueh kandran  
Aneuk sulton that peurkasa

Rakyat laen meukalot-kalot  
Miseue laot sangat that bha  
Gajah guda han jeuet seubot  
Jak meuikot maseng jaga

Payong miseue naga burak  
Intan pucak taeu cahya  
Alat seunjata miseue rangkah  
Meujeureulah cahya mahkota

Geugap geumpita han jeuet tapeugah  
Seuu leupah tujoh peursangka  
Dumji sare aneuk sulotan  
Keupong taman Indra seloka

Cut Diwa Akah deungon putroe  
Bak tingkap meuligoe meuseunia  
Neukalon rakyat muploh katoe  
Dum sinaroe gajah guda

Sajan deungon surak deumpek  
Keunan jiek dumji rata  
Rioh sare bunyi-bunyian  
Hudom keunan dumji lingka

Cut Diwa Akah tanyong rijang  
Ban dendayang Candra Lela  
Pane raja keunoe datang  
Hai kak dayang tacalitra

Jiseuot le yoh masa nyan  
Jibet tangan u jeumala  
Nyankeuh tuanku tunangan putroe  
Dum sinaroe aneuk raja

Kureueng lhee reutoh tuanku droe  
Nyang ka sampoe keunoe teuka  
Cut Diwa Akah dum neuturi  
Dilee beureunti sama-sama

Bak Brahman Diwa Sakti  
Sinan meuturi masa jak tapa  
Masa nyan neukheun le samlakoe  
Ngon raja peuet droe sajan seureuta

Jinoe tajak gata peuet droe  
Gantoe kamoe he syeedara  
Tajak lawan raja datang  
Jih that girang hana tara

Raja peuet droe seuot leugat  
Ampon deelat junjong hamba  
Jicinta le ngon hekeumat  
Troh le rakyat meuribee laksa

Jeuneh pari deungon mambang  
Diwa sajan indra jindra  
Jen raksasa bandum datang  
Peunoh padang Anta Cahya

Jiteubiet dum dalam taman  
U padang nyan dum jihala  
Ase rakyat dum sinaroe  
Raja peuet droe seumbah raja

Ek cong kandran dum sinaroe  
U padang nyoe dum geuhala  
Ban sare troh u mideuen prang  
Meuseueh -seueh ngon dum seunjata

Jipalee le deungon geundrang  
Han tatuban kiam kubra  
Jieu le raja sikureueng ploh tujoh  
Hana teudoh rakyat teuka

Seun siribee seun sireutoh  
Hana putoh saban teuka  
Jiteubiet dum dalam taman  
Raya angkatan bak lon kira

Hireuen bandum yoh masa nyan  
That teuceungong aneuk raja  
Jimeututo sabe keudroe  
Meunoe bagoe jimeuhaba

Saleh raja nyang beurdeelat  
Bak talihat lagee rupa  
Hana meunoe le that rakyat  
Ngon sikeujap muploh laksa

Takalon bunoe cit limong droe  
Teuma jinoe meulaksin laksa  
Di dalam nyan marit sidroe  
Le that bagoepi ka teuka

Bek that-that le tameukalam  
Keurugian bek takira  
Bah raja pangkat sulotan  
Ulon lawan duek di gata

Seubab geutanyoe narit ka leupah  
Pakri taubah he syeedara  
Udep mate bahle sudah  
Bumoe peuet hah dumpatpi na

Beudoh jinoe tajak muprang  
Bek le panyang kira-mira  
Jibeudoh le seukalian  
Tamong u padang ban sineuna

Jideumpek le ngonjisurak  
Dua pihak meuhadap ka  
Taeu jigrop ngon jilikak  
Jimeutop tak mula-mula

Prang nyan hana beurjampuran  
Meulaenkan ngon sabé bangsa  
Meunyo mambang sabé mambang  
Diwa tuan sabé diwa

Meunyo pari sabé pari  
Han seukali jeuet meutuka  
Prang raya that hana sakri  
Rusak mate bek takira

Jimeutop-top deungon leumbeng  
Dum mupateng lam-lam mata  
Reubah mate dum meupunggeng  
Keunong leumbeng beusot keupala

Na sikeujap prang nyang meunan  
Ka seupot klam glap-gulita  
Hana sapeue deuh tapandang  
Jimeucang han ban publa

Han le meuri lawan kawan  
Ji hantam soe meusuara  
Bunyoe cokma kon bubarang  
Han tatubanpi calitra

Na sikeujap nyang lagee nyan  
Dudoe nibak nyan trang cuaca  
Rakyat mate han peue peugah  
Ile darah ban ie raya

Ureueng muprang lom ka leumah  
Subhanallah mate ngon luka  
Aneuk raja sikureueng ploh tujoh  
Han teudoh meuen seunjata

U ateueh raja keumala hekeumat  
Le that rakyat dum binasa  
Kata ureueng po karangan  
Akan prang nyan maken raya

Tujoh uroe tujoh malam  
Sikeujap tan nyang na reuda  
Jieu le raja keumala hekeumat  
Le that rakyat dum ka fana

Jitajo le ban peuet leugat  
Dalam rakyat aneuk raja  
Taeu jitak wie ngon uneun  
Teugageueng reubah meutimpa

Hana sapatpi na meutheun  
Buet peudeueng raja keumala  
Mate le that hanta tudum  
Leu'am-leu'um dum teurhanta

Hana saboh nyang leupah plueng  
Ri meuteumeung dum seureufa  
Na sikeujap meunan jicang  
Peungeuh lapang blah utara

Aneuk raja kalon rijang  
Rakyat hilang dum seureufa  
Jibeudoh le jijak linteueng  
Pana ureueng sangat that kha

'Oh ban sare ka meuteumeung  
Ka jimaklum raja keumala  
Ka jitupeue Cut Diwa Akah  
Sangat marahji han tara

Seureuta jikheun yoh nyan pantah  
Kajak woe kah wahe indra  
Yue jak keunoe jih nyang ensan  
Kumeung hantam di keupala

Tunangan kee kucok pulang  
Jak leh rijang kayue teuka  
Meunyo ngon kah hana padan  
Cit meung ensan nyang kumita

Raja keumala seuot nyoe ban  
Bit binatang bandum gata  
Meung kamoe peuet han ek kapoh  
Jalan nyang toh raya haba

Bit bak ureueng kon jalan jroh  
Narit teuboh jijeuet buka  
Aneuk raja that amarah  
Jipeulheueh panah u antara

Na sikeujap teuma ka jeuet  
Keu busu bleuet ban sineuna  
Jitren atueuh raja nyang peuet  
Dum busu bleuet han meuguna

Troh teumpat nyan laju hilang  
Sakti tuan raja keumala  
Mangirna Diwa that amarah  
Peulheueh panah u antara

Aneuk panah jeuet keu taloe  
Rante beusoe ngon teumaga  
Rante jipo laju keudroe  
Jipeutoe bak aneuk raja

Mupalet ban saboh tuboh  
Miseue tikoh roh lam cintra  
Gadoh rancak han le utoh  
Bak tuboh rante meusingkla

Abeh meuntroe uleebalang  
Dum meujantang ban sineuna  
Han sidroe keuttinggalan  
Seukalian rakyat dumna

Maseng-maseng atueuh kandran  
Rante sajan ube-be pha  
Nyang di rakyat teudong lam blang  
Meureuntang rante dum rata

'Oh takalon bit that sayang  
Ka meureughang dum ban nyang na  
Lheueh nibak nyan raja peuet droe  
Leugat neuwoe bak baginda

Seureuta rakyat dum sinaroe  
Ka lam taloe dum sineuna  
Nyang di raja atueuh kandran  
Rante sajan dum seureuta

Rakyat keumala di beulakang  
Miseue ban jiparoh guda  
Ka troh bandum dalam taman  
Peurseumbah nyan bak baginda

Deelat ampon patek laman  
Peurseumbahan keu meukuta  
Aneuk raja sikureueng ploh tujoh  
Bandum ka roh dalam singkla

Jinoe peue-peue hukom putoh  
Wajeb haroh bak meukuta  
Cut Diwa Akah deungo meunan  
Teusinyom nyan 'oh mumada

Seureuta neukheun bah di sinan  
Lam ikatan sikutika  
Nyang taingat dilee keudroe  
Nyang baro woe bak prang ngaza

Peue nyang patot tapeujaroe  
Nyang rakyat droe lam keumala  
Cut Diwa Akah nyang juhari  
Cinta sakti nyang seujahtra

**Ngon sikeujap ase jadi**  
Ka teudong le geudong raya  
Jeuneh pakaiian dum di sinan  
Lam geudong nyan sianeka

Saboh geudong dum makanan  
Han sapeue tan jeuneh rupa  
Lheueh nyan neubri dum salenan  
Seukalian dumna tantra

Maseng-maseng ban lakuan  
Ban atoran maseng kada  
Seureuta neubri minom makan  
Angkatan dalam keumala

Raja peuet droe keusukaan  
Sulotan banyak karonya  
Hingga teuma po samlakoe  
Bak siuroe neumeusabda

Neukheun ubak raja peuet droe  
Taploh taloe aneuk raja  
U gampong tayue dum jak woe  
Ban sinaroe rakyat dumna

Teuma seuot raja peuet droe  
Beuna that nyoe po meukuta  
Seumpornaan nama tuanku  
Cit meusyeuhu jeuep-jeuep donya

Cut Diwa Akah jak u bale  
Rakyat sakti ireng sama  
Leugat neuduek bak keurus  
Nyang meuhambo ngon meutia

Aneuk raja geuplohaloe  
Dum sinaroe keunan geuba  
Seumbah sujud bak samlakoe  
Jibet jaroe sama rata

Troh tujoh seun jikheun deelat  
Bak halarat turon sabda  
Teulah maklum wahe sahbat  
Buleh angkat dum keupala

Lheueh nyan teuma dum beureunti  
Bak keurusi nyang raja raja  
Peursalenan dum neuyue bri  
Ban seupeurti salen raja

Seureuta rakyat seukalian  
Neubri bandum ban nyang kada  
Lom neuyue bri minom makan  
Seukalian balatantra

Seureuta ngon keusukaan  
Uroe malam hana reuda  
Sabda raja Cut Diwa Akah  
Neupeugah bak aneuk raja

Gata tawoe dum bak ayah  
Teulah leupah seugala deesya  
Jinoe geutanyoe jeuet keu sahbat  
Jan na pakat beu troh teuka

Aneuk raja seuot leugat  
Ampon deelat junjong hamba  
Jan tuanku na meularat  
Nama meuhat tuanku cinta

Troh le kamoe deungon siat  
Meungadap deelat po meukuta  
Aneuk raja seumbah doli  
Tren peureugi leugat gisa

Aneuk raja ka leupah woe  
Samlakoe di dalam suka  
'Ajaeb ate tuan putroe  
Samlakoe jieu peurkasa

Meusampe kutinggai nang mbah  
Cut Diwa Akah raja raya  
Ate putroe mangat leupat  
Siulah-ulah dapat syeureuga

Cut Diwa Akah teutap sinan  
Lam taman Indra seloka  
Uroe malam keusukaan  
Ngon intan Rakna Keumala

Raja peuet droe nyang kemawai  
Cit nyan sagai jikeurija  
Teutap 'oh nan haba tinggai  
Jinoe laen hai lon calitra

### **XIII. RAKNA KEUMALA GEUPEUNIKAH NGON CUT DIWA AKAH**

Seubeurmula peurkataan  
Akan sulotan Beureuma Diwa  
Neudeungo prang keutiwasan  
Keukalahan aneuk raja

Bandum jidrop jiboh taloe  
Hana sidroe nyang meudawa  
Uleebalang wadi meuntroe  
Dum sinaroe dalam singkla

Na sikeujap meunan macam  
Jatoh kalam nibak raja  
Wahe tuan seugala tuan  
Peue pikeran na bak gata

Kareuna ulon that maluan  
Jiboh adang nibak muka  
Pakri jalan rot talawan  
Peugah teelan nyang sijahtra

Hana sidroe na jeuet seuot  
Kareuna takot keunong meureuka  
Kareuna raja amarah that  
Nyankueuh seungap laen raja

Di dalam nyan padum lawi  
Mangirna Pari peugah haba  
Deelat ampon keubawah doli  
Patek ini po bicara

Nibak pike dan "ibarat  
Tueng keu sahbat leubeh eela  
Meunan tuanku leubeh jroh that  
Hana sapat jeuet keu cidra

Beukit neutueng ureueng laen

Hana meunan gagah peurkasa  
Nibak patek he junjongan  
Sang got ngon nyan po meukuta

Meukon aneuk ureueng meusoe  
Han troh keunoe ek jihala  
Teuntee aneuk raja nanggroe  
Jeuet troh sampoe keunoe teuka

Lom ngon jitueng uleh putroe  
Nyankeuh lakoe ka jirela  
Lom ngon rupa that samlakoe  
Deungon putroe cit patot raya

Raja deungo seumbah meunan  
Bak junjongan sangat beuna  
Seureuta neukheun yoh masa nyan  
Jak tueng kaman keunoe sigra

Sabda raja nyang beurdeelat  
Istalat Halam tajak gata  
Uleebalang deungon rakyat  
Jak tueng leugat banta muda

Lheueh nibak nyan Diwa Istalat  
Jijak leugat ngon balatantra  
Akan raja nyang beurdeelat  
Yue hiasan teumpat ban sineuna

Bale rom geuboh pakaian  
Geuleungkapan tiree rawa  
Got istana seukalian  
Yue hiasan ban sineuna  
  
Cukop dumpeue seukalian  
Bak sulton peue nyan hana  
Teutap 'oh nan siat diam  
Istalat halam lon calitra  
  
Ubak tamanpi ka sampoe  
Pioh sinoe nyan di lya

Geubri haba bak samlakoe  
Ureueng sampie nibak raja  
Jiplueng laju jijak peugah  
Cut Diwa Akah di bale rakna  
Deelat ampon na utosan  
Istalat Halam yue ayahda  
Heundak meungadap keu bawah kidam  
Jeh pat gop nyan dum di lya  
Teuma neukheun tamong rijang  
Lon sukaan hana tara

Seureuta neungui dum pakaian  
Sileungkapan alat raja  
Bukon hebat hana macam  
Aneuk sulotan indah rupa

Teuduek meungadap muda samlakoe  
Raja peuet droe lam keumala  
Sajan deungon wadi meuntroe  
Hebat han soe taeu rupa

Na sikeujap dudoe nibak nyan  
Raja utosanpi troh teuka  
Ban troh keunan tahe hireuen  
Jikalon buleuen hu meucahya

Tahe mandang teujak teudong  
Han tom jikalon meunan rupa  
Sang-sang han jeuet ek u bale  
Neusapa le muda beulia

He syeedara taek rijang  
Bek trep sinan hana gura  
Peue neutitah le junjongan  
Peugah rijang he syeedara

Baro teukeujot raja utosan  
Keudeungaran muda beulia

Leumah leumbot ate rawan  
Geuek rijang yoh nyan sigra  
Geiduek sajan raja peuet droe  
Seumbah samlakoe nyang mulia  
Seureuta geukheun he junjongan  
Patek laman suroh ayahda

Neuyue jak tueng syahi alam  
Seureuta sajan ngon adekda  
Kareuna baginda rindu deundam  
Neuyue laman bawa sabda

Ban neudeungo meunan kalam  
Teusinyom yoh nyan seureuta sabda  
He syeedara leubeh that lon  
Lon meujak com gaki baginda

Beukit salah harap ampon  
Leubeh untong ka troh sabda  
Lheueh nibak nyan Cut Diwa Akah  
Neutren pantah jak bak raja

Meubak putroe tan neupeugah  
Neumeulangkah keudeh lanja  
Raja peuet droe ireng sajan  
Uleebalang lam keumala

Seureuta raja nyang utosan  
Troph u dalam muda beulia  
Akan raja di bale rom  
Jingadap dum raja raja

Ban troh keunan po samlakoe  
Tren sinaroe laen raja  
Beureuma Diwa neubeudoh dong  
Hireuen neukalon indah rupa

Hana haba tahe mandang  
That teuceungong poteu raja  
Na sikeujap meunan bagoe  
Neukheun meunoe le baginda

Taek keunoe he aneuk droe  
Rindu kamoe bijeh mata  
Cut Diwa akah neukek leugat  
Com bak teuot poteu raja

Raja sambot teuma leugat  
Seureuta neumat bak tangannya  
Neupeudeuk le bak keurusi  
Nyang meuhambo ngon peurmata

Deungon aneukda neupeuturi  
Lhee seukali aneuk raja  
Neubeudoh le po samlakoe  
Mumat jaroe ngon kakanda

Com bak teuot nyan ban lhee droe  
Aduen putroe Rakna Keumala  
Aneuk raja lon seubot nan  
Mangat tuan taturi nama

Nyang tuha nama Namli Diu  
Adoe teungku Kusnaraja  
Teuma adoe nyan Mangindra Pari  
Aneuk doli Beureuma Diwa

Bandum geuseubot deungon taklem  
Muwa meucom ngon syeedara  
Ate suka hana macam  
Sang meuteumeung gunong meutia

Raja neubri ranup lam karah  
Neusambot pantah ngon mulia  
Lheueh neupajoh ranup sibabah  
Turon titah nibak raja

Neukheun ubak aneuk lhee droe  
Taba samlakoe meungadap bunda  
Aneuk ban lhee bangket meunyeumbah  
Cut Diwa Akah laju neuba

Leugat neutamong lam meuligoe  
Mumat jaroet peuet seureuta  
Bak masa nyan peurMaisuri  
Jingadap le dendayang dumna

Neukalon aneuk lhee peureugi  
Han neuturi sidroe teuma  
Elok pareh hana sakri  
PeurMaisuri hireuen lagoina

Sajan puleh nibak hireuen  
Teuma neutanyong bak aneukda  
Supo aneuk taba sajan  
Han tom kupandang meunan rupa

Aneuk ban lhee yoh nyan peugah  
Sujud seumbah ubak bunda  
Nyoe he bunda Cut Diwa Akah  
Sabda ayah keunoe lon ba

PeurMaisuri deungo meunan  
That sukaan dalam dada  
Neueu rupa hana lawan  
Miseue intan cahya muka

Di dalam ate peurMaisuri  
Patot seukali ngon aneukda  
Keudeh keunoe hana undi  
Putroe ti ngon banta muda

Dalam pike meunan bagoe  
Muda samlakoe seumbah bunda  
Lhee go seumbah meutuot-tuot  
Hana neusambot seumbah banta

Troh nyang keupeuet baro teukeujot  
Teuma neusambot seureuta haba  
Bek weueh ate aneuk meutuah  
Deumi Allah kon lon saja

Bunda lale hireuen dasyah  
Lon kalon indah cahya mata  
Teuma neubri ranup lam puan  
Pajoh rijang lhee seureuta

Jadi hireuen dum dendayang  
Geukalon bintang hu meucahya  
Patot seukali judo putroe  
Nyankeu lakoe Rakna Keumala

Miseue saka deungon susu  
Jroh that laku maneh raya  
Hana salah meusigeutu  
That sikufu putroe muda

Lheueh nibak nyan po samlakoe  
Ban peuet droe neuseumbah bunda  
Jak u bale bak ayah droe  
Troh sampoe neuseumbah raja

Duek meungadap raja nanggroe  
Samlakoe deungon kakanda  
Raja galak hana bagoe  
Samlakoe maneh di mata

Sabda raja bak dendayang  
Jak tueng rijang Rakna Keumala  
Jibeudoh le jak meuron-ron  
Troh u keubon tamong lanja

Tuan putroe yoh masa nyan  
Seumayam bak patarakna  
Jihadap le dum dendayang  
Seureuta sajan ma Sikanda

Bak masa nyan troh dendayang  
Seumbah rijang putroe muda  
Seureuta jikheun po cut ampon  
Neuyue jak tueng le ayahda

Seureuta ngon bunda sajan  
Suroh laman keunoe teuka  
Putroe deungo keusukaan  
Ngui pakaian sigra-sigra

Teuma neutren neubeurjalan  
Dendayang ireng dum lingka  
Neujak pantah hana macam  
Trok u dalam putroe muda

U meuligoe neukek pantah  
Neuseumbah paduka bunda  
Peurmaisuri galak leupah  
Neucom pantah ngon geuwa-wa

Seureuta deungon beurtangisan  
Dum dendayang sama juga  
'Oh nan teutap habaran nyan  
Putroe sinan lam istana

Jinoe raja lon karangan  
Peurmulaan fon keurija  
Peuet ploh uroe peuet ploh malam  
Peuduek peurasan dalam kuta

Peurmaenan macam-macam  
Peurjamuan raja raja  
Teubiet tamong hana teudoh  
Jamee dum troh hana reuda

Uroe malam meugeureupoh  
Bunyoe riuh kiam kubra  
Cut Diwa Akah nyang samlakoe  
Saboh meuligoe raja karonya

Sinan neuduek lam meuligoe  
Raja peuet droe sama-sama  
Geunap uroe jak u bale  
Ngadap doli poteu raja

Raja gaseh hana sakri  
Muda juhari indah rupa  
Adapun akan peurmaisuri  
Peurintah neubri lam istana

Neuyue leueng tika peureumadani  
Kaso lahuri mupeurmata  
Neuyue hias ngon peuraduan  
Dum seukalian bantai tika

Ngon keuleumbu nyang bee-beewan  
Reumboe intan mutiara  
Cukop dumpeue seukalian  
Bak sulotan peue takira

Hingga troh bak keusudahan  
Peungabesan buet keurija  
Hana lon boh panyang kalam  
Bak ingatan hana laba

Dara baro geukoh andam  
Euntreuk malam linto geuba  
Kareuna buet nyoe cit han jeuet tan  
Adat reusan nibak raja

Bak koh andam macam-macam  
Puntong capang nyang beurguna  
Maseng-maseng keusukaan  
Ladom tuan suka raja

Lheueh nibak nyan ngui pakaian  
Sileungkapan aneuk raja  
Gleueng ngon subang mata intan  
Seukalian mupeurmata

Duek geuta keueumasan  
Dum dendayang ireng lingka  
Aneuk wadi aneuk meuntroe  
Ngadap putroe nyang jroh rupa

Bandum dara goh na lakoe  
Dum sinaroe ngadap lingka  
Teutap 'oh nan dara baro  
Jinoe linto lon calitra

Akan banta Cut Diwa Akah  
Ka geuhiah le raja raja  
Ban nyang patot geupeurintah  
Ban jumeulah adat raja

Ngui pakaian dum sinaroe  
Cukop sampe sianeka  
Miseue buleuen peuet blah uroe  
Samlakoe indah that rupa

Cut Diwa Akah nyang meubudoe  
Jinoe geupuwое u istana  
Teuma geupeukek muda bangsawan  
Ateueh peurarakan campa warna

Meutatah ngon mutu manikam  
Panca lugam sendi warna  
Peurarakan limong pangkat  
Maseng babat deungon jeumba

Lapeh nyang fon cit ka meuhat  
Pahlawan kuat ban sineuna  
Geubri pakaian peue nyang layak  
That meusigak taeu rupa

Lapeh dua aneuk peunghulu  
Nyanpi teungku hebat raya  
Geubri pakaian ban silaku  
Beukit taeu ate suka

Lapeh keulhee uleebalang  
Seureuta tuan aneuk bentara  
Sangat indah dum pakaian  
Kreh meudulang bandum rata

Lapeh nyang peuet aneuk meuntroe  
Dum sinaroe muda-muda  
Leungkap alat nibak asoe  
Intan pudoe ngon peurmata

Lapeh limong dum gunangan  
Nyang duek sajan banta muda  
Pakaian dum keueumasaran  
Seukalian muda-muda

Ija bajee indah han soe  
Meusujoе intan peurmata  
Kreh sarongan meukeurawang  
Lhat di pinggang bandum rata

Maseng-maseng ban lakuan  
Bak atoran han meutuka  
Nyang ladom me peuludahan  
Dibeulakang banta muda

Nyang mat ciriek mata intan  
Sapat sinan sajan dua  
Nyang mat kipah mata pudoe  
Po samlakoe banta muda

Sapotangan jimat sidroe  
Rab samlakoe hana reuda  
Dua ureueng jimat puan  
Ranup santapan di jih jiba

Maseng-maseng peukeurjaan  
Jroh atoran han meutuka  
Teubuka payong nyang kunengan  
Sabe keumang nyan teubuka

Laen nibak nyan keubanyakan  
Payong ngon alam bek takira  
Teudong beuntara lapang siblah  
Payong jipeuhah panca warna

'Oh takalon bukon indah  
Meujeureulah hu meucanya  
Saboh reutak nyang me peudeueng  
Blah rot uneun banta muda

Nyanpi 'ajaeb taeu hireuen  
Nyang me peudeueng hebat rupa  
Ngon bunyian dum sinaroe  
Le that bagoe hana tara

Mangirna Pari nyang hareutoe  
Laen sinaroe junjong sabda  
Raja sireutoh tujoh plohpi ka keunan  
Di hadapan muda beulia

Raja keumala nyang peuet sajan  
Nyang beurjalan mula-mula  
Deungon rakyat meuntroe sajan  
Uleebalang lam keumala

Di likot tantra keumala hekeumat  
Teuma beurangkat po banta muda  
Ngon bunyian that 'adimat  
Kiam sangat that meutaga

U meuligoe laju beurangkat  
Banta deelat arak lanja  
Peurarakan keunan hade  
Geusambot le dua raja

Indra Diwa nyang fon sambot  
Geukot le Brahman Diwa  
U istana peuek leugat  
Peuduek siat bak singgasana

Teungku kalipi ka hade  
Peunikah le yoh nyan sigra  
Ijab kabuipi ka ase  
Peungeuh ate banta muda

Lheueh nibak nyan teuma dudoe  
Geucok samlakoe le raja dua  
Geupeuek le u meuligoe  
Teuma dudoe neucok le raja

Neumat leugat nibak jaroe  
Bak aneuk droe leugat neuba  
Teuma neupeudeuk di uneun putroe  
Ban matauroe limpah cahya

Rakna Keumala miseue buleuen  
Barangsoe hireuen jikalon rupa  
Keudeh keunoe hana peue kheun  
Wie ngon uneun hana beda

Cit that patot deungon padan  
Miseue santan deungon saka  
Raja kalon keusukaan  
That sipadan cahya mata

Bandua droe that analan  
Siukoran cit bandua  
Lheueh nyan raja leugat neutren  
U bale rom le neuhala

Raja yoh nyan yue khanduri  
Meuntroe wadi raja raja  
Minom makeuen bandum geubri  
Raja doli meusuka-suka

Tujoh uroe tujoh malam  
Minom makan rakyat dumna  
Le karonya bak sulotan  
Dum seukalian ate suka

Lheueh nibak nyan teuma dudoe  
Geujak seumanoe banta muda  
Sajan deungon tuan putroe  
Geujak pumanoe laot Saluka

Geupeuek ateueh peurarakan  
Nyang jimeunan panca peursada  
Geuba u laot bahron mahlak  
Ureueng nyang jak meuribee laks

Ngon bunyian bukon that sigak  
Takalon galak keumaen mata  
Trok u laot geuseumanoe  
Banta ngon putroe Rakna Keumala

Lheueh nibak nyan teuma geupuwoe  
U meuligoe lam istana  
Beurema Diwa neubri seudeukah  
Keu hamba Allah ban sineuna

Got nyang hina got nyang meugah  
Tueng seudeukah nibak raja  
Raja meuntroe uleebalang  
Rakyat sajan sambot rata

Mangat ate seukalian  
Akan sulton lakee seuahtra  
Lheueh seuleusoe raja khanduri  
Dum keumbali bak teumpatnya

Raja raja meuntroe wadi  
Seumbah doli bandum gisa  
Abeh jiwoe seugala rakyat  
Ubak teumpat u rumoh tangga

Beureuma Diwa nyang beurdeelat  
Tinggai teutap lam istana  
Syahdan akan po samlakoe  
Deungon putroe Rakna Keumala

Keusukaan lam meuligoe  
Geunap uroe jeuep kutika  
Akan raja keumala hekeumat  
Banta deelat neuyue gisa

Tuhan neubri siat teutap  
He raja peuet jak woe gata  
Pajan-pajan na meularat  
Nama meuhat ulon cinta

Raja keumala beuet jaroe  
Leugat jiwoe ban sineuna  
Deungon rakyat dum sinaroe  
Bandun jiwoe lam keumala

Deungon siat bandum hilang  
Hireuen teuceungong poteu raja  
Neueu meulintee keusaktian  
Ate sulotan suka rasa

Nibak ate raja nanggroe  
Bit aneuk nyoe raja raya  
Gagah peurkasa hana bagoe  
Samlakoe beu mubahgia

Raja gaseh hana bagoe  
Ho siuroe leubeh ganda  
Raja laen dum sinaroe  
Ngon samlakoe gaseh meusra

Lawet sinan Cut Diwa Akah  
Ujeuen mudah sabé teuka  
Nanggroe makmu rame leupah  
Makanan murah jeuep-jeuep donya

Jadi seunang aman nanggroe  
Lawet samlakoe di sinan na  
Tuhan neubri nekmat sampoe  
Banta ngon putroe jarak hana

Uroe malam keusukaan  
Ngon dendayang lam istana  
Deungon putroe gaseh han ban  
Jarakpi tan jeuep kutika

Teutap sinan dilee siat  
Lon sambat laen calitra  
Sidroe raja lon riwayat  
Meugah sangat atueh donya

\* \* \*

#### XIV. KRAMAWANDA KEUMEUNG REUBOT PUTROE

Sidroe raja lon riwayat  
Meugah sangat atueuh donya  
Kramawanda nama geurasi  
Gagah sakti han sapat sa

Ayah mate trep that lawi  
Nyang gantoe doli Kramawanda  
Nyang mat keurajeuen dalam makam  
Badai sulton nyan aneukda

Deungon bunda neuduek sajan  
Seureuta deungon nyan syeedara  
Sidroe adoe ureueng binoe  
Jroh peurangoe hana ngon sa

Hana bandeng jeuep-jeuep nanggroe  
Nama putroe Sinaran Cahya  
Umu baro tujoh blah thon  
Goh meukawen putroe muda

Padum raja nyang jak pinang  
Neukabui han soe nyang teuka  
Rakna Samindra nama nanggroe  
Cukop meuligoe deungon kuta

Nanggroe luah hana bagoe  
That seureuloe hana ngon sa  
Meurcu Angkasa nama gunong  
Teumpat seumayam Kramawanda

Abeh neuhukom diwa ngon mambang  
Raja di Padang Hilam Cahya  
Jen ngon pari abeh neutarek  
Raja di Tasek Bahron Samindra

Indra jindra raksasa sajan  
Seukalian di bawah tahta

Padum raja taklok keunan  
Bak bilangan dua ploh laks

Laen meuntroe uleebalang  
Taklok keunan bak Baginda  
Bangsa diwa asai raja nyan  
Gagah pahlawan hana tara

Bak jameun nyan hana lawan  
Sapatpi tan nyang kreueh jungka  
Umu baro that juhari  
Goh na esteuri mantong teuruna

Aneuk raja dum sambinoe  
Hana sidroe ate suka  
Suri Mangirna sosah keudroe  
Seubab samlakoe hana rela

Kareuna aneuk han meukawen  
Jadi ngeuren ate bunda  
Padum putroe canden-canden  
Han cit neutem Kramawanda

Sosah bunda geunap uroe  
Samlakoe sabe meudawa  
Han neutem tueng geubri putroe  
Lale keudroe sabe muda

Neujak meuen tiep-tiep uroe  
Kalon nanggroe jeuep-jeuep desa  
Seugala teumpat jeuoh ngon toe  
Troh sampoe Kramawanda

Beungoh neujak seupot neuwoe  
Geunap uroe nyan keurija  
Ateueh rakata keusaktian  
Ngon nyan teureubang jeuep kutika

Gagah peurkasa hana lawan  
Dum sulotan hana daya  
Leubeh bak ayah nyang ka dilee  
Siploh sukee lom meuganda

Kramawanda that jitubee  
Dum ka jithee juep-juep raja  
Nanggroe diwa pari mambang  
Abeh jalan Kramawanda

'Oh ka neuwoe baranggajan  
Ek tuan jak seumbah bunda  
Ladom kayem meunan macam  
Neubeurjalan suntok masa

Bak siuroe grak teukeudi  
Langsong doli nanggroe indra  
Treh bak nanggroe Neugara Puri  
Raja doli Kramawanda

Jieu ureueng rame sangat  
Jitren leugat jak pareksa  
Jikeubah rakata di dalam blang  
Di teungoh padang Anta Cahya

Jijak leugat le u dalam  
Keulakuan miseue indra  
Hana sidroe ureueng tanyong  
Treh jitamong lam istana

Jipeujeuet droe ban keudindeng  
Jijak rijang u istana  
Treh bak teumpat Cut Diwa Akah  
Keunan leupah Kramawanda

Ban jikalon putroe indah  
Teuhah babah Kramawanda  
Han tom jieu meunan putroe  
Nyang bagoe Rakna Keumala

Leungo badan dum sinaroe  
Jieu putroe indah rupa  
Cut Diwa Akah nyang samlakoe  
Duek ngon putroe sama-sama

Jingadap dum le dendayang  
Seureuta sajan biek peurwira  
Miseue buleuen jipageue bintang  
Pakri ban trang hu meucahya

Kramawanda hireuen laloe  
Jieu putroe Rakna Keumala  
Teudong hireuen mabok keudroe  
Adat jeuet nyoe jidrop jiwa

Dalam ate that beureuhi  
Jinoe pakri kubicara  
Nyang na bacut ka na suami  
Adat han jibri le ayahda

Beukit meunan kubri narit  
Peue kuisip meung manusia  
Saboh daruet tan kumeuniet  
'Oh meugriet jileupah saja

Meung suka bunda deungon ayah  
Nyan mudah 'oh tabicara  
Meunan ingat kakeu sudah  
Jitren pantah le jigisa

Ateueh rakata jiek rijang  
Jiteureubang jiwoe lanja  
Dalam ate rindu deundam  
Keu cut intan putroe muda

Troh u nanggroe sudah datang  
Ek rijang jak ngadap bunda  
Ban troh jiek ubak umi  
Jicom gaki Paduka Bunda

Neutanyong le peurmaisuri  
Hai boh ate pane gata  
Padum uroe tapeureugi  
Peue tacari bijeh mata

Meunan tanyong peurmaisuri  
Teusinyom le Kramawanda  
Seureuta jikheun wahe umi  
Lon peureugi kalon desa

Troh u nanggroe Neugara Puri  
Lon eu putroe ti indah rupa  
Rakna Keumala nan geurasi  
Aneuk doli Beureuma Diwa

Wahe bunda neujak pinang  
Akan putroe nyan that lon hawa  
Meung nyang laen hana lon tueng  
Keu putroe nyan neuba haba

Peurmaisuri deungo meunan  
Sosah han ban dalam dada  
Wahe aneuk keupeue meunan  
Pakon putroe nyan that tahawa

Kareuna putroe ka na suami  
Jalan pakri tabicara  
Ka na lakoe putroe indah  
Laen mudah nyang jroh rupa

Lagi'aeb nama keuji  
Tatueng esteuri manusia  
Putroe laen ulon cari  
Bek seukali nyan tacinta

Kramawanda marah yoh nyan  
Jideungo nan manusia  
Wahe bunda bek neukheun nyan  
Nyang laen han lon meuhawa

Nyang putroe nyan saja lon cok  
Jih lon keutok di keupala  
Keu manusia lon hana syok  
Ngon sudok lon poh di muka

Peurmaisuri deungo meunan  
Keususahan hana tara  
Wahe aneuk cahya badan  
Pakon intan meunan haba

Ujob teumeu'a pungah teukabo  
Sinan nyang le jeuet keu cidra  
Hilang kuat gadoh beuhe  
Areuta nyang lepi ek fana

Kareuna aneuk keuleubehan  
Nibak seukalian geutanyoe nyang na  
Meunan neupeujeuet uleh Tuhan  
Leubeh ensan dum barangna

Lagi aneuk sangat gagah  
Cut Diwa Akah that peurkasa  
Diwa pari mambang nyang meugah  
Bak Diwa Akah taklok seumua

Kramawanda saket ate  
Bek marit le wahe bunda  
Nyang jih sidroe lon poh mate  
Bah beu sakti gagah peurkasa

Meung manusia saboh ulee  
Han lon malee peue neusangka  
Peue tatakor meung jih sidroe  
Geutanyoe meukatoe ribee laksa

Peurmaisuri neukheun meunoe  
Deungo kamoe bijeh mata  
Beukit napsu cit keu putroe  
Yue tueng keunoe seugala raja

Bulia Raksasa tayue seutot  
Kareuna pangkat tamubapa  
Sri Geumpita raja Halam  
Tapanggelan keunoe dumna

Keu sulton Diwa Halam  
Keunan bek han tabri haba  
Kareuna bukon ureueng laen  
Darah dageng cit di gata

'Oh troh keunoe tamupakat  
Musyawarat deungon apa  
Meunan aneuk lon ijthiat  
Tabri surat dum beurata

Meunan titah peurmaisuri  
Ubak doli Kramawanda  
Lheueh nibak nyan seumbah umi  
Tren peureugi teuma lanja

Kramawanda tren u bale  
Ureueng rame ireng lingka  
Dum seumayam bak keurusi  
Sabda jibri jeuep-jeuep raja

Raja tujoh jiyue jak tueng  
Nyang geukheun bunoe le bunda  
Ban tujoh droe jibri ureueng  
Jitren mameung jak le sigra

Padumna trep jibeurjalan  
Troh datang bak tujoh raja  
Jipeugah dum peurkabaran  
Surohan Kramawanda

Raja tujoh deungo meunan  
Teurpanggelan bak aneukda  
Geubeudoh le dum sulton  
Suri sajan bandum geuba

Deungon meuntroe uleebalang  
Rakyat sajan han ek kira  
Padumna trep geujak sunggoh  
Sampoe troh u Rakna Samindra

Di padang Hilam dum geupioh  
Hingga troh meugah bak raja  
Kramawanda bri le ureueng  
Jiyue ampeueng tujoh raja

Jiteubiet le uleebalang  
Jak tueng rijang raja raja  
Ban sare troh keunan datang  
Uleebalang seumbah raja

Teuma jipeugah peurkabaran  
Sabda sulton Kramawanda  
Neuyue jak tueng deelat ampon  
U bale rom minta sila

Geubeudoh le seukalian  
Jak u dalam bandum raja  
Meuteumeung le ngon sulton  
Bangawan Kramawanda

Mumat jaroe muljaan  
Duek le yoh nyan nibak tahta  
Akan esteuri raja sinaroe  
Tamong bak putroe u istana

'Oh troh keunan dum sinaroe  
Seumbah putroe Suri Mangirna  
Sri Geumpita na aneuk droe  
Ureueng binoe jroh that rupa

Rupa indah hana bagoe  
Miseue putroe Sinaran Cahya  
Leubeh kureueng bacut saho  
Ureueng nyan hai po meusyeedara

Teutap sinan lam meuligoe  
Deungon putroe Sinaran Cahya  
Syahdan raja seukalian  
Di bale rom ban sineuna

Geubri ranup dalam puan  
Akan seukalian raja raja  
Dalam puan keueumasan  
Meutatahkan mutu ratna

Na sikeujap dudoe nibak nyan  
Troh sulotan Kramawanda  
Duek bak teumpat keueumasan  
Ngon seukeulian raja raja

Lheueh nyan gebet le hidangan  
U hadapan seugala raja  
Makeuen minom seukalian  
Peue sukaan cukop ada

'Oh lheueh makeuen ngui bee-beewan  
Meunan atoran seugala raja  
Ngon minoman di hadapan  
Teurleutakkan atueh meja

Seureuta neukheun keusukaan  
Dum seukeulian raja raja  
Kramawanda nyang sulotan  
Bak masa nyan jatoh sabda

He mamanda dum sinaroe  
Lon hareutoe bacut haba  
Kareuna hai ulon sidroe  
Saboh putroe lon meuhawa

Aneuk raja Neugara Puri  
Nan geurasi Rakna Keumala  
Nyankeu putroe lon beureuhi  
Meuhan geubri that ceulaka

Akan putroe nyan ka na lakoe  
Gop hareutoe manusia  
Bahle beuthat ka na lakoe  
Nyan cit putroe nyang lon cinta

Meukon putroe Neugara Puri  
Han seukali ulon suka  
Meunyo putroe han geutem bri  
Lon peureugi meudiwana

Nyan pat kuta ngon meuligoe  
Nyan pat nanggroe bak mamanda  
Ulon jinoe bah kuboh droe  
Han le lon woe seulama-lama

Kramawanda meunan kalam  
Raja seukalian pindek saja  
Syah alam Bulia duek pikeran  
Eleumee jifam ngon kutika

Bulia Raksasa that saktian  
Eleumee tamam jeuep peukara  
Abeh rata dum jipandang  
Keulaheran leumah nyata

Cut Diwa Akah akhe dudoe  
Nyankeuh sidroe raja raya  
Abeh taklok jeuep-jeuep sagoe  
Dum sinaroe indra jindra

Akan teutapi nyang ateueh droe  
Hana sampoe jipareksa  
Neubri lupot uleh Tuhan  
Nyan jeuet panyang haba calitra

'Oh lheueh leumah dum jipandang  
Marah yoh nyan hana tara  
Teubiet ngon reuoh dum meuree-ree  
Timoh ngon ulee siribee sa

Yo ngon badan teubiet ngon bulee  
Miseue lagee sang ka geumpa  
Sireutoh deupa pariyang badan  
Meulinggang sare dum nyang na

Rasa bumoe sang ka beukah  
Sebab amarah raja raksasa  
Raja laen hireuen dasyah  
Jikalon gagah Alam Bulia

Na sikeujap teuma dudoe  
Jikheun meunoe raja raksasa  
Wahe aneuk payong nanggroe  
Bek taboh droe Kramawanda

Peue cit sosah meunyan putroe  
Le that bagoe ngon tadaya  
Teutapi dilee tabri surat  
Tadeungo narit peue calitra

Pakri narit Beureuma Diu  
Na meunapsu nyang seujahtera  
Meunan bak lon aneuk teungku  
Leubeh dulu tabri haba

Gata aneuk jitem teurimong  
Jitulak ngon manusia  
Beukit jitueng atawa han  
Di dalam nyan tabicara

Cut Diwa Akah sidroe meuhat  
Hana rakyat keunan jiba  
Bak lon kira buet mudah that  
Ase siat tabicara

Beureuma Diwa hana sajan  
Mudah talawan manusia  
Beukit rohjihpi tapaban  
Bacutpi tan gli ngon geunta

Teuma seuot raja nam droe  
Nibak kamoe meunan juga  
Cit dilee kon nyan tunangan  
Lam tamuprang deungon indra

Bek antara meung raja nyan  
Jitamah lom siploh laksa  
Seuot Geumpita Raja Halam  
Bak lon tuan sama juga

Indra ngon jindra seukalian  
Cit talawan geutanyoe dumna  
Nanggroe luah rakyat sajan  
Seukalian kureueng hana

Nyang na bacut keususahan  
Seubab ensan taseureuta  
Kareuna seugala peuneujeuet Tuhan  
Leubeh ensan nibak nyang na

Nyakeu bacut suka jalan  
Nyang laen tan lon meuniet na  
Bulia Raksasa teuma seuot  
Bek tatakot keu manusia

Ulon lawanjih nyan sidroe  
Taeu dudoe 'oh tangaza  
Gata laen bek peuroh droe  
Bagi kamoe manusia

Kramawanda deungo meunan  
Keusukaan hana tara  
Jiyue peugot surat kireman  
Di dalam nyan jiboh haba

Peugot surat mangkubumi  
Nan geurasi Danta Diwa  
Jih nyang bijak jeuet keurani  
Dum jitukri adat raja

Jisurat le pantah-pantah  
Siat sudah abeh haba  
Lheueh jisurat jipeuleumah  
Baca pantah di nap raja

Raja deungo keusukaan  
Surat kireman beutoi raya  
Jilipat le yoh nyan rijang  
Yue utosan dua raja

Sidroe nama raja Juhan  
Kamarsyah tuan nyang keudua  
Banduajih aneuk raja jen  
Jiba kirem Kramawanda

Jituju u Neugara Puri  
Rakyat sare dum seureuta  
Padumna trep jipeureugi  
Neugara Puri troh jihala

Troh bak pinto kuta nanggroe  
Pioh sinoe sikutika  
Jibri haba ubak meuntroe  
Hajat kamoe jak bak raja

Peurdana meuntroe le peureugi  
Bak doli jak peugah haba  
Ban troh keunan sujud seumbah  
Jipeugah utosan teuka

Sabda raja han peue salah  
Peutamong pantah keunoe sigra  
Raja beurangkat u bale rom  
Neuyue tueng utosan teuka

Meuntroe wadi uleebalang  
Ngadap sulton Beureuma Diwa  
Na sikeujap raja seumayam  
Troh utosan keunan teuka

Troh u bale junjong doli  
Neuyue ek le uleh raja  
Seumbah sujud meureundah diri  
Teumpat geubri ban sikada

Bandum teuduek bak keurusi  
Jroh meuriti santeut banja  
Raja raja Neugara Puri  
Ngadap doli dum seureuta

Utosan duek na sikeujap  
Jijok surat Kramawanda  
Mangkubumi sambot surat  
Bak deelat peuseumbah sigra

Sabda raja baca leugat  
Lam surat peue bunyoe haba  
Mangkubumi kheun le deelat  
Jibeuet surat le jibaca

Meunoe haba dalam surat  
Bak deelat Kramawanda  
Paduka aneukda po surat nyoe  
Raja nanggroe Rakna Samindra

Peuet peunjuru dum alam nyoe  
Lam jaroe Paduka aneukda  
Barang-barang sampoekan hajat  
Keupada deelat Beureuma Diwa

Neugara Puri nanggroe geulakap  
Sinan teutap meunjadi raja  
Akan meuminta tuloh ikhlah  
Miseue keureutah nyang puteh safra

Harap banyak kasihan balah  
Neutueng beu sah lon keu hamba  
Jika sudi ayahda tuan  
Aneukda datang ngadap ayahda

Kalee tidak ayahda relakan  
Tantra ulon prang beu kong ngon kuta  
Saja meuhat lon prang naggroe  
Lon tueng putroe Rakna Keumala

Nyankeuh narit nibak kamoe  
Ingat keudroe he ayahda  
Raja deungo haba kireman  
Muka masam yoh nyan raja

Seureuta neukheun bak utosan  
Deungo lon kheun ubak gata  
He raja jen lon peugah kri  
Kon han lon bri Rakna Keumala

Kareuna jinoe ka na suami  
Pakri kutukri lom bicara  
Ka lheueh kawen ngon Diwa Akah  
Raja meugah manusia

Diwa Laksana nama ayah  
Nanggroe nyang sah Martagangsa  
Kareuna aneuk cit nyan saboh  
Ngon jalan toh kubicara

Ngon seubab nyan ulon jipoh  
Pakri ban jroh lon teurima  
Ngon seubab nyan ulon jiprang  
That bit girang Kramawanda

Dum kuasa kamoe lawan  
Kareunajih nyan that angkara  
Raja utosan deungo meunang  
Jikheun yoh nyan le bandua

Deelat ampon he junjongan  
Seumbah laman sikrak haba  
Beukit neudeungo jroh that seunang  
Jikalee han apakah daya

Kareuna aneuk raja nyang garang  
Gadol 'ajam dum raja raja  
Meung manusia sidroe bujang  
Jikeumeung lawan Kramawanda

Hana neumeuniet saboh daruet  
Nyang ka neupubuet hana dawa  
Seuot Indra Namli Diu  
Mangat that su gata meuhaba

Hana pike meung sigeutu  
Nyang na meulaku cit raja gata  
Bit nyo kuthee biek bangsa jen  
Barangkri jitem malee hana

Peurumoh gop lakee meukawen  
Bit-bit meung jen hana agama  
Raja laen jikeumeung peutan  
Nyang na agam Kramawanda

Jak leh peugah keudeh rijang  
Pajan jiprang tayue teuka  
Insya Allah ngon tulong Tuhan  
Saja kulawan ureueng angkara

Han kutakot bek kawaham  
Sideh di padang Anta Cahya  
Surat jiplah deungon jipriek  
Keudeh jitiek bak raja teuka

Raja utosan that amarah  
Surat jiplah di nap mata  
Jibeudoh le jiwoe pantah  
Hana jiseumbah Beureuma Diwa

Padumna trep jibeurjalan  
Troh bak makam Rakna Samindra  
Tamong leugat nyan u dalam  
Ngadap sulotan Kramawanda

Ban sare troh ka jiseumbah  
Leugat jipeugah deungon haba  
Deelat ampon pateh sudah  
Surat jiplah di nap mata

Han jitakot keu tuanku  
Jiyue laju jinoe teuka  
Jiyue laju ban nyang napsu  
Han sigeutu ate lia

Raja deungo kheun utosan  
Beungeh han ban Kramawanda  
Mukaji hu that amarah  
Dada mirah sang keusumba

Bulia Raksasa nyang that panah  
Ulee timoh siribee sa  
Seureuta jikheun he aneuk droe  
Jinoe geutanyoe malee raya

Tapeukeumah dum sinaroe  
Keudeh geutanyoe u padang Anta  
Beureuma Diwa sangat beurani  
Han jituri le keu gata

Jinoe taprang Neugara Puri  
Taungki ban saboh donya  
Kramawanda le beurtitah  
Jipeugah bak Diwa Danta

Raja taklok dum jiyue krah  
Beu troh langkah keunoe sigra  
Lheueh nibak nyan mangkubumi  
Haba jibri jeuep-jeuep raja

Troh le keunan jipeureugi  
Ngadap doli Kramawanda  
Dua ploh laksa raja taklok  
Keunan ka trok dum jiteuka

Rakyat jitren meukalot-kalot  
Meukeubok-keubok dalam kuta  
Sang sidom teubiet lam umpung  
Meunankeu dum taeu rupa

Abeh rakyat dum ka keunan  
Lam padang nyan Hilam Cahya  
Sudah cukop dum angkatan  
Beudoh sulotan ek bak bunda

Peurmaisuri Mangirna bangsawan  
Kutika nyan duek bak geuta  
Kramawanda seumbah umi  
Com di gaki Paduka Bunda

Wahe bunda idin neubri  
Neugara Puri ulon bungka  
Lon that 'aeb malee keuji  
Han jibri Rakna Keumala

Neuseuot le peurmaisuri  
Allah pakri cahya mata  
Nyang ulon tham han tapateh  
Han tagaseh ulon bunda

Napsu setan that tapateh  
Akhe paleh cahya mata  
Bek tajak he bungong geutoe  
Laen putroe lon jak mita

Nyang leubeh jroh lom sambinoe  
Ngon putroe nyoe leubeh ganda  
Kramawanda seuot yoh nyan  
Bunda jangan lon neusangga

Ka teulanjo leupah kalam  
Ngon seukalian raja raja  
Neulakee do'a hai ma badan  
Uroe malam bek na reuda

Bu meuteumeung putroe intan  
Bek maluan aneuk bunda  
Allah hai aneuk bungong karang  
Kupaban do'a keu gata

Han neukabui uleh Tuhan  
Sebab ensan that bahgia  
Sira neumoe beurtangisan  
Sira neutham bijeh mata

Kramawanda seumbah umi  
Seureuta lagi com adekda  
Tinggai gata adek badan  
Keu cut abang lakee do'a

Sinaran Cahya seumbah rijang  
Wahe cut abang lon seureuta  
Sira jimoel putroe intan  
Sangat sayang keu syeedara

Bek neukeubah lon e cut bang  
Lon jak sajan rugoe laba  
Ayah han le aduen lon tan  
He Tuhan peue untong hamba

Kramawanda deungo meunan  
Jikheun yoh nyan meunoe haba  
Bek le tamoe adek badan  
Di beulakang lon tueng gata

Deungon bunda sajan-sajan  
Hai intan bek tamoe rugha  
Ban jideungo haba meunan  
Seungap yoh nyan putroe muda

Kramawanda ngui pakaian  
Di hadapan Paduka Bunda  
Putroe Sinaranpi na sajan  
Jieu lakukan akan kakanda

Jingui pakaiana sileungkapan  
Alat puprangan jeuneh rupa  
Jingui mahkuta tujoh pangkat  
Hu meukilat mupeurmata

Cukop dumpeue seukalian  
Leugat yoh nyan seumbah bunda  
Neuwa neucom ban saboh badan  
That neusayang bijeh mata

Peurmaisuri beurtangisan  
Padoli tan Kramawanda  
Jitren leugat jibeurgalan  
U bale rom le jihala

Raja raja dum seukalian  
Jipreh sultana Kramawanda  
Yoh nyan beudoh le beurjalan  
Dum angkatan balatantra

Bulia Rakksasa nyang beudoh fon  
Lheueh nibak nyan Sri Geumpita  
Teuma sultana Alam Tasek  
Lheueh nyan adek Lila Mangirna

Teuma beudoh Indra Syamsu  
Sajan ngon Diu Bulia Sina  
'Oh ka abeh raja tujoh droe  
Beudoh sinaroe laen raja

Maseng-maseng atueuh kandran  
Ladom tuan atueuh rakata  
Ladom atueuh naga teureubang  
Ladom pasang atueuh singa

Ladom atueuh pakah teureubang  
Ladom tuan gagak suara  
Dong meuseueh-seueh dum meureuntang  
Di teungoh padang Hilam Cahya

Bulia Rakksasa ek le kandran  
Rakata teureubang mupeurmata  
Bajee direh meukeurawang  
Meutatahkan mutu rakna

Jingui mahkuta tujoh ploh pangkat  
Teurlalu hebat raja raksasa  
Sigak na ban gunong apui  
Meugasui-gasui taeu cahya

Payongji pudoe meukeurawang  
Siblah lapan jroh mubanja  
Lanja jiek u teungoh padang  
Uleebalang ireng lingka

Sri Geumpita raja Halam  
Jimeukandran atueh geureuda  
Jingui bajee meuteurapan  
Pudoe intan hu meucahya

Mahkuta sikureueng blah pangkat  
Analanan that raja indra  
Nam blah payong beurkeumbangan  
Indah lakukan hana tara

Uleebalang wadi meuntroe  
Ireng sinaroe akan raja  
Kramawanda di beulakang  
Rakata saktian jimeucinta

Jimeupayong iram kuneng  
Hana bandeng indah rupa  
Peuet ploh payong beurkeumbangan  
Beuranteng-anteng panca warna

Padum guda padum gajah  
That barollah han teukira  
Wie ngon uneun likot hadapan  
Ireng junjongan Kramawanda

Jingui mahkuta tujoh ploh bagoe  
Intan pudoe mupeurmata  
Bajee meurante meuh meuseundi  
Utoh ahli bak jiteumpa

Lanja jiek u teungoh padang  
Raja seukalian ngadap lingka  
Raja raja dum beurjalan  
ireng sultanan Kramawanda

Troh u Tasek Bahron 'alak  
Pioh siat balantra  
Seugala raja peugot kimah  
Teumpat pioh dum seumua

Bulia Raksasa cinta hekeumat  
Ngon sisa'at jeuet le kuta  
Kuta luah hana bagoe  
Peuet ploh uroe bak talingka

Leungkap istana ngon bale rom  
Tamong bandum rakyat ngon raja  
Ureueng nanggroe keumala hekeumat  
Ka meusapat sajan seureuta

Raja neuek u bale rom  
Ngadap bandum Kramawanda  
Makeuen minom beursukaan  
Ngon bunyian sianeka

Teuma pakat bak buet muprang  
Raja seukalian mubicara  
Syahdan teuduek 'oh nan siat  
Lon riwayat Beureuma Diwa

## XV. NEUGARA PURI JIPRANG LE KRAMAWANDA

Meugah bak raja Neugara Puri  
Ka troh u pasi Kramawanda  
Padum-padum raja nyang sakti  
Kimah teurdiri meuribee laksa

Di bineh laot Bahron 'alak  
Rakyat meusak-sak dum keunan ka  
Baginda teubiet u bale rom  
Jingadap dum le raja raja

Uleebalang 'adi juhan  
Ngadap sulotan Beureuma Diwa  
Neuyue pangge Mangirna Pari  
Beu sajan le ngon aneukda

Sulotan raja Diwa Halam  
Sajan-sajan ngon aneukda  
Teuma hade Alam Peutawi  
Paduka Sri Halam Muda

Syahi Mangirna diwa mambang  
Paduka Indran Keumba Udara  
Istat Majat Lila Jayani  
Diwa Sali sajan seureuta

Abeh bandum beurangkat keunan  
Ngadap sulotan Beureuma Diwa  
Raja nyang taklok bandum ka keunan  
Uleebalang dum ban nyang na

Teuduek bandum ateueh keurus  
Ngadap doli meunanti haba  
Na sikeujap teuduek beureunti  
Titah doli Beureuma Diwa

Neukheun bak raja Mangirna Pari  
Dan lagi seugala raja  
Jinoe pakat dum he teelan  
Akan sulotan Kramawanda

Bandum ka troh keunan datang  
Ngon angkatan balatantra  
Raja raja bandum sajan  
Keusaktian hana tara

Jinoe pakri wahe teelan  
Peugah rijang peue bicara  
Seumbah raja Mangirna Pari  
Ampon doli tan bicara

'Oh talawan nyang meusakti  
Gagah beurani apakan daya  
Indra ngon diwa beursamaan  
Patot padan po meukuta

Teungoh geuduek beukataan  
Troph utosan Kramawanda  
Jipeuseumbah bak sulotan  
Utosan jeh pat di luar

Sabda raja peutamong rijang  
Peue habaran keunoe lanja  
Hingga teuma haba nyang rab  
Tamong leugat ureueng teuka

Troh u bale seumbah deelat  
Jijok surat Kramawanda  
Raja yue beuet teuma leugat  
Cuba lihat pakri haba

Mangkubumi seumbah deelat  
Geubeuet surat le geubaca  
Bawa ini satu surat  
Nibak deelat Kramawanda

Raja ban peuet peunjuru alam  
Mahkuta dum seugala raja  
Jen ngon pari diwa mambang  
Seukalian indra jindra

Walee raja Neugara Puri  
Taklok bak doli simata-mata  
Jinoe takheun peue nyang kheundak  
Tateumeung duek lam seuahtra

Atawa cit takeumeung jak  
Pakri galak Beureuma Diwa  
Meuna tasayang akan meurtabat  
Taba lam ikat manusia

Rakna Keumala keunoe taintat  
Pupeunoh adat kamoe raja  
Supaya seulamat dumteu sare  
Neugara Puri han binasa

Meuhan tadeungo surat ini  
Esok hari teubiet ngaza  
Ban neudeungo haba surat  
Amarah that Beureuma Diwa

Mangirna Pari hana peue kheun  
Beungeh bandum seugala raja  
Teuma marit Diwa Brahman  
Keudeungoran jen kureueng bangsa

Barangri mideuen barangri padang  
Singoh jadeph prang keupeue haba  
Raja utosan amarah that  
Beudoh leugat le jigisa

Hana jiseumbah raja deelat  
Narit saket that geuteuoh bangsa  
'Oh leupah woe nyan utosan  
Doli junjongan neumeusabda

Geutanyoe singoh ka jadeph prang  
Toh nyang keunong keu panglima  
Mangirna Pari le peuseumbah  
Ban nyang titah bak meukuta

Siri nyang jroh tuanku peugah  
Hana bantah kamoe dumna  
Sabda raja neukheun nyoe ban  
Panglima prang Bisnu Diwa

Nibak ulon nyang laen tan  
Meulaenkan cit keumuen hamba  
Seureuta neubri peursalenan  
Arak yoh nyan Bisnu Diwa

Geupeuek ateueh peurarakan  
Arak yoh nyan siseun lingka  
Teuma geupuwoe lom u dalam  
Ngadap sulotan Beureuma Diwa

Makeuen minom ngon sukaan  
Seukalian seugala raja  
Seubeurmula deungo jinoe  
Po samlakoe lon calitra

Cut Diwa Akah deungon putroe  
Lale keudroe lam istana  
Hana neuthee dum peurbuatan  
Ka rab jeuet prang neuthee hana

Lam meuligoe keusukaan  
Uroe malam jarak hana  
Raja utosan lon hereutoe  
Leugat jiwoe troh bak raja

Kramawanda nyang samlakoe  
Di bale nyoe duek beurtalha  
Utosan duek jibet tangan  
Ampon laman po meukuta

Suratpi han jiteurimong  
Sangat sompong Beureuma Diwa  
Barangsoe han jipadoli  
Han jituri po meukuta

Meunyo gagah ngon beurani  
Kuturi di padang Anta  
Meunan jikheun tuanku droe  
Dum sinaroe raja raja

Marah keu patek hana bagoe  
Lon tren lon woe keunoe lanja  
Kramawanda deungo meunan  
Marah yoh nyan hana tara

Singoh beungoh pubeudoh prang  
Raja seukalian deungo nyata  
Bak mamanda dum seukalian  
Singoh taprang soe panglima

Bulia Raksasa seuot meunoe  
Nyang got jinoe Syahrom Diwa  
Kareuna**jih** bangsa pari  
Lagi sakti ngon peurkasa

Kramawanda deungo meunan  
Sibeuna nyan kheun mamanda  
Seureuta geubri peursalenan  
Akan Syahrom nyang panglima

Geuarak le bak masa nyan  
Ngon bunyian sianeka  
Makeun minom beursukaan  
Sekalian seugala raja

Bak malam nyan hana geueh  
Sampoe mureh trang cuaca  
Teubiet uroe trang peureuseh  
Ureueng abeh teubiet u lua

Maseng-maseng ateueh kandran  
Leungkap deungon alat seunjata  
Ka meubunyoe le geundrang prang  
Bukon bubarang ngon nukira

Rioh bunyoe deumppek surak  
Blah pihak Kramawanda  
Keudeungoran Neugara Puri  
Geuseupot le geundrang sigra

Seugala raja teubiet u mideuen  
Meuseueh-seueh deungon seunjata  
Maseng-maseng ek cong kandran  
Uleebalang raja raja

Na nyang ateueh naga teureubang  
Ladom tuan ateueh geureuda  
Dua pihak ka u midan  
Maseng tuan ngon seunjata

Sideh beuho sinoe gasang  
Ka jadi prang dua raja  
Sideh geuek sinoe peucrok  
Ka meurumpok dua tantra

Beukit mate hana peue syok  
Rijang jicok rab ngon kuta  
Nyang di meuntroe sabé meuntroe  
Jimeukiloe han ban publa

Beukit mate salah sidroe  
Raja nanggroe nyang tueng bila  
Uleebalang ngon uleebalang  
Jimeucang han teudoh reuda

Nyawong teubiet han jisayang  
Buet sultan raja raja  
Nyang meugajah sabé gajah  
Jimeuhah-hah lagee raya

Nyang ka mate sinan reubah  
Bandua blah hana beda  
Nyang pahlawan sabé pahlawan  
Jimeutop cang meuhue hila

Keudeh mate keunoe simpan  
Nyang meucang jimeucang lanja  
Rusak mate han tatuban  
Meutamon sinan mate meukeuba

Jibeudoh dhoi seupot padang  
Jimeucang han le meuhingga  
Soe meuteumeung di hadapan  
Lawan rakan han jikira

Mate rusak han soe tuban  
Allah Tuhan nyang ek kira  
Darah ile nyan u bumoe  
Baro jinoe trang cuaca

Baro meuri lawan ngon droe  
Sideh sinoe trang ka nyata  
Darah ile miseue ie krueng  
Leupah jiplueng tungkang raya

Anyot bangke han tatudum  
Ka ie baplueng u kuala  
Prang raya that hana teudoh  
Sang guroh geulanteue raya

Suara cokma meugeureupoh  
Sang ka runtoh alam donya  
Nyang beurani taeu jigrop  
Nyang teumakot kliek lagoina

Suara peudeueng miseue ribot  
Sang talop u ate donya  
Sare geunap tujoh uroe  
Tiwah keunoe siblah raja

Neugara Puri le that paloe  
Ka jiboh droe rakyat dumna  
Diwa Bisnu kalon meunan  
Keutiwasan rakyat nyang na

Jilumpat le nyan u padang  
Rakyat kalon dum jigisa  
Diwa Bisnu gagah sangat  
Jicang rakyat Kramawanda

U timu sigo jilumpat  
U barat sigo jigisa  
Nyang meulinteueng di hadapan  
Hana meujan bak jihei ma

Peudeueng pajoh dum meukhan-khan  
Ka meutamon reubah meutimpa  
Dua ploh raja nyang ka hilang  
Buet tangan Bisnu Diwa

Rakyat Samindra abeh jiplueng  
Syahrom kalon beungeh raya  
Jimat peudeueng nibak tangan  
Jilinteueng nyan Bisnu Diwa

Seureuta jikheun ngon amarah  
Soe nama kah wahe jindra  
Meukah sidroe cit nyang meugah  
Kapeuleumah bak tan kuasa

Cuba riwang keunoe ngon kee  
Mangat kathee nak karasa  
Bisnu Diwa gisa keunan  
Deungon Syahrom meuhadap ka

Seureuta neukheun meunoe macam  
He binatang pari bangsa  
Bisnu Diwa kee geuboh nan  
Aneuk keumuen Beureuma Diwa

Di kah teuma soe geuboh nan  
Cuba kakheun jinoe sigra  
Teuma seuot raja Syahrom  
Hana mufom nama hamba

Puprangan nyoe bak kee hukom  
Keuaselan kee panglima  
Ka jipeulheueh le ngon panah  
Leugat atueuh Bisnu Diwa

Bunyoe suara miseue guroh  
Sang-sang runtoh peue-peue nyang na  
Rijang jitangkeh ngon peurise  
Abeh tune rakyat dumna

Diwa Bisnu jibalah le  
Panah sakti hana tara  
Panah apui hu raya that  
Jitimpa rakyat Kramawanda

Ka jipanah uleh Syahrom  
Panah ujeuen leubat raya  
Jitimpa apui dum abeh len  
Amarah yoh nyan Bisnu Diwa

Laen panah ka jigadang  
Aneuk panah nyan jeuet keu naga  
Jipeuteupat atueuh Syahrom  
Jikeumeung klong uleh naga

Jipeulheueh panah le u manyang  
Aneuk panah nyan jeuet geureuda  
Geureuda ngon naga jimeureupah  
Rasa reuloh bumoe donya

Na sikeujap jimeureupah  
Naga tiwah mate fana  
'Oh ban mate naga sakti  
Amarah le Bisnu Diwa

Jipeulheueh panah teuma lagi  
Geureuda mate keunong cokma  
Geureuda mate Syahrom marah  
Beurpanah-panah gop nyan dua

Keudeh keunoe hana tiwah  
Saban gagah ngon peurkasa  
Diwa Syahrom beungeh han ban  
Jieu keunong han Bisnu Diwa

Teuma jicok panah laen  
Nyang saktian nibak nyang ka  
Lheueh jigadang teuma panah  
Laju atueh Bisnu Diwa

Kakeu dumnan kheundak Allah  
Silap tangkeh Bisnu Diwa  
Keunong bak dada beusot u rueng  
Reubah linteueng mate fana

Bisnu Diwa kakeu mate  
Jisurak le ngon meutaga  
Akan raja Neugara Puri  
Jingadap rame balatatra

Aneuk lhee droepi di sinan  
Raja laenpi seureuta  
Mangirna Pari bak masa nyan  
Aneuk ban nampi seureuta

Teuduek atueh bangun-bangunan  
Geueu u padang Anta Cahya  
Bisnu Diwa geueu han le  
Saket ate dum syeedara

Sujud di gaki doli junjongan  
Lheueh nibak nyan bak ayahda  
Ban limong droe ek cong kandran  
Leugat u padang le geuhala

Jijak mita Diwa Syahrom  
'Oh meuteumeung han le haba  
Taeu jipanah cit ban limong  
Diwa Syahrom jitheun sangga

Hana sidroe nyang na keunong  
Panah ban limong hana meuguna  
Jinoe jibalah Diwa Syahrom  
Ngon panah nyang sakti raya

Sigo jitarek limong teubiet  
Pantah ban kilat hana tara  
Leugat ateueh raja limong  
Bandum keunong nibak dada

Troh u likot dum sinaroe  
Hana sidroe nyang tinggai na  
Jieu le syeedara nyang na sidroe  
Ri geumanoe ngon ie mata

Kusna Pari namaji nyan  
Seumbah junjongan Beureuma Diwa  
Lheueh nibak nyan seumbah ayah  
Peunoh limpah ngon ie mata

Jiek leugat ateueh kandran  
Diwa Syahrom jijak mita  
Akan raja Mangirna Pari  
Heundak peureugi tuntut bila

Beureuma Diwa han neutem bri  
Bek peureugi geutanyoe dua  
'Oh ka mate raja seukalian  
Baro teuman geutanyoe ngaza

Teutap 'oh nan Mangirna Pari  
Hana neubri le Baginda  
Jinoe teuseubot Kusna Pari  
Nyang cari bila syeedara

Ban meuteumeung Diwa Syahrom  
Meunoe jikheun Pari Kusna  
Wahe pari hoka meung plueng  
Keunoe riwang wahe raja

Cuba katheun buet jaroe kee  
Kon ban dilee laen nyoe ka  
Diwa Syahrom yoh nyan lihat  
Jieu hebat sidroe jindra

Teuduek atueuh rakata teureubang  
Bukon bubarang gagah peurkasa  
Diwa Syahrom peurab keunan  
Meuhadapan sabé muda

Teuma jitanyong soe nama kah  
Cuba peugah wahe jindra  
Kusna Pari seuot pantah  
Deungo kupeugah he ceulaka

Kusna Pari kee geuboh nan  
Mahkuta seukalian raja jindra  
Nyang jeuet kujak u mideuen prang  
Kukeumeung reupang takue gata

Seubab kapoh syeedara kee  
Jinoe kathee kutueng bila  
Diwa Syahrom deungo meunan  
Jipanah yoh nyan pantah sigra

Jitangkeh le ngon peurise  
Patah-pate jeuet keu sira  
Diwa Syahrom lom jipanah  
Apui pantah jeuet le sigra

Kusna Pari yoh nyan balah  
Deungon panah sakti raya  
Tadeungo su miseue guroh  
Meugeureupoh that meutaga

Jitangkeh le Diwa Syahrom  
Su meudeungong hana tara  
Hu meunyala atueuh peurise  
Suara tunye that peurkasa

Suara miseue geulanteue plah  
Raya leupah bunyoe taga  
Jipanah le Kusna Pari  
Panah sakti leubeh bak nyang ka

Jimupake aneuk panah  
Jimeureupah han ban publa  
Keulam-kabot han peue peugah  
Sakti meureupah 'ajaeb raya

Na sikeujap jimupoh-poh  
Talo saboh ka binasa  
Talo panah Diwa Syahrom  
Abeh bandum purak-peuranda

Meunang panah Kusna Pari  
Surak rame hana tara  
Jipoh rakyat le aneuk panah  
Nyang siblah Kramawanda

Beungeh raya Diwa Syahrom  
Panah laen jicok lanja  
Nyankeu panah sakti han ban  
Jirasi nan Nilawanta

Nyankeu panah nyang that lantueuh  
Barangsoe han lheueh 'oh meusua  
Jipanah atueuh Kusna Pari  
Jitangkeh le leupah mara

Jibalah le Kusna Pari  
Panah peureugi u antara  
Ngon sikeujap jeuet keu parang  
Ngon tajam dua blah mata

Di antara jitren curam  
Han jikalon keunong bak dada  
Nibak dada beusot u rueng  
Jeumeulueng bulat ngon mata

Diwa Syahrom sudah mate  
Hana soe le keu panglima  
Surak meuhubo hana sakri  
Bukon rame padang Anta

Akan raja Kusna Pari  
Rakyat neutadi han ek kira  
Teuma uroe hampe peutang  
Geupeh geundrang bandum gisa

Rotdeh rotnoe geumuwoe-woe  
Geutamong sampoe u dalam kuta  
Kusna Pari mantong di blang  
Dang geuusong mayet syeedara

Geupuwoe leugat nyan u dalam  
Tanom rijang bak beasa  
Lheueh geutanom ban seupeurti  
Kusna Pari ngadap raja

Deungon ayah Mangirna Pari  
Ngadap doli Beureuma Diwa  
Raja neucom Kusna Pari  
Salen neubri nyang teurula

Uleebalang meuntroe wadi  
Rakyat lagi bandum rata  
Bandum salen rata neubri  
Raja doli dum karonya

Lheueh nibak nyan teuma dudoe  
Raja neuwoe u istana  
Deungon laen dum sinaroe  
Maseng dum woe bak teumpatnya

Mangirna Pari ngon aneuk droe  
U meuligoe jak bandua  
Peurmaisuri bri horeumat  
Duek bak teumpat nyang mulia

Mangiṇa Pari dukaan that  
Teuingat akan aneukda  
Neutequoh aneuk nyan ban nam droe  
Sira neumoe ngon ie mata

Peurmaisuripi moe sajan  
Seukalian sret ie mata  
Hana teudoh keusyugolan  
Uroe malam duka cita

Teiduek sinoe habaran nyan  
Nyoe karangan Kramawanda  
Jiled keusa kabeh 'oh nan  
Keudeh sambongan jiled keudua

HIKA VATUUTDIWA AKAH

Perpustakaan  
Jenderal Keb

899.22-  
HIK



PN BALAI PUSTAKA — JAKARTA

